

496

2017/5

# GULISTON

3  
No

*Fayz agar olmas vujudung gulsitoni atridin,  
Shammai naqshi vujud imkon emas imkon aro.*

Alisher NAVOIY



Орадан йиллар, асрлар ўтади, муҳтарам Биринчи Президентимизнинг номи ва у киши бошчилигида амалга оширилган буюк ишлар юртимизнинг шонли тарихида ўчмас саҳифа бўлиб мангу қолади.

Шавкат МИРЗИЁЕВ,  
Ўзбекистон Республикаси Президенти

2017/5

# GULISTON

Jurnal 1925-yildan chiqsa boshlagan

**Muassis:**

O'zbekiston Respublikasi  
Madaniyat vazirligi

Bosh muharrir  
vazifasini bajaruvchi:  
Temur A'ZAM

**Jamoatchilik kengashi:**

Muhammad ALI  
Suyima G'ANIYEVA  
Baxtiyor SAYFULLAYEV  
Minhojiddin MIRZO  
Shuhrat SIROJIDDINOV  
Akmal NUR  
Hamidulla BOLTABOYEV  
Isajon SULTON  
Fathulla MA'SUDOV  
Mirza AZIZOV  
Oqilxon IBROHIMOV

**Tahririyat:**

mas'ul kotib:  
Komil JONTOYEV  
fotomuxbir:  
Mashrab NURINBOYEV  
sahifalovchi:  
Nigina ISMOILOVA  
navbatchi muharrir:  
Ahmad TO'RA

E-mail: guliston\_jurnali@umail.uz  
gulistonjurnali@exat.uz  
Veb-sayt: gulistonjurnali.uz



ijtimoiy-siyosiy, ilmiy-badiiy, madaniy-ma'rifiy jurnal

## USHBU SONDA:

*Tojixon SOBITOVA*  
*Birinchi Prezidentimizning*  
*barkamol siymosi*

*Enaxon SIDDIQOVA*  
*Yuragimda gullay boshlar*  
*hayajonlar*

*To'lqin ESHBEKOV*  
*Tafakkurga asoslangan*  
*muloqot*

*Manzura SHAMS*  
*Topganimiz to'yga*  
*buyursin...mi?*

*Ibrohim HAQQUL*  
*Tutdek to'kilgan yurak*

*Sanobar RAHMONOVA:*  
*Men saodatli ayolman*


*Saodat BERDIYЕVA*  
*E'tirof mas'uliyati*



Jurnal O'zbekiston Matbuot va axborot agentligi tomonidan 0517 raqamli guvohnoma bilan 13.09.2016-yilda ro'yxatga olingan.  
Jurnal ikki oyda bir marta (bir yilda oltita) chop etiladi.  
Mualliflar va tahririyat fikrlari farqli bo'lishi mumkin.  
«Guliston» jurnalidan olingan materiallarda manba ko'rsatilishi shart.  
Tahririyat barcha ijodiy ishlarni tahrir etishga haqli.

Bichimi 62x84. Buyurtma № 69 . Adadi: 1200 nusxa.  
Hajmi 6 bosma taboq.  
Bosmaxonaga 18.10.2017-yilda topshirildi. Bosishga 20.10.2017-yilda ruxsat etildi. Tahririyat manzili: Toshkent — 100000, Buyuk Turon ko'chasi, 42-uy. Tel.: 233-25-66, 233-27-94.

Jurnal «SILVER STAR PRINT» MCHJ bosmaxonasida chop etildi.  
Manzil: Toshkent shahri, Uchtepa tumani, 22-mavze, 17-uy.



# ЎЗБЕКИСТОН ЎҚИТУВЧИ ВА МУРАББИЙЛАРИГА

Қадрли ва муҳтарам устозлар!

Аввало, сиз азизларни, сизларнинг тимсолингизда устоз деган шарафли номни улуғлаб келаётган юртимиздаги барча инсонларни умумхалқ байрами – Ўқитувчи ва мураббийлар куни билан чин қалбимдан самимий муборакбод этаман.

Бугун ушбу қутлуғ айёмни мамлакатимизда кенг нишонлар эканмиз, биринчи навбатда, қадрдон мактабимиз, бизга ҳарф ўргатган, эзгулиқдан сабоқ берган меҳрибон муаллимларимиз сиймоси кўз олдимиизда намоён бўлади. Биз учун ибрат намунаси, юксак инсоний фазилатлар тимсоли бўлган сизлар каби азиз ва мўътабар зотлар шаънига энг гўзал сўзлар, эзгу тилакларимизни изҳор этамиз. Сизларнинг барчангизга ҳеч қачон узиб бўлмайдиган қарздорлик ҳисси билан таъзим қиласиз.

Буюк Алишер Навоий бобомиз айтганлариdek, дунёning бор бойлиқ ва хазинаси билан ҳам сизларнинг олижаноб меҳнатингиз ҳақини адо этиб бўлмайди.

Ҳақиқатан ҳам, ҳар бир мурғак болани ўз фарзандидек ардоклаб, ёш авлод тарбияси учун кўз нури, қалб қўри, бутун борлигини бахш этадиган ўқитувчи ва мураббийлар том маънода фидои касб эгаларидир.

Биз бугун замонавий билим ва касб-хунарлар, хорижий тилларни пухта эгаллаб, катта умид ва ишонч билан ҳаётга қадам кўяётган, эртанги кунимизнинг ҳал қилувчи кучи бўлган мингминглаб фарзандларимиз камолида ўқитувчи ва мураббийларимизнинг бекиёс ҳиссаси борлигини яхши биламиз ва сизларнинг бу улуғ хизматингизни юксак қадрлаймиз.

Хурматли юртдошлар!

Мамлакатимиз ўз тараққиётининг янги даврига қадам қўйган ҳозирги кунда Ўзбекистон Республикасини 2017-2021 йилларда ривожлантиришнинг бешта устувор йўналиши бўйича Ҳаракатлар стратегияси асосида барча соҳаларда кенг кўламли ўзгаришлар амалга оширилмоқда.

Ана шу ислоҳотларнинг муваффақияти, мамлакатимизнинг дунёдаги ривожланган, замонавий давлатлар қаторидан муносиб ўрин эгаллаши, аввало, илм-фан ва таълим-тарбия соҳасининг ривожи билан, бу борада бизнинг дунё миқёсида рақобатдош бўла олишимиз билан узвий боғлик, десак, ҳеч қандай муболага бўлмайди.

Айни шу мақсадда ўтган бир йил давомида Ўзбекистон Республикаси Президенти ва Вазирлар Маҳкамасининг бевосита таълим-тарбия соҳасига дахлдор бўлган 74 та фармони, қарор ва



фармойиши қабул қилинганини таъкидлаш ўринлидир.

Албатта, соҳа ривожига юксак эътибор натижаси бўлган бу ҳужжатларни ҳаётга самарали жорий қилиш, уларга бамисоли жон баҳш этишда биз, аввало, сиз, азиз ўқитувчи ва мураббийларга, сизларнинг билим ва тажрибангиз, истеъдод ва маҳоратнингизга суннамиз.

Бугунги кунда биз замон талаби ва халқимизнинг ҳоҳиш-иродасидан келиб чиқсан ҳолда, таълим тизимида улкан ислоҳотларни амалга оширишга киришдик. Жумладан, умумий ўрта таълим соҳасида 11 йиллик тизимга ўтиш, академик лицей ва касб-хунар колледжларини оптималлаштириш, 5 та янги олий таълим муассасаси ва филиаллар ташкил этиш, 16 та университет ва институтда 12 та йўналиш бўйича кечки ва сиртқи бўлимлар очиш, мактабгача таълим муассасалари тармоғини кенгайтириш, нодавлат таълим хизмати кўрсатиш, педагог кадрлар ва халқ таълими ходимларини тайёрлаш ва қайта тайёрлаш, уларнинг малакасини ошириш тизимини такомиллаштириш бўйича татбиқ этилаётган, узоқни кўзлаган ислоҳотларнинг моҳияти ва аҳамиятини сиз, ҳурматли устоз ва мураббийлар, албатта, ҳаммадан кўра яхши тушунасиз.

Ана шу ишларимизнинг давоми сифатида шу кунларда Муҳаммад ал-Хоразмий номидаги ахборот-коммуникация технологиялари йўналишига оид фанларни чукурлаштириб ўқитишга ихтисослаштирилган мактаб, Мирзо Улуғбек номидаги ихтисослаштирилган давлат умумтаълим мактаб-интернати, «Астрономия ва аэронавтика» боғи ташкил этилаётгани, ҳеч шубҳасиз, мамлакатимизда таълим сифатини жаҳон стандартлари даражасига кўтаришга хизмат қиласи.

Шунингдек, Тошкент шаҳрида Америка Қўшма Штатларининг нуфузли Вебстер университетининг филиали очилиши ҳам илм-фан ва таълим соҳасида илфор хорижий тажриба ва инновацияларни жорий этиш йўлида муҳим қадам бўлади.

Айни вақтда биз таълим-тарбия муассасаларининг моддий-техник базасини мустаҳкамлаш, муаллимлар, профессор-ўқитувчилар малакасини ошириш, хориждаги етакчи таълим марказлари билан илмий-педагогик ҳамкорликни кучайтириш, ўкув-тарбия жараёнларига замонавий таълим ва ахборот технологияларини, янги ўкув методикаларини жорий этиш бўйича хали олдимизда кўплаб долзарб вазифалар турганини яхши англаймиз ва уларнинг ечими устида доимий иш олиб борамиз.

Мұхтарам дўстлар!

Бугунги кунда шиддат билан ўзгариб бораётган

ҳаёт олдимизга қўяётган бир-биридан мураккаб ва муҳим масалаларни ҳал қилиш ҳақида ўйлар эканмиз, уларнинг ечими айнан таълим-тарбия билан, ёшларнинг дунёқарашини замонавий билим, юксак маънавият ва маърифат асосида шакллантириш билан боғлиқ эканига яна бир бор ишонч ҳосил қиласиз.

Жумладан, бутун инсониятни ташвишга солаётган терроризм ва экстремизм каби бало-қазоларни бартараф этишда фақат уларнинг оқибатларига қарши курашиш билан чекланмасдан, биринчи навбатда, бу таҳдидларни келтириб чиқараётган сабабларга қарши курашиш, ёшларни эзгу инсоний идеаллар руҳида камол топтириш энг асосий вазифага айланмоқда.

Айнан ана шундай ёндашув Ўзбекистон томонидан нуфузли ҳалқаро саммитларда, хусусан, Бирлашган Миллатлар Ташкилоти Бош Ассамблеясининг яқинда бўлиб ўтган 72-сессиясида алоҳида таъкидлангани сизларга яхши маълум, албатта.

Бу борада биз илгари сураётган «Жаҳолат ва зўравонликка қарши маърифат билан курашамиз» деган ғоя ва ташаббус ҳалқаро майдонда катта эътибор ва қизиқиши ўйғотмоқда ҳамда кўллаб-куватланмоқда.

Ишончим комил, халқимиз зиёлиларининг илфор вакиллари бўлган сиз, ҳурматли устоз ва мураббийлар мамлакатимизда ижтимоий-маънавий муҳитни яхшилаш, ёшлар ўртасида соғлом турмуш тарзини қарор топтириш, жамиятимизда тинчлик ва ҳамжиҳатликни мустаҳкамлаш бўйича олиб бораётган ишларимизни сифат жиҳатидан янги босқичга кўтариш, ҳаётда ўзини оқлаган мактаб, оила ва маҳалла ҳамкорлигига асосланган ижтимоий тизим самарасини оширишда фаол иштирок этиб, барчага ўрнак ва намуна бўласизлар.

Сиз, азизларнинг ана шу эзгу мақсадларга эришиш, инсон ҳар томонлама эркин ва фаровон яшайдиган янги Ўзбекистон давлатини барпо этиш, жонажон Ватанимизни янада тараққий эттиришга қаратилган оғир ва мاشақатли, шу билан бирга, ғоят шарафли меҳнатингизни муносиб қадрлаш учун биз давлатимиз ва жамиятимизнинг бор куч ва имкониятларини сафарбар этишга тайёрмиз.

Сизларни 1 октябрь – Ўқитувчи ва мураббийлар куни билан яна бир бор табриклаб, барчангизга сиҳат-саломатлик, баҳт ва омад, хонадонларингизга тинчлик-хотиржамлик, файзу барака тилайман. Доимо соғ-омон бўлинг, азиз устозлар!

**Шавкат МИРЗИЁЕВ,  
Ўзбекистон Республикаси Президенти**

# БИРИНЧИ ПРЕЗИДЕНТИМИЗНИНГ БАРКАМОЛ СИЙМОСИ

*Инсонлар бўладики, келиши билан кетиши ўртасидаги умр деб аталмиш вақтда чақмоқдай чақнаб ўзларидан ёрқин из қолдирадилар. Бу из ўчмас бўлиб, асрларга татигулик. Маънавий етук шахсларгина шу қадар юксакликка, авлод-аждодлар қалбидаги замонлар оша, асрлар оша яшашдай шарафга сазовордирлар.*

*Шундай толега муносаб инсонлардан бири – мамлакатимизнинг Биринчи Президенти Ислом Каримов элим деб, юртим деб ёниб яшади. Буюк ўзбек халқининг мустақил, эркин ҳаёт кечиришида, миллий ифтихор туйғуси билан яшашида сабитқадамлик қилди. Жонажон ўзбекистонимизнинг, халқимизнинг келажагини ўйлаб фидойи бўлиб яшади.*

Ислом Каримов номининг абадийлаштирилиши, ҳайкаллар ўрнатилиши ва музейларнинг ташкил қилиниши ҳамда очилиши, кўрик-танловларнинг йўлга кўйилиши давлатимиз ва халқимиз мустақил юртимиз асосчисини қанчалар севиши ҳамда ҳурмат қилишидан далолатдир. Чунки Ўзбекистон халқи истиқпол йилларида эришилган салмоқли ютуқларни ҳақли равишда Биринчи Президентимиз номи ва фаолияти билан боғлайди. Зоро, у мамлакатда амалга оширилган улкан ишлар, тарихий ўзгаришларнинг ташаббускори ва раҳнамоси ҳисобланади.

Тошкент ва Самарқанд шаҳарларида ўрнатилган ҳайкаллар халқимизнинг ўз суюкли фарзандига бўлган юксак эҳтироми тимсоли бўлди.





Биринчи Президентимизни демократик талаблар ва халқаро мезонларга тўла жавоб берадиган Ўзбекистон Республикаси Конституциясининг муаллифи десак хато бўлмайди. Иқтисодий испоҳотларнинг беш тамойилини ўз ичига олган, дунёда «Ўзбек модели» деб эътироф этилган янги сиёсий-ижтимоий тизимни ишлаб чиқиб, амалга ошириди.

Ўзбекистон давлатининг ҳудудий яхлитлигини, сарҳадларимиз дахлсизлигини ҳимоя қилишга қодир Қуролли Кучлар, Чегара ва Ички қўшинларни замонавий испоҳотлар асосида ташкил этиш ишига бошчилик қилди. Айниқса, собиқ Марказкўм бошчилигидаги кучлар Ўзбекистонда адолатсизлик ва тазиёкларни авж олдирган йилларда ўзбек миллатининг номини таҳқир ва ҳақоратлардан ҳимоя қилиш, халқимизнинг миллый ғурурини тиклашда фидойилик намунасини кўрсатди. Шунингдек, бузғунчи кучлар бошлаган Андижон, Наманган, Фарғона, Қирғизистоннинг Ўш, Жалолобод вилоятларидағи фожиали воқеаларда матонат ҳамда инсонийлиги билан эл бошига тушган ишни бартараф қйлди. «Ўз кучи ва келажагига ишонган халқнинг бағри кенг бўлади. Шу нуқтаи назардан қараганда, ўзбек халқининг илдизлари бақувват, тарихи буюк, келажаги мустаҳкамдир!» деб элнинг кўнглини тоғдек кўтарган эди.

Биринчи Президентимиз халқимизнинг маънавий қадриятларига ҳурмат-эҳтиром билан муносабатда бўлиш, асраб-авайлаш ва ривожлантириш, муқаддас динимизни, урф-одатларимизни, бебаҳо тарихий меросимизни ҳаётга қайтаришни давлат сиёсати даражасига кўтарди. Бу унинг «Юксак маънавият – енгилмас куч», «Адабиётга эътибор – маънавиятга, келажакка эътибор» асарларида ўзининг яққол ифодасини топди. Мазкур асарлардаги ғоялар, ўйлайманки, ҳеч қачон ўз моҳиятини йўқотмайди. Ислом Абдуғаниевич халқаро майдонда Ўзбекистоннинг обрў-этиборини юксалтириш, ўзбек номини бутун дунёга тараннум этишга улкан ҳисса қўшди. Инсонларнинг тафаккурини ўзгартириш, уларнинг онгода миллый ғоя, миллый мафкура асосларини шакллантириш ва мустаҳкамлаш ишига раҳнамолик қилди. Айниқса, мафкуранинг ўзини ўта сиёсийлаштиришдан воз кечиб, унда айни миллый ва умуминсоний қадриятларни кучайтириш, таълим-тарбияда илм-маърифат, зиёлилик, юксак маданиятлиликнинг устуворлигига эришиш мақсадга мувофиқлигини кўрсатиб берди.

Юртимизда тинчлик-осойишталиктини, миллатлар ва фуқароларнинг ўртасидаги тотувлик ва ҳамжихатликни қарор топтириш, уни сақлаш ҳамда мустаҳкамлашга бекиёс ҳисса қўшди.

Маҳалланинг давлат ва жамият бошқарувидаги нуфузини ошириш, ваколат ва ҳуқуқларини кенгайтириш, фуқароларнинг ўз-ўзини бошқариш тизими

сифатида уни ҳар томонлама қўллаб-қувватлашда ташаббускор бўлди.

Шунингдек, Ислом Каримов жонажон Ўзбекистонимизнинг барча туманларида янги тураржой бинолари қурилиши, шу жумладан, улуғ аждодларимиз мангу ором топган қадамжоларни обод қилиш, иқтисодимизнинг салоҳиятини оширишда катта ўрин тутган йирик-йирик корхоналарни бунёд этишда, кўпгина шаҳар ва қишлоқларимиз, пойтахтимиз Тошкентнинг шакл-қиёфасини тубдан ўзгаришида бевосита раҳбарлик қилди.

Мухтасар қилиб айтганда, Ислом Абдуғаниевич Каримов Ўзбекистон давлати ва давлатчилигини барпо қилиш, демократик фуқаролик жамияти қуриш асосларини яратди. Мамлакатимиз тараққиётининг асосий йўналишларини ишлаб чиқди, юртимизнинг ёруғ истиқболи йўлида кўп миллатли халқимизни бирлаштириб, уни улуғ мақсадлар сари бошлади. Ана шунинг учун ҳам буюк ўзбек халқининг қалбидан чуқур ва бекиёс ўрин олди. Бу эзгу ишлар мангуликка дахлдор.

**Тожиҳон СОБИТОВА,**  
филология фанлари номзоди,  
доцент



# MILLIY RAQS SAN'ATINING RIVOJLANISH TARIXI

Қадим замонда бир шоҳнинг оловда ўйнайдиган раққосаси бўлган экан. Раққоса ойнинг ийгирма тўққиз кунида ўт ичидагинар экану, ўттизинчи куни дам оларкан. Унинг сирини ҳеч ким билмас эмиш. Бир куни раққосанинг таърифини эшишиб, саройга олис юртнинг подшоҳи ташриф буюрибди. Афсуски, ўша куни раққосанинг ўттизинчи – дам оладиган куни экан. Шоҳ раққосага «ўйна!» деб амр қилибди. Ўз подшоҳининг амрини вожиб билган раққоса оловга кириб борибди ва ёниб кетибди. Унинг сири ҳам ўзи билан кетган экан. Бу бир афсона. Аммо ундан олинадиган хулоса шуки, раққоса зиммасига халқ эътиборини қозонишдек масъулиятни олиб, саҳнага чиқар экан, кўзга кўринмас олов ичидаги бўлади. Унинг ҳар бир ҳаракати машақкатли машқларнинг меваси. Озгина хато қилса, дарров сезилади. Шунинг учун рақс ўз ижрочиси олдига кўп талабларни қўяди. Бундай қатъий мезонларда азалий қадрияtlар акс этади.

Яқинда Ўзбекистон Республикаси Маданият вазирлиги томонидан «Ўзбекконцерт» давлат муассасасида «Миллий рақс санъатининг ривожланиш тарихи, долзарб муаммолари ва замонавий концепциялари» мавзусида илмий-амалий конференция ўтказилди. Анжумандан кўзланган мақсад Президентимизнинг 2017 йил 31 майдаги «Маданият ва санъат соҳасини янада ривожлантириш чора-тадбирлари

тўғрисида»ги Қарори ижросини таъминлаш ҳамда ўзбек миллий рақс ва хореография санъатининг таникли намояндалари иштирокида рақс санъатини янада ривожлантиришга қаратилган таклифлар ишлаб чиқиш, энг илғор тажрибаларни оммалаштириш, илмий янгилик ва хуносаларни соҳага изчил жорий этишдан иборат. Конференцияни «Ўзбекконцерт» давлат муассасаси бошлиғи вазифасини бажарувчи Азамат Ҳайдаров ўзбек рақс санъатининг бугунги кундаги ютуқ ва муаммолари тўғрисидаги фикрлари билан очди:

– Ҳозирда Тошкент шаҳрида ўнта давлат ва хусусий рақс ансамбллари мавжуд. Буларда иккى юздан зиёд раққос ва раққосалар фаолият юритади. Қорақалпогистон Республикаси ва вилоятларда ўн олтита рақс жамоалари мавжуд бўлиб, уларда тўрт юзга яқин санъаткор ижод қилмоқда. Шунингдек, А. Наувий, Муқимий, Бердақ номидаги мусиқали театрларда ҳамда Тошкент оперетта театрида

бир юз элликдан ортиқ раққос ва раққосалар, балет артистлари ишлашади. Тошкент давлат рақс ва хореография олий мактабида юзлаб ёшларимиз таълим олмоқда. Биз ишлашни истасак, имконият кўп. Соҳада устоз-шогирд анъаналарида узилиш бўлиб қолганлиги сабабли миллий рақс ўйналишида анчагина хато ва камчиликлар тўпланиб қолган.

Сўнгра Ўзбекистон Республикаси Маданият вазири Бахтиёр Сайфуллаев сўзга чиқиб, ўзбек миллий рақси тарихи, анъаналари ва айни пайтдаги рақс соҳасидаги муаммоларга атрофлича тўхталди.

– Барчамизning хабаримиз бор, жорий йилнинг 3 август куни муҳтарам Президентимиз бир гурӯҳ ижодкорлар билан учрашиб, санъатнинг барча соҳаларида тўхтаб қолган масалаларни кун тартибига кўйди. Хусусан, Ўзбекистон давлат консерваториясининг раҳбарлигини бевосита Маданият вазири бошқариши белгилаб қў-





йилди. Бугун рақс соҳаси ҳақида сўз юритар эканмиз, Уста Олим Комилов, Тамараҳоним, Мукаррама Турғунбоевалар бошлаб берган анъаналар нега йўқолиб боряпти, нега миллий рақсизда оқсанлар кузатилияпти, деган саволларга атрофлича жавоб топамиз ва сизларнинг тақлифларингиз асосида концепция қабул қиласиз, – деди вазир.

Шундан сўнг, Ўзбекистон ҳалқ артисти, балетмейстер Қодир Мўминов, Ўзбекистон давлат консерваторияси профессори Оқилхон Иброҳимов, Ўзбекистонда хизмат кўрсатган маданият ходими, журналист Гулчехра Умарова, санъатшунос Аҳмаджон Раҳимов сўзга чиқиб, соҳадаги муаммоларни бартараф этиш юзасидан ўз таклиф ва мулоҳазаларини билдирилар.

Ёқимли куй ва қўшиқ қалбга кириб борар экан, вужудга ҳам ўз таъсирини ўтказади. Куйга монанд тебраниб тинглаймиз. Агар шўҳроқ қўшиқ бўлса, беихтиёр бармоқлар ҳаракатга келади. Бу маънода ҳар кимнинг ўз усули бор. Кимдир бармоғини столга уриб тингласа, кимдир астойдил берилиб рақс тушади. Рақс... бу катта масала. Этнографлар рақснинг келиб чиқиши масаласида турлича фикрлар билдиришади.

– Марказий Осиё, жумладан, Ўзбекистон ҳудудида топилган қоятош тасвирлари, археологик топилмалар бу ерда рақс жуда қадимий илдизларга эгалигидан гувоҳлик беради. Зардўшийликнинг китоби «Авесто»да ҳам

рақс хусусида маълумотлар бор. Ўзбек миллий рақслари мазмунига эътибор берсак, ҳар бир ҳаракат маълум маънони ифодалashi лозим. Қадам товуши ҳам, бармоқлар ҳам, кўз қарашлар ҳам «сўзлаб» туради, – дейди «Ўзбекконцерт» давлат муасасаси масъул ходими Матлуба Маҳкамова.

Яқинда Россия телевидениесининг «Голос» кўрсатувида бир қиз чиқиб, хоразмча рақсга тушиб, ҳақамлар олқишига сазовор бўлди. Бироқ ўзини тошкентлик Диана деб таништирган бу қиз чиқиши олдидан «Афсуски, Тошкентда рақсга муносабат яхши эмас», деб интервью берди. Бoshига дўппи, елкалари очиқ қора кўйлак кийиб олган бу қизгина ўз либосини ўзбек миллий кийими деб атади. Рақс ҳаракатларининг маъносини эса пахта тераётган қиз деб баҳо берди. «Лазги»нинг маъноси пахта терими эканини бу қиз қаердан олди экан? Тўғри, бу масалада Дианани айбламаймиз. Чунки рақснинг асл маъносини тушунмай, бундай танловларда кўпчилик иштирок этади. Унинг рақс соҳасида билдириган фикрига ҳам ўзимиз сабабчимиз. Чунки ёшлар телевизор орқали клиплар ва яккахон қўшиқларга ижро этилаётган рақсларни томоша қилишади. Бундай томошалар рақснинг инқиrozини кўрсатиб туради. Шунинг учун соҳада жиддий ўзгариш қиладиган вақт келди.

– Ўзбек миллий рақс санъати уч йирик ўйналишга бўлинади, – дейди Ўзбекистон ҳалқ артисти Қизлархон Дўст-

муҳаммедова. – Хоразм, Бухоро ва Тошкент-Фарғона усулларининг ҳар бурида кўплаб тармоқ рақслар мавжуд. Ўзбек рақсида ҳар бир ҳаракатнинг ўз моҳияти бор. Буларни пухта ўрганиб, рақс санъатини моддий манфат воситаси эмас, санъат деб билган одамгина ҳақиқий раққоса сифатида ҳалқ меҳрини қозонади. Рақс қўшиқни тўлдирувчи омил эмас, қўшиқ ва куй рақс учун хизмат қилиши керак. Бир пайтлари оммалашган «Чўпон қиз», «Пилла», «Тановор»ларда битта ҳаракат ўзгарса, дарров сезиларди. Бугунги рақслар қоришиқ ва бир-бирига ўхаш ҳаракатлар жамланмаси бўлиб қолмоқда. Ўйлайманки, бугун қабул қилинадиган концепция соҳада улкан бурилиш ясади.

Баҳс ва мунозаралар билан танқидий руҳда ўтган конференция ёш раққосалар учун катта сабоқ бўлди. Ҳар бир рақс гуруҳига рақс санъатининг даргалари Малика Аҳмедова, Рушана Сultonova, Дилафрўз Жабборова, Маъмурда Эргашева, Қизлархон Дўстмуҳаммедова сингари устозлар маслаҳатчи сифатида бириктирилиб, уларнинг назоратидан ўтган асарларгина саҳнага олиб чиқилиши, Тошкент Миллий рақс ва хореография олий мактаби учун янги адабиётлар, услубий қўлланмалар ишлаб чиқилиши белгилаб қўйилди. Конференциянинг концепцияси қабул қилинди.

## Сабоҳат ТЎХТАБОЕВА



# Taronalar Sharqdan taralar...



«Шарқ тароналари» XI ҳалқаро мусиқа фестивали жуда юқори савияда ўтказилди. Президентимиз Шавкат Мирзиёевнинг анжуман очилишида шахсан қатнашиб, иштирокчиларга табрик ўйллагани фестивал иштирокчиларини, ҳалқимизни, юртимизга келган меҳмонларни хурсанд қилди. Нуфузли санъат анжумани иштирокчиларининг ҳис-ҳаяжонларини уларнинг сўзларидан ҳам англаш мумкин.

**Сашар ЗАРИФ, ЙОРК университети профессори (Канада):**

— Эронда туғилганман. 11 ёшимдан Канадада яшайман. Рақс этнографияси бўйича мутахассисман. «Шахснинг шаклланишида рақснинг роли» мавзусида докторлик ишимни ҳимоя қилдим. Ўрта Осиё, Кавказ ҳалқлари, Эрон ва Шимолий Африкадаги сўфийлик рақси эксперти ҳисобланаман. 2012 йилда Англия қыроличаси Елизавета II томонидан санъат тарихини ўрганишдаги хизматларим учун олмос медал билан тақдирланганман.

2011-2013 йилларда «Шарқ тароналари» фестивали доирасида ўтказилган конференцияларда иштирок этганиман. Бу галги илмий анжуманда «Замонавий шароитда анъанавий қадриятлар ҳақида музокара ўтказиш» мавзусида маъруза қилдим. Уни йиғилиш қатнашчилари қизиқиш билан қабул қилишди. Мен бу галги ташрифимда жуда кўп маълумотларга эга бўлдим, музокараларда иштирок этдим.

Фестивал жуда юқори савияда ташкил қилинган. Истардимки, хорижлик меҳмонлар мана шу олган бебаҳо таассуротларини ўз юртларида кўпроқ тарғибот қилишса. Токи бундай бетакрор анжумандан бутун дунё ахли баҳраманд бўлсин.

**Тоби КУН, хонанда (Франция):**

— Бизнинг «Трио» гурӯҳимизни чин маънода ҳалқаро гурӯҳ дейиш мумкин. Сабаби — мен Францияданман, Петра Словениядан, Алекс эса Словакиядан. Уч ярим йилдан бери биргаликда ишлаб келяпмиз. Биз фольклор оҳанглардан фойдаланган ҳолда, уларни замонавий куйлар билан уйғуллаштиришга ҳаракат қилияпмиз.

Самолётдан тушган пайтимдаёқ Ўзбекистонга нисбатан кўнглимда қандайдир илиқ ҳис пайдо бўлди. Одамларнинг очик чехраси, самимий муомаласидан хурсанд бўлдик. Келажакда яна Ўзбекистонга келиш ниятимиз бор.

**Хариё ИНОЯ, мусиқашунос (Япония):**

— Мен дунёning кўплаб мамлакатларида ўтказилган мусиқа фестивалларида, турли анжуманларда қатнашганман. Бироқ «Шарқ тароналари» даражасидаги юқори савияли форумлар бармоқ билан санаарли. Самарқандада ўтказиладиган анжуманнинг энг аҳамиятли томони шундаки, унинг очилиш маросимида мамлакат Президенти қатнашади. «Шарқ тароналари» иштирокчиларига ўзининг тилакларини ўйлайди. Шавкат Мирзиёевнинг самими сўзларидан барчамиз хурсанд бўлдик.

Очилиш маросими менда катта таассурот қолдирди. Таъкидлашим жоиз, дастур давомида ўзбек санъаткорлари билан бир қаторда грузиялик ва тажикистонлик санъаткорларнинг ҳам чиқиш қилгани алоҳида эътиборга молик воқеа бўлди. Шунингдек, европалик санъаткорлардан иборат «Трио» гурӯҳининг чалган куйлари тадбирга ўзгача шукуҳ бағишлиди.

Шу ўринда ўзбек санъати ҳақида гапирмасам бўлмайди. Ўзбек мусиқаси ўзининг жозибадорлиги, тарбиявий аҳамиятга эга эканлиги ҳамда замирида кучли фалсафа мужассамлиги билан бошқа ҳалқлар санъатидан ажраби туради.

Орадан неча минг йиллар ўтган бўлса ҳам, ўзбек санъати асло ўзгармаган. Тарихийлигини, ўзининг кучли мазмун-моҳиятини ҳамон сақлаб келмоқда. Бунинг асосий сабаби ўзбек ҳалқининг фидойилиги десам, асло хато қилмаган бўламан.

**Палван ҲАМИДОВ, Туркманистон ҳалқ артисти, баҳши:**

— Туркманистонлик мусиқачилар «Шарқ тароналари» ҳалқаро мусиқа фестивалида доимий равишда иштирок этиб келади. Бу гал мазкур нуфузли анжуманда бизнинг гурӯҳимиз қатнашашётганидан баҳтиёрмиз.

Самарқандга келишдан олдин Бухорога ҳам бордик. Ўзбекистонда тарихий ва замонавий бинонларнинг ажойиб ўйғунлиги яратилган экан. Бизни жуда илиқ кутиб олишди. Меҳмондўстликнинг юксак намунасини айнан юртингизда кўрдик.

«Шарқ тароналари» ҳалқаро мусиқа фестивали Ўзбекистоннинг Биринчи Президенти Ислом Каримов ташабуси билан йўлга қўйилгани ҳақида гапириб беришиди. Ислом Абдуғаниевич ҳам, Шавкат Мизиёев ҳам санъатга меҳр қўйган раҳбар эканлиги Ўзбекистон ҳалқининг баҳти десам, асло муболага қилмаган бўламан. Ўз навбатида,

бизнинг президентимиз Гурбангули Бердимухамедов ҳам санъатнинг асл шайдоси.

Ўзбек ва туркман халқлари бир неча минг йиллардан бери яқин қўшничилик алоқаларини сақлаб келмоқда. Санъат тимсолида бу алоқалар янги даражага кўтарилади, деб умид қиласман.

**Френки СУРЯДАРМА, ҳайъат аъзоси (Индонезия):**

— Ўзбекистон билан илк хотираларим узоқ йилларга бориб тақалади. Индонезиянинг биринчи президенти Сукарно ўтган асрнинг 50-йилларида собиқ иттифоқ раҳбари Хрушчёв томонидан таклиф қилинади. Ўшанда Сукарно Имом Бухорийнинг қабрини зиёрат қилиш имкони бўлган тақдирдагина боришини айтади. Шундан сўнг Сукарнонинг истаги амалга ошади. Ўшанда Имом Бухорийнинг ким эканига қизиқиб, юрtingиз тарихи ҳақида етарлича маълумотларга эга бўлганман.

Ўзбекистон тарихий обидаларга бой юрт. Бу ерга учинчи марта келишим. Самарқандда ўтказиладиган «Шарқ тароналари» халқаро мусиқа фестивалининг жаҳонда нуғузи жуда юқори. Таъкидлаш жоиз, мазкур фестивалда қатнашиш ҳар бир санъаткор учун олтин имкониятдир. Мен бу ерда дунёнинг турли бурчакларидан келган мусиқачиларнинг миллий куй-қўшиклиарини тинглашга муваффақ бўлдим. Бу эса ўзим Индонезияда ўтказадиган «Тоража» халқаро фестивалини янада такомиллаштиришимиға ёрдам берди. «Шарқ тароналари» иштирокчилари ни ўз фестивалимга ҳам таклиф қилдим. Испаниялик Ана Алкаиде билан ҳам айнан Самарқандда танишганман. У ҳам «Тоража» фестивалида иштирок этган.

Мен ўзбекистонлик мусиқашунослар билан алоқаларимни янада мустаҳкамлаш, ўзбек ва индонез халқлари ўртасида ўзаро мусиқа алмашинувини йўлга қўйиш ниятидаман. Ўзбекистондан икки гурӯхни ўз фестивалимга таклиф қилдим. Улар ўз санъатини Индонезияда ҳам кўрсатиш имконига эга бўлади.

**Жина ЧАВЕЗ, хонанда (АҚШ):**

— Юрtingизга келишдан олдин ўзбек санъатини имкон қадар ўрганишга ҳаракат қилдим. «Ялла» гурӯхи ва Сардор Раҳимхон томонидан кўйланган қўшиқлар менга ёқиб қолди. Уларнинг матнини ёд олиб, ўзбек томошабин-

лари учун куйлаб беришни мақсад қилгандим. Лекин бу даражада зўр қарши олишади деб ўйламагандим. Томошабинлар бизни тинимсиз олқишлиб туришди, рақсга ҳам тушишди.

Энг қувонарлиси, бу ерга келганимдан кейин менга ўзбек миллий матоси — атласдан тайёрланган лиbos совға қилишди. уни кийганимда ҳақиқий ўзбек аёлига ўхшаб қолганимни айтишди. Мақтовлардан жуда хурсанд бўлдим. Ўзбек халқининг санъати, маданияти ва либослари дунёда тенги йўқ, умуман ўзгача услубда экан. Мен ўзим учун тамоман янги дунёни кашф этдим.

**Хуан Антонио ВАСКЕС (Испания):**

— Ҳамкорим Арасели Изигаре билан биргаликда Mundofonias радиосини ташкил қилганимиз ва мен бу ерда бош муҳаррир бўлиб ишлайман. Бизнинг радиомизда мусиқий дастурлар учун ўрин ажратилган ва «Шарқ тароналари» халқаро мусиқа фестивалида жаранглаган куй-қўшиклар доимий равишда берилади.


«Шарқ тароналари» халқаро мусиқа фестивали жаҳон маданиятларини бирлаштираётган, санъаткорларга ўзаро ҳамкорлик қилиш, фикр алмашиш учун имконият яратиб бераётган нуғузли анжумандир.

Самарқанд азалдан дунё маданиятларини бирлаштирувчи марказ бўлиб келган. Бу тарихий шаҳар ҳақида анча олдин эшитганман ва бу ерга келиш истагим кучли эди. Айнан «Шарқ тароналари» фестивали сабаб ниятим амалга ошганидан баҳтиёрман.

**Соҳиб ПОШШОЗОДА, Гран-при соҳиби (Озарбайжон):**

— Жаҳоннинг энг нуғузли фестиваларидан бири саналадиган «Шарқ тароналари»да қатнашишнинг ўзи катта баҳт, аслида. Анжуманинг бош совринига эга бўлганим ҳам кутилмаган, ҳам ўта қувончли ҳодиса бўлди. Бундай пайтда қалбингдаги барча хиссиятларни айтиб беришинг қийин. Мен Ўзбекистонда ўзимни ўз уйимдагидек хис қилдим. Ўзбек халқи чиндан ҳам санъатсевар халқ экан. Фурратдан фойдаланиб, менга юксак эҳтиром кўрсатган юртга ва унинг халқига ўз ташаккуримни айтмоқчиман.

Темур АЪЗАМ





Энахон СИДДИҚОВА,  
Ўзбекистон халқ шоири



# Yuragimda gullay

## boshlar haqajonlar

### ОНАЖОНЛАР

Болаликнинг соғинчидаги дил ҳапқириб,  
Юрагимда гуллай бошлар ҳаяжонлар.  
Кўнглидаги орзуларин ипак қилиб,  
Супчаада дўпли тикар онажонлар.  
Девор оша анграяди қантак ўрик,  
Кумонда сув биқирлайди холи куриб.  
Чолгинамга деб пахтали тўнми, қийик,  
Супчаада дўпли тикар онажонлар.  
Беланчакни тебратади кўхна қўшиқ,  
Тебранади Алномишдан қолган бешик.  
Гулларига яратганинг ишқи тушиб,  
Супчаада дўпли тикар онажонлар.  
Битдими, деб күёш халак келар тикка,  
Тарс ёрилар анорларнинг пўсти юпқа,  
Чиқса ҳамки ғалвир сўраб, ё элакка,  
Супчаада дўпли тикар онажонлар.  
Дунёларнинг дардларини аритгандай,  
Армонларин, аламларин қаритгандай,  
Вақтнинг ўзғир тулпорларин ҳоритгандай,  
Супчаада дўпли тикар онажонлар.  
Меваси бол ишкомларнинг соясида,  
Ўзлари ҳам худойимнинг соясида.  
Дейсиз жаннатларнинг пиллапоясида,  
Супчаада дўпли тикар онажонлар.

### ЭЙ ДЎСТ...

Эй дил, дунёсига басдир юришинг,  
Кўнгилни кўнгилга бурмоққа ўргат.  
Дунёсининг кўнгил билан йўқ иши,  
Ўзни эзгу йўлга юрмоққа ўргат.  
Оёғингда ётган чўпни ўпиб қўй,  
Жонингни элингга минг бор тикиб қўй,  
Хеч йўқса бир дилга ниҳол экиб қўй,  
Ёмонни яхши-ла сурмоққа ўргат.  
Ориятдан бўлсин қалъянг, қўргонинг,  
Номус, ордан тикла кўнгил маконинг,

Ўзингники бўлсин шарафинг, шонинг,  
Ўз баҳтингни ўзинг курмоққа ўргат.  
Қиличлар дамини қайтаргувчи бўл,  
Ҳатто кундада ҳам кўкаргувчи бўл,  
Ўз юртингни юксак кўтаргувчи бўл,  
Кўнгил кўзи билан кўрмоққа ўргат.

### ЭШИК ЧЕРТИЛАДИ...

Эшик чертилади...  
Ҳапқирап юрак,  
Ҳаяллаб бўлса ҳам келдимикан  
Бахт?!  
Балки олиб тушган кўқдан фаришта  
Кўнглимга бир ёрлиқ, ҳақдан иноят.  
Эшик чертилади...  
Вақтдир бу балки,  
Бевақт юрагимни тақиллатётган.  
Бесамар йилларнинг армони каби  
Кўнгилни занглатиб, зил босиб ётган.  
Эшик чертилади...  
Тураман беҳол.  
Балки олма отаётир дов-дараҳт.  
Балки удир... ишқимни қилган увол,  
Айро йўлда ташлаб кетган  
Муҳаббат!  
Эшик чертилади...  
Узоқ куттирмай,  
Балки дўст келгандир ўзи чопарга.  
Кўнгил билан, ҳеч кимга айтмай,  
Отланамиз ёруғ сафарга.  
Эшик чертилади...  
Англатгил, ё раб,  
Мени уйғотгучи сирли лаҳзадир.  
Кимни рози қилдим дунёда яшаб,  
Шу савол олдида юрак лағчадир.  
Балки эшик қоқар, қиласи исён,  
Бўғзимга қадалиб йиғлаётган сўз.  
Бесамар кетдими умр сафарим,



Ахир, манглайимнинг ёзиғида куз.  
Эшик чертилади...  
Очаман аста.  
Қарогимда сизиб, қотиб қолар ёш.  
Остонамда турар ҳорғин, хижолат –  
Мен кутмаган дўстдай кулиб  
Олтмиш ёш.  
Эшик чертилади...

\*\*\*

Болталар зарбидан вужуди карахт,  
Кесилган танида бир илоҳий шаҳд,  
Тўмтоқ қўлларини чўзиб, ростлар қад,  
Тилаклари ҳаққа етгандир.  
Илдизлари зирқирап нолон,  
Ҳар бандидан оқиб мунг, армон,  
Бужур тани кўтарар исён,  
Сўнгаклари ҳаққа етгандир.  
Бутогида күшчалар зори,  
Дийдасида зулм залвори,  
Кундаларнинг заҳми озори,  
Юраклари ҳаққа етгандир.  
Бошсиз қолган чавандоз каби  
Арш-аълога етади доди,  
Ҳақ дегани қўллайди раббим,  
Истаклари ҳаққа етгандир.  
Худди солим бир миллат каби  
Бир эл каби сафланар яқдил,  
Гўё жангга кирар баҳодир,  
Куртаклари ҳаққа етгандир.  
Ҳар бутоги банди бандидан  
Бош кўтарар минг битта новда,  
Бундай алпллик келмас бандангдан,  
Япроқлари ҳаққа етгандир.  
Шундан ипак бўлар япроги,  
Бешик бўлар новда, бутоги,  
Най бўлади, дутор бўлади,  
Дилни ўртар «Чўли ироғи».  
Муножотим, раббим, илтижом,  
Бир дараҳтдай мени қўллаб қўй.  
Мендай ожиз, бедаст бандангни  
Эна тутта айлантириб қўй!

### ГАРЧАНД

Гарчанд бунда сўймоқ, куймоқ дарди кам ...  
Ҳ.Худойбердиева.

Гарчанд бунда сўймоқ, куймоқ дарди кам,  
Бўлса ҳам бу элнинг ғамига эмас.  
Гарчандки бўлсада мағур, бошлар хам,  
Бу юртнинг қайғуси, камига эмас.  
Гарчанд бунда сўймоқ, куймоқ дарди кам,  
Бўлса ҳам зар, тилла тошларга халос.  
Гарчанд кўзда ёшлар, гарчанд кўзлар нам,  
Қориннинг қайғуси, ошларга халос.  
Гарчанд бунда сўймоқ, куймоқ дарди кам,  
Гарчанд ҳамма нарса тўкину сочин.  
Қўнгилларнинг қасри беармон, бекам,  
Мухаббатдан бошқа барча нарса чин.  
Гарчанд бунда сўймоқ, куймоқ дарди кам,  
Бегамлик касридан ким ҳам ўлиби.

Шайтони лайнни пир тутганилар ҳам  
Элдан баланд, ғамдан йироқ юрибди.  
Гарчанд бунда сўймоқ, куймоқ дарди кам,  
Гарчи эл ғамисиз улуғмас беклар.  
Гарчи бек бўларлар қайғуси мардлар,  
Гарчи юрга керак журъати тиклар.  
Гарчанд бунда сўймоқ, куймоқ дарди кам ...  
Сен биласан бир кун келар ЭРК,  
Томирингда улғаяр исён.  
Яна гуллай бошлайсан ғолиб,  
Озодликдан кўнглинг нурафшон.

### СЎЗНИНГ УСТИДА ТУРАР...

Ким айтар, бу чархи дун ҳўқиз устида туар,  
Ким айтарки, тафаккур, тамиз устида туар,  
Ҳақнинг дастида олам, зарра иштибоҳим йўқ,  
Оҳ тортсам, икки дунё сўзнинг устида туар.  
Гаҳи зил дарди янчиб, дил устида тургандай,  
Бўғзида фарёд, доди тил устида тургандай,  
Аё, чархи қажрафтор қил устида тургандай,  
Икки купоч тупроғу бўзнинг устида туар.  
Қўнгилгамас, минг қўйли бойларига чопдик биз,  
Мунглиғамас, зўрларга зарбоф чопон ёпдик биз,  
Муттаҳамни пир тутиб, дарвозасин қоқдик биз,  
Аё, Бахт бир кафт ҳалол тузнинг устида туар.  
Бу жон қалқиб турибди фурсатнинг камонида,  
Айирмасин иймондан умримиз поёнида,  
Шафақнинг қадаҳидан тўқил ишқ туғёнида,  
Дунё ишқа чўкилган тизнинг устида туар.  
Аё, дўст, юрагимга увлаб кирар хавотир,  
Тошларни муштлаб-муштлаб дарёлар кетаётir,  
Ишқ кетган юраклардан чаккалар ўтаётir,  
Бу дунё қалқиб гўё музнинг устида туар.  
Жонимнинг устидадир, Ватан, шону шарафинг,  
Иймоннинг устунидир ҳар валий, ҳар салафинг,  
Кўзимга тўтиёдир ҳар чўпинг, ҳар тарафинг,  
Ўзбекистон – жаннатим кўзнинг устида туар.  
Огоҳсан, аё, умр кун ботарга оғанда,  
Бир тушдек экан дунё, ўтар киприк қоқданда,  
Дўстлари кўзин очиб атрофига боқканда,  
Онагул кетар йўлда – кузнинг устида туар.  
Оҳ тортсам, икки дунё сўзнинг устида туар...

\*\*\*

Бир тутам нур, умиду илинж,  
Бир дараҳтдай паноҳинг бўлгич,  
Эшитгучи ғуссаи дардинг,  
Бўлмаса гар битта ғариб дўст,  
Ҳеч бўлмаса душмани мардинг,  
Мен қандайин яшайнин, Дараҳт?!





## TAFAKKURGA ASOSLANGAN MULOQOT

2017 йил мамлакатимизда «Халқ билан мuloқot ва инсон манфаатлари йили» деб эълон қилинди. Йил номига илмий нуқтаи назардан ёндашсак, унинг пухта ўйланган асосларини кўрамиз. Президентимиз Шавкат Мирзиёевнинг қуйидаги сўзлари замирида бу йил номининг мазмун-моҳияти ўз ифодасини топган: «Аввало, «Халқ билан мuloқot ва инсон манфаатлари йили»нинг асосий мақсад ва вазифаларидан ке-либ чиққан ҳолда, давлат органларининг фуқаролар билан ўзаро муносабатлари юзасидан ёндашувни тубдан қайта кўриб чиқиш зарур. Бу борада аҳоли билан доимий мuloқot қилиш, уларни қийнаётган муаммоларни ҳал этишнинг янги механизмлари ва са-марали усуулларини жорий этишимиз даркор».

Халқ билан мuloқot – жамоатчилик билан алоқалар асосида жамиятни бошқариш масаласи узоқ ва бой тарихга эга. Унинг ижтимоий соҳа сифатида шаклланишида Шарқ мамлакатлари алломалари салмоқли ҳисса кўшганлар. Улуғ аждодларимиз қадимда фикрлар хилма-хиллигига, демакки, жамоатчилик билан алоқалар масаласига жиддий эътибор билан қараганлари қатор мақолларда ҳам ўз аксини топган. Кўпдан кўп фикр чиқади: «Маслаҳатли тўй тарқамас», «Етти ўлчаб бир кес», «Оталар сўзи – ақлнинг кўзи» каби мақоллар замирида фикрлашмоқ, маслаҳатлашмоқ, ахборот алмашмоқ, халқ билан мuloқot қилмоқ каби маънолар мужассам.

Қадимда мутафаккир аждодларимиз халқ билан мuloқotнинг амалий ифодаси ҳисобланмиш маслаҳату машварат масаласига алоҳида эътибор билан қараганларини тарихий манбалардан ўқишимиз мумкин. Соҳибқирон Амир Темур «Давлат ишларининг тўққиз улуши кенгаш, тадбир ва машварат» билан амалга оширганини таъкидлайди. Демак, халқ билан мuloқotга оид фан сирларини, унинг тарихий илдизларини буюк бобокалонларимизнинг меросларидан ҳам ўқиб-ўрганиш мақсадга мувофиқдир.

Халқ билан мuloқot – жамоатчилик билан алоқалар масаласига дунё миқёсида катта қизиқиш ва эътибор билан қарапади. Унинг ҳам замонавий илмий асослари яратилган. Бу инглиз тилидан олинган

«Public Relations» (PR) яъни, «Жамоатчилик билан алоқалар» – «Халқ билан мuloқot» фани ҳисобланади.

Жамоатчилик билан алоқалар илмий асосланишида америкалик олим Эдвард Бернайзнинг 1923 йилда чоп этилган «Жамоатчилик фикрининг кристаллашуви» дарслиги мұхим ўрин тутади. Шу ўринда айтиш жоизки, халқ билан мuloқot назариётчиларининг аксарияти турли соҳа олимлари бўлиб, улар бу масала га кўпроқ ишлаб чиқариш, иқтисодиёт, менежмент, сиёсий ва бошқа ижтимоий фанлар нуқтаи назаридан ёндашганлар.

Жамоатчилик билан алоқаларнинг асосий мақсаду моҳияти халқ билан мuloқotни илмий равиша үйлга қўйиш ва уни самарали амалга оширишдан иборат. Ҳаёт воқелигига айланган ана шу фанни сўнгги ўн йилликларнинг ажойиб топилмаси дейиш мумкин. Амалиётда эса у ҳар бир соҳа тараққиётига хизмат қиласди.

Жамият тараққиётида мұхим омил ҳисобланган халқ билан мuloқotни назарий жиҳатдан ўрганиш мақсадга мувофиқдир. PR фани асосчиларидан бири Эдвард Бернайз бу ибора моҳиятини «Жамият манфаатлари йўлидаги ҳаракатдир» деб таърифлаган. Демак, халқ билан мuloқot қилиш шу жамиятнинг ҳар томонлама ривожланишига кўмаклашади.

Ҳукумат ё бирор ташкилотнинг жамоатчилик билан алоқаларини амалга оширишда оммавий ахборот воситалари мұхим ўрин тутади. «Матбуотнинг ижтимоий моҳияти, асосий функциялари нуқтаи назаридан қараганда, унинг яна бир хусусияти – жамоатчилик фикрининг ифодачиси эканлигига яқол кўринади, – деб ёзади Мирзо Улугбек номидаги Ўзбекистон Миллий университети журналистика факультети профессори, филология фанлари доктори Мухтор Худойкулов. – Матбуот жамиятнинг ижтимоий-сиёсий, иқтисодий ва маданий-маънавий ҳаётини акс эттирар экан ҳамда ижтимоий борлиқ билан ижтимоий онгнинг бир-бирига таъсир кўрсатишида фаол ҳаракат этувчи омил вазифасини бажарар экан, бу борада жамоатчилик фикрига таяниб иш кўради».



Тараққийпарвар мамлакатларда ҳукумат, нодавлат ташкилотларининг фаолиятлари жамоатчилик билан алоқалар асосида ташкил этилади. Испан файласуфи ва публицисти Орtega Гассет ёзганидек, «Дунёни жамоатчилик фикри бошқаради». Юртимизда ҳам аксарият идора ва ташкилотларнинг фаолиятлари жамоатчилик билан алоқалар асосида ташкил этилмоқда.

Бугунги кунда жамоатчилик билан алоқалар масаласи муҳим ижтимоий воқеликка айланган экан, барча соҳаларга дахлдор бўлган бу фан мөҳиятини теран англамоқ учун, аввало, мутахассислар билан мулоқот ўрнатиш зарур. Масалан, қишлоқ ва сув хўжалигини ривожлантиришни истаган киши дастлаб шу соҳа мутахассислари, дехқон-фермер хўжалиги вакиллари билан, оммавий ахборот воситаларини ҳақиқий ҳаёт кўзгусига айлантириш учун журналист олимлар, ижодкорлар билан мулоқот қилиши мақсадга мувофиқидер.

Юртимизда ҳалқ билан мулоқот йўналишида олиб борилаётган тадқиқот ва изланишлар ўз самарасини кўрсата бошлади. Эндиликда юртимиздаги олий ўкув юртларида бу фан талабаларга чукур ўргатилмоқда. Мирзо Улуғбек номидаги Ўзбекистон Миллий университети журналистика факультети Жамоатчилик билан алоқалар назарияси ва амалиёти кафедраси профессор-ўқитувчилари ҳам бу мавзуда тадқиқотлар олиб боришмоқда.

Жамоатчилик билан алоқаларнинг муҳим шартларидан бири – икки томонлама фикр эшитиш ҳисобланади. Яъни, бир томондан, аввало, ташкилот вакиллари ўз фикрлари, режалари билан таништирса, иккинчи томондан, жамоатчиликнинг унга нисбатан муносабатини тинглаш талаб этилади. Ҳалқ билан мулоқотнинг назарий асосларидан бири шу!

Фикр бир тарафдангина айтилса, у мөҳиятан бирёзлама тарғибот бўлиб қолади. Ҳалқ билан мулоқот амалиётида идора ва ташкилот вакилларининг одамлар фикрини тинглаб, хулоса чиқариши муҳим ўрин тутади. Жамоатчилик фикрини ўрганиш – ҳалқ билан мулоқот жараёнида муҳим мезон ҳисобланади.

Давлат бошқарув органлари ва аҳоли, жамоатчилик, бизнес, ишлаб чиқарувчилар ва истеъмолчилар, шахслар ҳамда ижтимоий гуруҳлар ўртасида алоқалар тақомиллашиб боришида ҳалқ билан мулоқот ғоят муҳим мезон ҳисобланади. У демократия равнақ топган мамлакатлардагина ўз самарасини кўрсатади. Айни вақтда ҳалқ билан мулоқот демократияни ривожлантиришга ҳам хизмат қиласди.

Ҳалқ билан мулоқотнинг мазмуни, шакли, мақсад ва вазифалари аниқ. Буни Президентимиз Шавкат Мирзиёев ташаббуси билан ишлаб чиқилган 2017–2021 йилларда Ўзбекистон Республикасини ривожлантиришнинг бешта устувор йўналиши бўйича Ҳаракатлар стратегияси лойиҳаси кенг жамоатчилик ўртасида муҳокама қилингани мисолида ҳам кўриш мумкин. Дастуриламал сифатида қабул қилинган ушбу ҳужжат мамлакатимизни истиқболда янада тараққий топтиришнинг асосий йўналишларини белгилаб беради. Ўзбекистон Республикаси Олий Мажлиси Қонунчилик палатаси ва Сенати, Ўзбекистон

Электрон оммавий ахборот воситалари миллий асоциацияси, Ахборот технологиялари ва коммуникацияларини ривожлантириш вазирлиги ҳамда қатор ташкилотлар ҳамкорлигига жорий йилнинг бошида Ҳаракатлар стратегияси лойиҳасини ўрганиш ва муҳокама қилишга багишлиган медиа-ҳафталик ўзига хос мулоқот минбарига айланди.

Бешта асосий йўналишдан иборат бўлган мазкур Ҳаракатлар стратегияси лойиҳаси юртимизда кечётган ислоҳотлар самарадорлигини янада ошириш, давлат ва жамият ривожини янги босқичга кўтариш, ҳаётнинг барча соҳасини либераллаштириш, мамлакатимизни модернизация қилиш бўйича энг муҳим устувор йўналишларни амалга ошириш мақсадида ишлаб чиқилган. Лойиҳа Норматив-хуқуқий ҳужжатлар таъсирини баҳолаш тизими порталида фуқароларни ўйлантираётган долзарб масалалар, аҳоли кенг қатлами фикр ҳамда таклифларини комплекс ўрганиш мақсадида жойлаштирилган. Юртдошларимиз шу ҳужжат йўналишларидан келиб чиқиб, ўз таклиф ва мулоҳазаларини фаол равишда билдиришмоқда.

Ҳалқ билан самарали мулоқот ўрнатиш, давлат ҳокимияти ва бошқаруви органлари фаолияти очиқлигини таъминлаш, давлат хизматлари сифатини ошириш ислоҳотларнинг асосий омили сифатида белгиланган. Жамоатчилик назоратини олиб боришининг шаклларини ривожлантириш, ижтимоий шерикликнинг самарасини кучайтириш, фуқаролик жамияти институтларини ривожлантириш, уларнинг ижтимоий ва сиёсий фаоллигини юксалтириш биринчи устувор йўналишни амалга оширишда муҳим ўрин тутади. Ҳаракатлар стратегиясининг барча йўналишлари тақдимотларидан сўнг мунозаралар ташкил этилди. Унда билдирилган фикр-мулоҳазалар ва таклифлар ўрганилди. Мазкур ҳужжатнинг жамоатчилик, шу жумладан, оммавий ахборот воситалари иштироқида кенг муҳокама этилиши аҳолининг барча қатлами манфаатларини инобатга олишга хизмат қиласди. Албатта, ушбу стратегиянинг қабул қилиниши Ўзбекистоннинг кейинги беш йиллик тараққиётини белгилаб беради.

Мутахассисларнинг фикрича, ошкоралик, ҳақиқат, самимийлик бўлган жойдагина ҳалқ билан мулоқотга ва ўзаро ишончга эришиш мумкин. Ҳалқ билан мулоқот – давлат бошқарув органлари, ташкилотлар, қонун чиқарувчи ҳамда ижро ҳокимиятлари ва жамоатчилик ўртасида алоқа ўрнатишга ёрдам беради.

Одамлар билан мулоқот қилиш натижасида давлат ва жамият, ишлаб чиқарувчилар ва истеъмолчилар орасида мустаҳкам муносабат қарор топади. Бу алоқа – фикр алмашиш, ахборот олиш ва тарқатиш билан изоҳланади. Шу тариқа ҳалқ билан мулоқот жамиятни ҳар томонлама ривожлантиришда муҳим омил бўлиб хизмат қиласди.

Хулоса ўрнида айтиш жоизки, ҳар қандай идора ва ташкилотнинг ҳалқ билан мулоқоти илмий асосда ўйлга қўйилса ва тақомиллаштириб борилса, у албатта ижобий самарасини кўрсатаверади.

Тўлқин ЭШБЕКОВ,  
Ўзбекистон Миллий университети доценти

# **YURT CHEGARASI**

## qaşerdan boshlanadi?

«Чигатой» қабристони. Абдулла Ориповни тупроққа топшириб қайтдик. Йўлнинг нариги бетида, бекатдан тўрт одимча берироқда ойнаванд шириналлар дўкони күёшда ярқ этиб кўзга ташланади. Пешонасига катта ҳарфларда «Вкусняшка» деб ёзиб кўйилган.

Бу жойлар – Эски шаҳар, пойтахтнинг энг кўхна масканларидан. Қадим Тошкентнинг ўн икки дарвозасидан бири «Чигатой дарвоза» шу ерда бўлган. Қассоблари, ошпазлари, новвойлари азалдан машхур. Ҳозир ҳам уйлар ўша-ўша, одамлар ўша-ўша. Ўтмиш билан бугун тулашган бу манзилнинг қоқ ўртасида русча пешлавҳанинг қаққайиб туриши жуда ғалати кўринади. Бошқа тилда ёзилганидан кўра ким учун мўлжаллаб ёзилгани мени кўпроқ ҳайрон қолдирди. Қиёфалари, турмуш тарзи, шеваларида тарих шульалари жилваланиб турган маҳалла аҳли учун шириналлар дўконининг номи сув сатҳида қалқиб турган томчи мой каби «ўгай».

Бир умр она тилини шарафлаб ўтган шоир эса қирмизи ғиштили қабристон девори оша:

**Она тилим, сен борсан, шаксиз,  
Булбул куйин шеърга соламан.  
Сен ўқолган кунинг шубҳасиз  
Мен ҳам тўти бўлиб қоламан.**

дея гёё ҳамон нидо қилмоқда...

Тарқалишдик. Ишхона томон йўл солдим. Кўчанинг чап қанотида бир тўйхона савлат тўкиб туриди: «Регистон». Қандай улуғвор ва азиз ном! Ўз-ўзидан кўнгил тортади. Биргина сўз унга нечогли файз баҳш этган. Шу сўз туфайли у тантаналар ўтказиладиган рисоладаги бинога эмас, том остида осмонўпар минораларини яширган сирли хилқатга ўхшаб кўринади.

Кўпридан ўтаман. Пастда ёқилғи кўйиш шоҳобчаси, курилиши тугалланаётган уйлар. Бошимни кўтараман. Мана, арчалар ва тимсоҳдай узун, қоп-қора машиналар куршовидаги бошқа бир тўйхона: «Версал». Қадимги француз қиролларининг қароргоҳи шундай аталган.

Эллик қадам юрар-юрмас, чап томонда зарҳал рангларга бўялган яна бир маҳобатли тўйхона: «Флоренция». Италия шаҳарларидан бирининг номи. Тилимизда қандай гўзал сўзлар бор, тарихий номлари магнур жаранглайдиган қанчалаб қадими манзилларимиз бор. Наҳотки бобомерос бу сўзларимиз тўйхоналаримиз пешонасига ярашмаса?.. Каттагина бир тўйхона пештоқида ўзбек сўзининг туриши ўзбек тилининг тарғиботи бўлади, чунки бу сўзга бир кунда минглаб кўзлар тушади.

Ўртадаги кўприк Ўзбекистон билан Европани боғлаб тургандек гўё. Ажнабий номдаги икки тўйхона қанча майдонни эгаллаган бўлса, билингки, биз шунча қарич тупроғимизни бой берганимиз, деган ўй ўтди хаёлимдан. Бироқ инсон қалбидаги, онгидаги чегараларнинг ўзгариши ҳудуд сарҳадларидағи ўзгаришлардан кўрқинчлироқ

эмасми? Бу ўзгаришлар географик хариталарда кўринмайди, ахир.

Дилим хира бўлиб, «Флоренция»дан кўзимни олиб қочсан, нигоҳим йўлнинг нариги бетидаги супермаркетга тушди: «Orange» (Апельсин).

Энди савол бериб кўринг, агар шу корхонага «Анор» деб ном кўйсак, харидор кирмай кўядими? Она тилимиздаги сўзлар тўйхонанинг нуғузини туширадими? Ёки эгаси кулинг ўргилсин тўйхонани куриш учун шунчалик кўп маблағ сарфлаганки, бу пулларнинг қиймати олдида ўзбек тили камбағаллик қиласидими?

«Аптека», «Fast Food», «Restaurant», «Мы открылись», «Welcome», «Салон красоты», «Ремонт обуви», «Вино-водка», «Ателье мод», «Ксерокопия» ва эшигига «Open» деган ёзув илингандан «Paynet»лар...

Нега? Нега қорнимиз очса, тепасига «Кафе» ёки «Банкентный зал» деб ёзилган дарвоздадан тортинмай кирамиз? Нега сочимизни олдирмоқчи бўлсак, ойнасига ёпиширилган «Парижмахерская» деган битикка парво ҳам қилмай останадан бемалол ҳаттаймиз?

Нега шаҳарлар тугул ҳатто қишлоқларимизда ҳам бундай ёзувлар одатий манзарага айланди. Мисол йиғиш учун дафтар-қалам олиб ёки фотомухбирни шерик қилиб, муайян ҳудудни тафтиш қилиш шарт эмас. Деразани очиш, ташқарига икки қадам ташлашнинг ўзи кифоя.

Холбуки, «Давлат тили тўғрисида»ги қонуннинг 20-моддасида «Лавҳалар, эълонлар, нархномалар ва бошқа кўргазмали ҳамда оғзаки ахборот матнлари давлат тилида расмийлаштирилади ва эълон қилинади ҳамда бошқа тилларда таржимаси берилиши мумкин» деб қатъий белгилаб кўйилган.

Филология фанлари доктори, профессор Низомиддин Маҳмудов ёзади: «Давлат тили масаласи мустақиллик тушунчасининг ўзак жиҳатларидан биридир. Шунинг учун ҳам Асосий қонунимиздаги «Ўзбекистон Республикаси»нинг давлат тили ўзбек тилидир» деган 4-модда «Давлат суверенитети» номли 1-боб таркибида берилган. Бу билан давлат тилининг давлат суверенитети атрибуларидан бири ҳисобланиши ифодаланган».

Демак, бу кичкина муаммо эмас. Давлат суверенитетини бузиш кичкина муаммо саналмайди. Қаттиқроқ айтганда, дўкон пешлавҳасига «Welcome» деб ажнабий сўзни муҳрлаш – курол кўтариб мамлакат ҳудудига хавф солишдай гап. Мана, юрт чегараси қаердан бошланади! Аслида бундай ёзувлар янайам хатарли. Улар ўқи ҳеч тутамайдиган милтиққа ўхшайди, ҳар гал қараганингда сени яралайди. Ҳақиқий қуролдан одам ўлади, сафдагилар камаяди, лекин бунда аксинча – кўпаяди. Саводсиз, ўз миллатига, ватанига бегона кимсалар сони ортади. Бошқа тилларни билиш ва қадрлаш, шубҳасиз, юксак фазилатдир, бироқ бу ўз она тилини четга сурин қўйиш ё унутиш эвазига бўлса, фазилат иллатга айланади.

Ҳозир компьютер саводхонлиги одамнинг савияси-

ни белгилаб берадиган омилга айланди. Компьютерни билмайдиган ходимни яхши мутахассис дейиш қийин. Замонамиз ёшларининг 70 фоизи ўз қизиқиши ва севимили машғулотлари ҳақида сўз юритганда спорт, дўстлар билан сухбатлашиш, маданий ҳордик чиқариш билан бир қаторда интернет мулоқотини айтади.

Бунинг нимаси ёмон? Ахир, сайёрамизнинг исталган нуқтасидаги истаган одамингиз билан истаган пайтда истаганча сухбатлашиш имконияти бор. Ноутбук, планшет, мобил телефон, энди ҳатто кўл соати орқали ҳам хат-хабарни ўқиш, ёзиш ва жўнатиш мумкин.

Ўқишни-да, жўнатишни-да дўндирамиз. Лекин ёзишга келганда... тил қоидаларига риоя қилишни эп кўрмаймиз. Ўзим виртуал тармоқнинг доимий фойдаланувчиси – шу оловли ҳалқа ичидаги одамман. Тўғри, адабий тил билан интернет тили ўртасида тафовут бўлиши табиий, бироқ шу тафовутнинг кун сайин ортиб бораётгани кишини хавотирига солади.

«Интернетда ишлаш учун пул тўлаймиз. Вақт ва пулни иқтисод қилиш учун қисқартмалар, аббревиатуралардан фойдаланиш авж олди», – дейди Ўзбекистон Миллий университети журналистика факултети доценти, сиёсий фанлар номзоди Шерзодхон Қудратхўжаев. Хўш, иккита ҳарфни ёки битта имловий белгини ёзишдан тежаб қолинган вақтнинг ҳисобини ким беради? Янги танишувлар, бекорчи гурнглар, сафсаталар оловида ёниб кул бўлаётган дақиқалар, соатлар олдида тўғри ҳарфнинг тугмасини босишига кетадиган биргина сония тарозига тош бўлдими? Оқизганимиз дарё, санаганимиз томчи. Билмаймизки, биз «тежаган» ўша лаҳзалар эртага саводсиз фарзандлар бўлиб биздан қасос олади.

Айрим мисолларга юзланайлик.

«3iw 5dekan». Нимани тушундингиз? Бу – хорижга жўнаб кетаётган бир йигитнинг глобал тармоқдаги ёзишмаларидан парча. Тўғрироғи, самолётнинг қачон парвоз қилишини сўраган дўстларига жавоби: «Учиш соат 5 да экан».

Ёки қўидаги ёзувга диққат қилинг: «9il 4opondaman». Тавба, буниси тағин нима дегани бўлди? Худди ребус ечаётгандай ҳис қиласиз ўзингизни. Иккilanманг, ҳозир сиз интернетга жойлаштирилган бир давра қизларнинг сурати остидаги изоҳни ўқидингиз: «Тўқ қизил чопонда – мен».

Интернет тизимидағи mail.ru, odnoklassniki, twitter, facebook каби сон-саноқсиз сайtlар ҳар куни юзлаб-минглаб ёшларни мулоқот ришталари билан боғлайди. Виртуал макондаги ёзишмалар чоғида юзлаб-минглаб қисқартма сўзлар, хатолар шамолдаги чанг мисоли у ёқдан бу ёққа ўтиб «жой алмашади», такрорланаверади. Натижада, ижтимоий тармоқларнинг ижтимоий «қармоқлар»га, зиёли одамларнинг эса «зиёнли» одамларга айланиш хавфи пайдо бўлади.

Яқинда телевизордан бир режиссёрнинг янги фильм тақдимотидан сўнг берган интервьюсини кўрсатишиди.

– Бу қўшуни мани ўзимам ёқтириб қолдим. Нага десайиз, қўшуни анақаси... ҳалиги...

– Фояси, – мухбир қиз нима назарда тутилаётганини илғаб, гапни тўлдириди.

– ...Ҳа, фояси ўзиммики. Мани юргимдаги анақалар...

– Туйғулар, – журналист қиз бу сафар ҳам хонанданинг жонига оро кирди.

– ...Ҳа, туйғулар анақа қилинган...

– Ифодаланган, – яна журналист кўллаб юборди.

Кузатувларимиз давомида шунга шоҳид бўлдикки, бу-гунги оддий ўзбек талабасининг сўз бойлиги ўртача 200-300 та сўзни ташкил этар экан. Бу жуда аянчли кўрсаткич.

Ўтмишга назар солайлик. Ҳазрат Навоий замонида темирчи-ю маҳсидўзгача юзлаб байтларни ёд билгани ҳақида манбаларда ёзилган. Яъни ҳалқда рисоладаги одам шундай бўлиши керак деган умумий маънавий даржа бўлган. Зебуннисо-ю Нодирабегим даврида ҳам аҳолининг энг қуи қатламига мансуб кишиларнинг тили гулдек ранг-баранг сўзларга бой бўлганини ўқиганмиз.

Яқин тарихимизни эсга олайлик. Биз ёшлар бува-бувиларимизнинг мингга яқин мақолни ёд билгандарига, юзга яқин матал, эртак ва қиссаларни гўзал қилиб сўзлаб бергандарига гувоҳ бўлганимиз.

Энди бир ўйлаб кўринг, маънавий хазинаси бор-йўғи 200 тагина сўздан иборат бўлган йигит (қиз) эртага ота (она) бўлса, унинг фарзандлари, табиийки, ўзидан камроқ, тахминан 100 та атрофида сўз билан фаол мулоқотда бўлади. Фарзандининг фарзанди эса янада камроқ...

Фожия шундаки, бу «доира» борган сайин торайиб бораверади...

Бекатда автобус кутиб тургандим. Кўча юзидағи мактабдан ўқитувчи опа бир гурух бошланғич синф ўқувчиларини етаклаб чиқди. «Болалар! «Остановка»дан четга чиқманлар. Кўлларингизни маҳкам ушлаб олинглар. «Обед» пайти йўллар «пробка» бўлади, эҳтиёт бўлиш керак», – дея ўқтирас эди ўқитувчи. Шу пайт жингалаксоч бир қизча сўраб қолди: «Устоз, «пробка» нима дегани?». Анча вақт нима деб жавоб беришни билмай турган муаллима тусмолланиб: «Ҳалиги... йўлда машиналар кў-ў-ўп бўлса «пробка» дейилади», – деди.

Мана, нега укаларимиз, сингилларимиз ўз фикрини танглайи кўтарилиган тилда равон ифода қилиб беролмайди! Мана, нега еттинчи-саккизинчи синфда ўқийдиган бола ҳатто диктант ёзишда нўноқ!

Умуман, биз тўхталиб ўтган муаммоларнинг сабаблари хусусида хулоса қилсак, булар:

– телевидениедаги, хусусий каналлардаги кўрсатувларда факат ёш-ёш эстрада ва кино «юлдуз»ларининг эфирга олиб чиқилиши (уларнинг шевада гапириши ва бундан андиша қилмаслиги);

– телевидение, радио ва кўча рекламаларида ғализ жумлалар, чет тилидан нотўғри таржима қилинган беўхшов ибораларнинг кўплиги;

– оиласда маънавий муҳитнинг ғарбилиги;

– китоб ўқиши «унутилган» машғулотга айланётгани...

Нима қилмоқ керак?

Бу – ўқитувчининг вазифаси-ку! Йўқ, бу – ота-онанинг вазифаси! Ахир бу – матбуотнинг вазифаси-ку!.. деяверсак тилимиз шу гирдобда гарк бўлади. Аслида, бу ҳар биримизнинг вазифамиз. Маънавий соғайиш осон кечмайди. Лоқайдлик вируси битта одамни эмас, бутун миллатни бемор қиласди. Нажот ҳар лаҳзада хушёrlик ва ҳамжиҳатлика.

Иброҳим САЙДОВ



**Инсон маданиятини шакллантириш, унинг қалби ва онгидаги эзгу гояларни  
қарор топтириш, маданий-маърифий ришталарни мустаҳкамлашда  
мусиқа ва санъатнинг аҳамияти беқиёс.**

Ислом КАРИМОВ

Мусиқа таълимини сифат ва мазмун жиҳа-  
тидан янги босқичга олиб чиқиши борасида ис-  
лоҳотлар самараси, Ўзбекистон ёшлари ҳар йили  
нуфузли халқаро кўрик-танловлар, санъат фести-  
валлари ва концерtlарда муваффақият қозониб,  
ўзбек санътини намоён этиб келмоқда.

Яқинда Ўзбекистон давлат Консерваторияси  
катта залида ёш умидли бастакор Нурали Эркаев-  
нинг Ўзбекистон Қаҳрамони, халқ шоири Абдулла  
Ориповнинг «Жаннатга йўл» драматик достони  
асосида ёзилган опера-оратория премьerasи бў-  
либ ўтди. Абдулла Орипов итальян шоири Данте  
Алигъерининг «Илоҳий комедия» асарини ўзбек  
тилига моҳирлик билан ўигран, бу асар таъси-  
рида «Жаннатга йўл» (1978) драматик достонини  
яратган. Достон фантастик ва афсонавий-мифо-  
логик мавзу асосида ёзилган. Унда акс эттирил-  
ган воқеа-ҳодисалар нариги дунёда содир бўла-  
ди (Данте Алигъерининг «Илоҳий комедия»си ва  
Фитратнинг «Қиёмат» (1923) ҳикояси қаҳрамон-  
лари ҳам «у дунё»да ҳаракат қиласидар). Асар-  
да ота-она ҳурмати ниҳоятда улуғланади. Шоир  
Йигит бир қизалокни сойдаги тошқиндан кутқариб,  
бевақт вафот этган. У тарозибон ҳузурида гуноҳи-  
ни тан олади. Тарозибон унга қаратади:

**Савоб деган нарса ахир тасодиф эмас,  
Етмиш икки томирдан у оқиб келгуси,  
Яхши одам яхшилигин англамай қолмас,  
У виждонни бир вазифа дея билгуси...**

дейди. Йигит аросат даштини айланади, жаннат  
дарвозаси қошига боради, ота-онаси билан учра-  
шади. У ҳаёт тажрибаси оз бўлгани билан оқ-кора-  
ни яхши танувчи, айниқса, ҳаёт машақатларини  
обдон бошдан ўтказган одам. У дўзахдан даҳшат-  
лироқ ҳодисаларни, кунларни, шайтондан вах-  
шатлироқ одамларни кўрган ва чидашга мажбур  
бўлган. «Жаннатга йўл» достонида Садо образи  
лирик қаҳрамон тарзида берилган бўлиб, илоҳий  
кудрат деб баҳоланувчи ҳақ ва адолат кучи тим-  
солидир. Достондаги Йигит образини очища-

Дўст, Дўст образини очища Йигит муҳим аҳамиятга  
эга. Дўст «у дунёда»да ҳам одамлар ҳақидаги ўз  
фирқида қатъий туради. Шу Йигитнинг олижа-  
ноб ва инсоний қиёфасидаги янги-янги қир-  
рапари намоён бўлади:

Ўйлаб қара, тарихда бор ибрат доимо:

**Не-не зотлар гар ўзлари топса  
ҳам тўзим.**

**Одамзотга кўрмаганлар  
ёмонлик раво.**

**Эзгуликнинг ўли оғир,  
серғалва гарчанд.**

**Майли, менинг руҳим синиқ,  
хаёлим парканд,**

**Хис қилурман, эзгуликнинг  
офтоби порлоқ.**

Йигит Дўстга етишмайдиган икки  
пайса савобни ўз савоблари ҳисоби-  
дан беришга қарор қиласиди. Дўст ҳам  
шу фикрда эди. Йигит ва Дўст ўзи жан-  
натга кириб, қадрдонини унинг ташқари-  
сида қолдириб кетишни номардлик деб  
билади. Асада кимса, ўспирин, қария,  
хур қиз образларида худди бу дунёдаги-  
дек, у дунёда ҳам изғиб юрган иғвогар, ўз  
манфаати ўйлида бир-бiri билан ит-му-  
шукдан бешбаттар, беор жанжалкашлар,  
ўйламай гапиравчилар кескин танқид қи-  
линган. Достон ниҳоясида Садо жаннат  
эшиклари очилганидан хабар бериб,  
Дўстга ҳам, Йигитга ҳам жаннат ато

этілажагини  
маълум қи-  
лади.



# “Jannatga yo’l” ко’ngillarga yo’l oldi

Шоир ушбу асарида эзгуликни имкон борида ёхуд имкон бори-  
ча руёбга чиқариладиган хоҳиш эмас, амалга оширилиши зарур  
бўлган эҳтиёж сифатида талқин этган. Асар тўрт қисмли бўлиб,  
яккахонлар, симфоник оркестр ва хор жамоаси учун ёзилган.  
Асар қаҳрамонларини Ўзбекистон ёшлар симфоник оркестри ва  
Ёшлар хор жамоаси ижро этишган. Бадий раҳбар ҳамда бош  
дирижёр Ўзбекистонда хизмат кўрсатган артист Камолиддин  
Үринбоев, хормейстер – доцент Юлдуз Ҳусниддинова. Тарози-  
бон – Ўзбекистонда хизмат кўрсатган артист Женисбек Пиязов; Ота  
– «Эътироф – 2017» совриндори ҳамда А.Навоий номидаги катта опера

ва балет театри яккахони Раҳим Мирзакалонов; Она – Ўзбекистонда хизмат кўрсатган артист Маъ-  
сума Болтабоева; Ёш Йигит – Республика ва халқаро танловлар совриндори Фарҳод Қамбаров.

Асарнинг биринчи пардасида ёш Йигитнинг бевақт оламдан ўтиши мангу ҳаётга қадам қўйишидан  
олдинги тарозибон билан учрашви, умр сарҳисоби кўрсатилган. Тарозибон Йигитнинг савоб ва гу-  
ноҳларини сарҳисоб қиласиди, аммо Йигит дўзахий бўлиб чиқади. Тарозибон дўзахга кетишдан аввал  
йигитнинг ота-онаси билан учрашишига рұксат беради. Асарнинг иккинчи пардасида Йигит отаси  
билан кўришади. Ота ўғлини дўзахий эканлигини билиб, унга савобидан бермоқчи бўлади. Аммо  
Йигит Отасидан бу савобни ололмаслигини айтади. Учинчи пардада Йигит Онасини кўради. Тўр-  
тинчи пардада Йигит дўстини учратади. Дўсти билан сұхбатлашиб, дўстига ҳам савоб етмагани-  
ни билади. Шунда дўсти савобидан Йигитга бермоқчилигини айтади. Икки дўстнинг бир-бири-  
га бўлган садоқати, меҳру-муҳаббати ғолиб келиб, улар Жаннатга йўл олишади.

Асарнинг ҳар бир пардасида хор ижросидан фойдаланилган. Биринчи парда бошида  
хор ёпик овозда куйлади ва ҳикоянавис сифатида ўрин эгаллади. Ёш Йигит – лирик  
тенор, Тарозибон – Басс, Ота – Баритон, Она – Сопрано, Дўст – Баритон. Тембрлар  
хилма-хиллиги жуда чиройли ифодаланган. Асарнинг ҳар бир пардаси мусиқий  
жихатдан жуда яхши боғланган. Хор партияларининг асосий ёзув услуги акорд-  
ли кўринишида ёзилган. Ёш Йигитнинг ички ҳиссияти мусиқий партиясида жуда  
ёрқин ифодаланган. Оркестрдаги зарбли ҳамда пулфлама гуруҳига берил-  
ган эътибор асар драматизмини кўрсатиб берган.

Мамлакатимизда мусиқа санъатининг барча йўналишларини из-  
чили равнақ топтириш, соҳа вакилларини ҳар жихатдан қўллаб-кув-  
ватлашга алоҳида эътибор қаратилмоқда. Нурали Эркаев ёшларга  
берилаётган имкониятлардан унумли фойдаланаётган истеъод  
эгаларидан бири. Бастакоримиз ёш бўлишига қарамасдан,  
«Ижодимиз сенга, Ватан!» деб номланган ёш бастакорлар  
кўрик-танловида 2-ўрин соҳиби бўлган. Бастакор ижод оламига  
дадил қадам қўйиб, бу йўлда илдам бормоқда. Бу жараёнда  
турли истеъод эгалари учун барча имкониятларни яратиш,  
қобилият ва салоҳиятларни намоён этиши учун кўмак бериш,  
ижодий ҳамкорликни кенгайтириш каби эзгу мақсадлар хиз-  
мат қилмоқда. «Жаннатга йўл» асарининг концерт сифатида  
бўлиб ўтгани бунинг исботи. «Жаннатга йўл» опера-оратори-  
яси муваффақият қозониб, томошабинлар юрагидан жой олди  
десак, муболага бўлмайди.

Алибек МАЛИКОВ



# ТӨРБАНИМIZ ТОЧУГА ВУЧУРСИН...МИ?

Х

алқимизнинг фазилатлари ҳақида сўзлаганда, меҳмондўстлиги, болажонлиги, меҳнатсеварлиги, сахийлиги кўп тилга олинади. Аслида ҳам шундай. Рўзгордаги сара маҳсулотларни меҳмон

учун асроймиз, агар эшигимиздан бирор кириб келса, тўкин дастурхон ёзамиз. Фарзандларимизнинг баҳту камоли йўлида боримизни беришга тайёрмиз. Бошқа фазилатлар ҳақида ҳам минглаб мисоллар келтириш мумкин. Халқимизнинг яна бир сифати тўйсеварлигига. Ҳақиқатдан ҳам, биз тўйларни яхши кўрамиз. Фарзандларининг баҳтли кунларини биз билан баҳам кўриш мақсадида тўйга чақирган одамнинг ёнида бўлишга, табриклишга, тўёна беришга ошиқамиз.

Ҳурматимизни қилиб чақирилган жойга бориш яхши иш. Шу ерда бир мулоҳаза бор.

Чақирилган жойга (айниқса, аёллар) ҳамиша янги либос кийиб бориши аслида шарт қилиб қўйилмаган. Тўёна бериш ҳам имкониятдан келиб чиқиб амалга ошириладиган масала. Аслида, бу тўй эгасига ҳадя ҳисобланади. Буни ҳам биз ўзимизга мослаб олганмиз. «Кўпроқ

тўёна қилсан, тўй қилганимда қайтади». Қайтармаган ёки биз тўй қилганда биз берганчалик тўёна беролмаганларни қарзини қайтармаган одамдек ёмон кўриб қоламиз. Ўрни келганда бу ҳақда гапиришни асло ёддан чиқармаймиз. Менинча, берадиган тўёна – ҳадяни имкониятдан келиб чиқиб беришимиз ва унутишимиз керак.

Қайтариш ёки қайтармасликни тўй эгаси ҳал қилсан. Биз аёллар бу масалада ҳам эркакларни четга суриб, кўни-кўшни, қариндош-уруғлар билан келишиб, тўёна-гап ўйинлар ўйлаб топганмиз. Бир қарашда бу яхшидир, тўй қиламан деб қийналиб турганингда қачонлардир бирорларга кам-кам берган пулинг бир юмалаб катта сумма бўлиб олдингдан чиқади. Масаланинг иккинчи томони эса оғриклироқ. Яъни бундай тўёналар миллий валутада амалга оширилмайди. Ўйнаб турадиган хорижий валюта қиймати эса баъзида тўёна бергувчини оғринтириб қўяди. Яна шуниси борки, кўпчилик бошқа шаҳарга кўчиб кетган, тўй қилганда топилмаган ҳоллар ҳам учраб туради. Шунинг учун тўй бошлар эканмиз, бетаъма ва қарз-ҳаволасиз ўтказишига ҳаракат қилишимиз зарур.

Энди яна биз аёллар томонидан ишлаб чиқилган тоғора ва сарпо-сурук масаласи. Қиз тараф қудаларга розилик бериши билан бу савдо ҳам бошланади. Куда томонга унаштиришга бораётган эркаклар хотинлар бериб юбораётган кўша-кўша тоғорани машиналарга ортиб, индамай кетаверишади. Санаб кўрилса, киши бошига биттадан тоғора у ёққа бориб, бир-иккита кўшилиб, бу ёққа қайтади. Бўлажак қудалар ўн-ўн олти хил (ўн бешта бўлмайди, тоқ сон) овқатни еб-ичиб, бўлажак тўйнинг маслаҳатларини қилишиади. Маслаҳат ҳам ошга қанча одам олиб келиш, қайси тўйхонада тўй бўлиши сингари масалалар атрофида бўлади. Бирор мард тўйни умуман бошқа сценарий бўйича, камхарж ва чиройли ўтказишни насиҳат қиласмишади. Яна аёллар берган сарпо-сурукларни кўлтиқлаб олиб, тарқалишади.

Янги-янги урфларга бош-кош бўлаётганларни қайтариш ўрнига замон шундай бўлса, биз ҳам қиласмиз, фарзандларимиз хафа бўлмасин деймиз. Фарзандларимизнинг баҳти деб югуриб-елиб, уларни йириклишади кетган майда-чуйдалар ботқогига ботирамиз. Ахир, ёлғонми, ўғлимизга «Сен ўзбексан, ўзига бек дегани бу», деб уқтириб келамизу уйланаётганда уйимизни шип-шийдам қилиб бўшатиб, қуда тараф тўлдириб кетишини кутиб

ўтирамиз. Шундай одамларнинг бирортасига сенда ғуур یўк деб кўринг, сиз билан тикка олишади. Лекин уйланаётган ғуурли инсон аёлни ўз никоҳига олар экан, рўзгорнинг камини ҳам ўзи тўлдиради. Уйни бўшатиб, мебел, гиламдан тортиб, пардаю кўрпа-тўшаккача қудалар олиб келади, деб кўчага кўз тикиб ўтирайди, десангиз, кўпчилик шундай қилияпти, бу ўзбекона урф дейди. Аслида, бу урфнинг келиб чиқиши момоларимизнинг чеварлиги, донолигининг ўзгарган шакли бўлса керак. Улар ёшликтан кашта ва сўзаналар тикишга, тўн қавишга, кўлда гилам тўкишга оилада ўргатилган. Келган совчилар қизнинг оқилалигини, сабр-тоқатини, қаноатию сарышталигини тиккан буюмларида кўришган. Қиз боланинг ўз қўли билан тиккан сўзаналари, зардеворлари, қозон ёпқичу безакли ёстиқ жилдлари унинг ўзи билан бериб юборилган. «Келинни келганда кўр, сепини ёйгандан кўр», деган гап шундан қолган. Яъни келиннинг сарполари у ҳақда сўзлаб турган. Келин томон қудаларга ҳадя улашар экан, буни келиннинг ўз қўллари билан тиккан, деб эслатиб ўтишган. Биз ҳам қизалоқ пайтимиз янгаларимиздан исмларимиз нақш қилиб солинган рўмолчалар олганмиз. Бу шунчалар қадрли совға бўлганки, қўшни қизларнинг ҳаваслари келарди. Вақти келиб, биз ҳам уларнинг янгалари маҳоратига қойил қолган жойларимиз кўп бўлган. Қўёв белбоғларнинг четига йигит ва қизнинг исмлари тикилган жойини яширишарди. Куда тараф худди келин йигитнинг исмини ёзib, изҳорини айтиб қўйгандек, хижолат бўлишарди. Лекин келинларнинг тўқиган рўмолчалари, тиккан ёстиқларию кашталарини қизлар, албатта, келиб кўришарди, кашталаридан намуналар олишарди. Бу урфлар ҳозир ҳам айрим тогли қишлоқларда сақланиб қолган. Келин ўз қўли билан қилган буюмларга қудалар хурмат билан жой ажратишган. Аста-секин бу урф оналарнинг сотиб олган ёстиқларию тайёр кўрпаларига, пардалар ва тайёр гиламларига алманиб борган. Алмашиниш шу даражага етганки, келиннинг кўл меҳнати сингган, оналарнинг меҳрибонлигидан пайдо бўлган сарполар қолиб, оталарнинг олиб берадиган мебелларига айланиб кетган. Фақат мебел бўлса майли эди. Унинг ёнига энди рўзгорда асқотадиган барча буюмлар – чангюткич, электр қиймалагич, шарбат чиқаргич, идиш-товоқларнинг оҳирги русумдагиси, биллур идишларнинг шоҳонаси (богема), дазмол ва дазмол столи, кир ювиш машинаси, кир қуритиш ускунаси, ўн иккиталик стул столи билан, телевизор, гилам, кўрпа-тўшак... Бу ҳали асосий тўйдаги мatoҳлар.

Бешик тўйида сарполардан ташқари яна бир қанча буюм олиб бориш керак. Муқаддас динимизда ҳам, замонавий никоҳ ўқиш жараёнида ҳам кўёвга оила бошлиғи сифатида қўйиладиган талаблар туширилади. Яъни, оиланинг барча кам-кўстини зиммасига олиш, рўзгорни таъминлаш айтиб ўтилади. Замонавий йигитлар нима қиляпти? Дидағ маъқул бўлмаган мебелни қайнотасиникига қайтариб юбораётганлар қанча? Тўғри, қайнотам олиб берадиган диванда ётгунча полга ўрин-кўрпа солиб


ухлайман деган мардлар чиқди. Шу ўринда яқинда ижтимоий тармоқларда тарқалган Айюб Рамз (бу йигит яқинда оламдан ўтибди. Аллоҳ раҳматига олсин) исмли йигитнинг «Куёвчак» номли мақоласидан иқтиbos келтиришни маъқул топдим: «Энди савол: Қайси орияти бор йигит мана шунаقا «куёвчак» бўлишни истар экан? Масалан, мен истамайман! Шунинг учун, оиласи ҳаётим учун зарур эҳтиёжларни ўзим топа олмагунимча уйланмоқчи эмасман! «Фам қилма, ҳозир уйланиш осон, ҳамма нарсани келин томон қиладиган бўлиб кетган», дейдиганлар ҳам топилади. Мен эса ғам чекаман, баҳтли оила қуриш учун, келажагим учун қайғураман, чунки «куёвчак» бўлишни хоҳламайман! Уйимнинг хоналари кенг ва ёруғ бўлишини хоҳлайман, келинницидан келган бачкана мебелу алламбало латта-путталар билан тўлдириб, кейин ҳаво ётишмай бўғилиб яшашни истамайман! Ўзига чанг йигишдан бошқасига ярамайдиган пардалар куршовида ва тахтиравонга ўхшаган нақшинкор кроватда ётиш мен учун БАХТ тимсоли эмас!»

Шундай йигитларимиз кўпайса, қани эди. Фақат бу русум нимагадир оммалашиш ўрнига қизнинг кўёвникига олиб кетадиган мatoҳларни сони кўпайиб боряпти.

Қиз тарафдан бериладиган ош маросими ҳам кўп муҳокамага олинди. Кўпчилик, асосан, пойтахт ва баъзи вилоятларда бор бу удумни қоралади. Бироқ битта ҳам ош бермасдан қиз узатган одам топилмади. Энг ёмони, хотинлар қолиб, эркаклар сарпо-сурукларга аралашадиган бўлиб қолди. Фикримнинг исботи сифатида қуданинг ошидан катта полиэтелин қопчиқда тўн олиб кетишаётганига кўп гувоҳ бўлганмиз. Олмаса, қуда тараф ранжийди, олса, ортиқча, тўйма-тўй юрадиган мatoҳ. Индамай қутариб кетаверишади. Бу урф ҳам аслида халқимизнинг қадриятларидан келиб чиқсан.

(Давоми 44-бетда)





Эшқобил ШУКУР

# *Menga bittagina shirin soʻz goldir*

\*\*\*

Лафз каби улуғман-у шеър каби ғарип шонман,  
Мен шонга султонман-у шон устида бешонман,  
Жаҳон мунча шонталаб, жон мунча жаҳонталаб,  
Мен мунча паришонман, мунчалар паришонман.

Ой мунча осмоналаб, осмон эса жонталаб,  
Ер мунча найсоналаб, найсон эса онталаб,  
Ёр мунча ҳижроналаб, ҳижрон эса қонталаб,  
Мен мунча паришонман, мунчалар паришонман.

Ишқ мунча оловталаб, олов эса ёвталаб,  
Дил мунча яловталаб, ялов эса товталаб,  
Тулпорлар жиловталаб, сор-бургутлар овталаб,  
Мен мунча паришонман, мунчалар паришонман.

Ботирлари орталаб, ор эса ҳазорталаб,  
Шоирлари дорталаб, дор эса бозорталаб,  
Зорлари озорталаб, озорлари зорталаб,  
Мен мунча паришонман, мунчалар паришонман.

Кулги йигидай йиглаб, йиги кулгидай кулса,  
Нафрат сөвгидай ёнса, туйғу севгидай ўлса,  
Бошқа Эшқобил бўлиб, бошқа Эшқобил келса...  
Мен мунча паришонман, мунчалар паришонман.

## САҲРОДАГИ САДО

Йўлда қолган йўловчининг қўлловчиси,  
Йўлсизларни равон йўлга йўлловчиси,  
Қоқ саҳрова соя берган, булоқ берган,  
Кумда қолган қулунарнинг сўровчиси.

Суринганда тулпорларга мадад бўлган,  
Аро йўлда қақшаганга қанот бўлган,  
Қора бошнинг қоронғида қаровчиси,  
Йўлда қолган йўловчининг қўлловчиси.

Манзил йироқ, умид сендан, нажот сендан,  
Ўлимларнинг қуршовида ҳаёт сендан,  
Жон риштасин Ҳак нурига уловчиси,  
Йўлда қолган йўловчининг қўлловчиси.

Дараҳтим, мен яна қошингга келдим.  
Қайтмас кунларимнинг хотири учун,  
Умримнинг айтилмас бор сири учун.  
Дараҳтим, мен яна қошингга келдим.

Япроқлар юзида ой нури йўнар,,  
Атрофда бўғилиб суқунат йиғлар.  
Дараҳтим, мен яна қошингга келдим.

Умрим эрталарга бўй чўзаётир,  
Ўтмиш кунларимдан олдим хавотир,  
Дараҳтим, мен яна қошингга келдим.

Хамал айвонида куйлади ҳаво,  
Қизғалдок қўшини қирларга тушди.  
Мени етаклаб ўт, эй Қари Наво,  
Юрагим юртида юлдузлар пишди.

Адиrlар эгнида ям-яшил қабо,  
Шамол ҳалинчақда ипак булатлар...  
Мени етаклаб чик, жон синглим Сабо,  
Совиган кўнглимда чақнади ўтлар.

Янги кўйлакларин киймоқда Ҳаёт,  
Хамал айвонида куйлади ҳаво.  
Мени яшаш сари етаклайди шод  
Қари Наво билан шўх синглим Сабо.

## АРЗИ ҲОЛ

Юракда енгил бир шамол айланди,  
Бошимда бошқа бир хилол айланди.  
Шоирдан хабар ол, шу дамда менга,  
Билмасман, заволими, камол айланди.

Аста қўлларингга суюнсам дейман,  
Қайғунинг ичидан қувонсам дейман.  
Шоирдан хабар ол, кўнглим безовта,  
Кимгадир руҳимни инонсам дейман.



Кечикиб қолдингми, синглим Қалдирғоч,  
Сен-чи, химмат беги, бек оғам, Оғоч.  
Шамол қанотига узун хат ёздим,  
Худойим күнглимдан сүрганды хирож.

Юракда енгил бир шамол айланди,  
Бошимда бошқа бир ҳилол айланди.  
Шоирдан хабар ол, шу дамда менга,  
Билмасман, заволми, камол айланди.

### ОРЗУ

Даҳолар күнглига чүр ташлаган сир,  
Осмон мактубларин мангу мавзуси.  
Азал зулматларин кесиб ўтган нур –  
Инсонни инсондай күрмак орзуси.

Минг ииллар бери-ю минг ииллар нари,  
Юлдузлар остида, замин устида  
Үтди қанча жаҳон пайғамбарлари  
Шу ният дастида, шу ўй қасдида.

Қанча тарихларни қум босганида,  
Селларда қолганда эллар қайғуси,  
Нишлайверди пиrlар қабристонида –  
Инсонни инсондай күрмак орзуси.

Ўзинг асра бизни, эй қодир худо,  
Пасткаш заволидан, абллаҳ ҳолидан.  
Разил кимсалардай қилмагил жудо  
Инсонни инсонлик истиқболидан.

Яссавийни буюк чиллага соглан,  
Навоий қалбининг олий туйғуси,  
Бухорий бошида ойдай юксалган –  
Инсонни инсондай күрмак орзуси.

Даҳолар күнглига чүр ташлаган сир,  
Осмон мактубларин мангу мавзуси.  
Азал зулматларин кесиб ўтган нур –  
Инсонни инсондай күрмак орзуси.

### КҮНГИЛ ЁШИ

Күнглим гулга тўлди кўркам даладай,  
Унда ялпиз бўйли еллар елади.  
Хув китоб қўлтиқлаб юрган боладай,  
Менинг гўзал шеърлар ёзгим келади.

Куйлаш ва сўйлашнинг кўпdir сабаби,  
Кузги хирмонлардай күнглим тўлади.  
Хув, тарихни кифтлаб юрган чол каби  
Гўзал ҳикоялар айтгим келади.

Умр баҳорими, кузим, қишими,  
Улуғлаб ўтарман улуғ ҳаётни.  
Ҳар ким яшаб ўтсин кўнгил ёшини,  
Ҳар дил Ватан тутсин Адабиётни.

\* \* \*

Ёз оқшоми... Шом шамолида  
Шовуллайди олтин буғдойзор.  
Бошоқларнинг ҳайрон ҳолида  
Тўлиб кетган кўнглим рамзи бор.

Олислардан ой боқар хомуш,  
Елдай эсар тирик мусиқа...  
Эшитилар най каби нолиш:  
“Арзим бордир фақат Ўзига”.

Бошим эгик ўтаман бундан,  
Тўкилади дилдан титроқлар  
Ва жовдираб боқар изимдан  
Олтин боши эгик бошоқлар...

### КЎРИШАРМИЗМИ Ё КЎРИШМАСМИЗМИ?..

«Эй, ўйловчи, бўлақол қўноқ...»  
Абдулла Орипов

Йўловчи, айт, қизғин дийдорлар қайда?  
Бир сирни англадим дардимни айта,  
Бу кўхна йўлларда биз яна қайта  
Кўришармизми ё кўришмасмиз?

Бу йўл осмон билан туташган йўлдир,  
Унда келувчидан кетувчи мўлдир,  
Сен менга бир иссиқ табассум қолдир,  
Қайта кўришармиз ё кўришмасмиз...

Узриман таниш-нотанишлардан,  
Кимга наф тан олиш ё тонишлардан?  
Бир ҳовуч қор қолдир менга қишлиардан,  
Қайта кўришармиз ё кўришмасмиз...

Бу йўл икки дунё туташган йўлдир,  
Йўловчи, ҳориган кўнглимга қўл бер,  
Менга биттагина ширин сўз қолдир,  
Қайта кўришармиз ё кўришмасмиз...



# *E'tirof mas'uliyati*

Давлатимиз томонидан ёшларга кўрсатилаётган ғамхўрликлар самарасида республикамиз бўйлаб ватанимиз келажаги ва равнақига ўз билими ва истеъдоди орқали муносиб ҳисса қўшиш истагида бўлган ғайрату шикоатга тўла ёшлар сони тобора ортиб бормоқда. «Ниҳол» мукофоти истеъдодли ёшларнинг жамиятимиз маънавий ҳаётини юксалтиришдаги муҳим ўрнини инобатга олиб, ўзининг эстрада, мусиқа, мумтоз қўшиқ, рақс ва опера санъати ижрочилиги соҳасидаги маҳорати билан одамларнинг юрагига етиб борадиган, ёшларни эзгуликка чорлайдиган, уларни маънавий баркамол инсонлар қилиб тарбиялашга хизмат қиласидиган асарлар яратишда фаоллик кўрсатаётган иқтидорли ёшларни мунтазам рағбатлантириб бориш мақсадида берилади.

«Ниҳол» мукофоти бу йил ҳам йигирма нафар янги истеъдодларни кашф этди. Совриндорларга диплом ва мукофотлар тантинали равишда топширилди. Уларнинг қай бири билан суҳбатлашмайлик, ҳис-ҳаяжон, мамнуният ва миннатдорлик ҳисси билан йўғрилган фикрларини баён этади.

### Мафтұна АҲРОРОВА, мумтоз қўшиқчилик йўналиши совриндори:

– Ушбу юксак мукофотга муносиб кўрилганимдан баҳтиёрман. Бугунги ютуқларга эришишимда Ўзбекистон давлат консерваториясида мен каби ёшларга ўз меҳнатларини аямай билим бериб келаётган Ўзбекистон халқ артисти Муножат Йўлчиева, Шавкатжон Эргашев, Нуриддин Маҳкамов, Шавкатжон Матёкубов, Ўзбекистон халқ артисти Мирза Азизов каби устозларимнинг ҳиссаси катта, улар олдида доимо таъзимдаман. Бундан олдин Россияда бўлиб ўтган «Олтин ҳалқа» халқаро танловида мумтоз қўшиқчилик йўналиши бўйича биринчи ўринни эгаллаб, консерваторияга имтиёзли равишда ўқишига қабул қилингандаман. Аммо Биринчи Президентимиз ташаббуси билан таъсис этилган «Ниҳол» мукофоти мен учун энг олий мукофотdir.



– Ушбу юксак мукофотга муносиб кўрилганимдан баҳтиёрман. Бугунги ютуқларга эришишимда Ўзбекистон давлат консерваториясида мен каби ёшларга ўз меҳнатларини аямай билим бериб келаётган Ўзбекистон халқ артисти Муножат Йўлчиева, Шавкатжон Эргашев, Нуриддин Маҳкамов, Шавкатжон Матёкубов, Ўзбекистон халқ артисти Мирза Азизов каби устозларимнинг ҳиссаси катта, улар олдида доимо таъзимдаман. Бундан олдин Россияда бўлиб ўтган «Олтин ҳалқа» халқаро танловида мумтоз қўшиқчилик йўналиши бўйича биринчи ўринни эгаллаб, консерваторияга имтиёзли равишда ўқишига қабул қилингандаман. Аммо Биринчи Президентимиз ташаббуси билан таъсис этилган «Ниҳол» мукофоти мен учун энг олий мукофотdir.

### Шерзод КЕНЖАБЕКОВ, рақс санъати йўналиши совриндори:

– Бу йил мен учун жуда омадли бўлди деб бемалол айта оламан. Жорий йилнинг бошида камтарона меҳнатларимни юксак баҳолаб, «Эътироф – 2016» тақдирлаш молосимида мени «Йилнинг энг яхши рақс ижроиси» деб топишиди. Ҳозир эса «Ниҳол» мукофотига муносиб кўрилганимдан чексиз ҳаяжондаман. Ҳар йили рақс йўналиши бўйича фақат рақосалар бу мукофот билан тақдирланарди. Бу йил эса икки нафар рақос ва бир нафар рақосага «Ниҳол» мукофоти топширилди. Бу Эътироф ва мукофотларга лойиқ бўлиш ҳамда менга юклатилган ишончни оқлаш учун бор билим ва иқтидоримни ватанимнинг равнақи йўлида сарфлашга, Ўзбекистонимга муносиб фарзанд бўлишга ваъда бераман.





**Қаҳрамон РАШИДОВ, мусиқа ижрочилиги йўналиши совриндори:**

– Бугун ёш хонанда ёки мусиқа ижрочилари учун мисли кўрилмаган шароит ва имкониятлар яратиб берилмоқда. Бундай катта эътибор бизни янада фаол бўлишга, ватанимиз, халқимиз, устозларимиз олдидағи масъулиятни, бурчимизни янада теранроқ англашга, билдирилаётган юксак ишончни оқлашга, унга муносиб бўлишга ундейди.



**Диёрахон МУХТОРОВА, мумтоз кўшикчилик йўналиши совриндори:**

– Очиги, бу мукофотга мен ҳам сазовор бўламан деб ўйламагандим. Чунки юртимизда иқтидорли ёшлар жуда ҳам кўплигига саралаш босқичида яна бир бор гувоҳ бўлгандим. «Нихол» мукофоти бизга катта имконият эшикларини очиб берди. Жумладан, бу йилги совриндорлар ўз йўналишлари бўйича олий ва ўрта маҳсус билим юртларига имтиёзли равишда қабул қилинишидан ташқари, Ўзбекистон Республикаси Маданият вазирлиги ҳамда Миллий телерадиокомпания ҳамкорлигига имзоланган меморандумга асосан, бир йил мобайнида ўз қўшикларини телерадиоканалларда бепул эфирга узатиш ҳамда аудиостудияларда имтиёзли равишда мусиқа ёзиш каби имкониятларга эга бўлди. Буларнинг барчаси учун давлатимизга ўз миннатдорчилигимни билдираман.



**Саодат БЕРДИЕВА тайёрлади**



Санъат – сарҳад ва масофа билмайдиган мужда. Уни тушуниш ва англаш учун диллар яқин бўлса бўлди. Зеро, санъатнинг ўз тараққиёт йўли бор. Россия пойтахти Москва шаҳрида бўлиб ўтган Ўзбекистон маданияти кунлари ўзбек санъатининг рус халқига мустақиллик йилларидағи илк тақдимоти бўлди. Ўзбекистон Республикаси ва Россия Федерацияси ўртасида дипломатик алоқалар ўрнатилганинг 25 йиллиги муносабати билан ўтказилган ушбу тадбир Кремль давлат саройида ўзбекистонлик санъат усталарининг катта концерт дастури билан очилди.

– Бундай катта жамоа билан Москвага анчадан бўён келмагандик, – деди Ўзбекистон Республикаси Маданият вазири Баҳтиёр Сайфуллаев. – Кейинги 25 йил ичидан бундай юксак даражадаги тадбирда биринчи марта қатнашыпмиз. Биз Москвага фақат концерт дастури ва «Ўзбекистон мероси жаҳон музейларида» номли тақдимот лойиҳасини эмас, она еримизнинг иссиқ тафтини, халқимизнинг очиқ қалбини, ранг-баранг маданиятимизни ҳам олиб келдик. Тарихий меросга ворислик ҳисси ва муштарак қадриятларни дўстлик ришталари билан боғлаш халқларимиз маданиятининг ўзаро бойиши учун хизмат қилади. Миллий ўзига хосликни сақлаган ҳолда замонавий санъатни ривожлантиришда мамлакат-паримизнинг умумий ютуқ ва муаммолари ҳам мавжуд.

Ўзбекистон Рёспубликаси Маданият вазири Баҳтиёр Сайфуллаев ва «Ўзбекистон-Россия» Дўстлик жамияти билан ҳамкорлик қилаётган Россия ҳамда Ўзбекистон Дўстлик ва ҳамкорлик жамияти раиси Игорь Круговых учрашувида ҳам айнан шу масалалар хусусида сўз борди. Икки мамлакатнинг бугунги ва келажакдаги режалари, маданий-инсонпарварлик йўналишидаги қизиқарли маълумотларни ўзаро алмашиб, бу борада амалга ошириладиган ишлар ҳақидаги сухбат сермазмун ва конструктив тарзда бўлиб ўтди. Зеро, бундай алоқалар халқлар ӯртасидаги дўстлик ришталарини мустаҳкамлашга хизмат қиласди.

– Россия пойтахти Москвада «Ўзбекистон маданияти ва санъати кунлари»нинг ўтказилиши мен учун кўшалоқ кувонч бўлди, – дейди рус шоири Евгений Березников. – Айниқса, мазкур тадбир доирасида ўтказилаётган концерт дастурида менинг «На востоке» шеърим асосида яратилган кўшиқ кўйланди. Дарҳақиқат, «Чойхона Шарқда, Шарқда. Бу қандай осмон ойсиз, бу қандай ҳаёт чойхонасиз». Ўзбекистон тараққиётисиз бу қандай Шарқ?! Ўзбекистон Президенти Шавкат Мирзиёев мамлакатнинг маданияти ва иктисадиётини, умуман, инсонларнинг кайфияти, руҳиятини кўтармоқда. Ўзбекистон яқин кунларда Амир Темур салтанатига лойиқ куч-кудратга эга давлат бўлди. Мен бугун концертда бўлиб шуни англадимки, Ўзбекистон халқаро ҳамжамият олдида тобора муносиб ўрин эгалламоқда. Мен Ўзбекистонда юксак ривожланишлар амалга ошаётганидан ниҳоятда хурсандман.



Декоратив-амалий ва халқ санъати Бутунrossия музейида «Россия Федерацияси тўпламларида Ўзбекистон маданий мероси» мавзуусида давра сухбати ўтказилди. Унда Эрмитаж, Третьяков галереяси, Россия Миллий кутубхонаси, Россия Этнография музейи, Россия Фанлар Академиясининг Шарқ қўлёзмалари институти вакиллари қатнашди. Тадбир давомида Россиянинг

етакчи музей ва кутубхоналарига «Ўзбекистон маданий мероси дунё тўпламларида» номли маданий-мәйрифий лойиҳанинг беш жилдли нашри совға қилинди ҳамда ўзбек санъати асарлари кўргазмаси очилди. Маданият кунларининг якуни ҳам бошланишидек юксак даражада ўтди. «Космос» концерт залида санъаткорларнинг катта концерти намойиш этилди. Россиялик ҳам-

каслар, ўша ерда истиқомат қилаётган ҳамюрлар, оммавий ахборот восита-лари вакиллари билан учрашувлар ташкил этилди.



Юқори савиядада ўтказилган Ўзбек маданияти кунлари ниҳоясига етган бўлса ҳам унинг шукухи иштирокчилар, томошабинлар қалбида узоқ вақт сақланиб қолади. Халқлар орасига санъат орқали дўстлик ва ҳамжихатлик олиб кириш анъаналари бардавом бўлсин.

**Анора ҲОЖИМАТОВА**



Аҳмад ТЎРА олган суратлар





# Jutdek Jo'kilgan qurak

Ўтган асрнинг иккинчи ярмидан кейин республика миқёсида адабиётта, айниқса, шеъриятга қизиқиш сезиларли зайлда жонланиб, Эркин Воҳидов, Абдулла

Орипов, Рауф Парфи шеърлари ҳақида мароқ билан гапирила бошланган эди. Ўшанда мен Бухоро педагогика институтининг талабаси эдим. Чини билан адабиётни яхши кўрар, китоб ўқиши завқини ҳеч нимага алмаштиргим келмасди. Факультетдаги айrim тенгдошларим қатори мен ҳам адабиётда кечा�ёған янгиликларни билгим келар, шу мақсадда домламиз, филология фанлари номзоди Тожи Қораевга тез-тез мурожаат этардим. Бир марта адабиёт тўғараги йигинида у кишидан Тошкентда яшаб ёки ўқиб юрган бухоролик ёш ижодкорлар тўғрисида сўрадик. Униси ёзувчи, буниси шоир деб Тожи ака уч-тўрт номни тилга олди. Шулар орасида Тилак Жўра ҳам бор эди. Мен ҳали бирорта шеърини ўқимай, Тилакнинг Қоракўлданлиги, истеъододли эканлиги, буни баъзи устозлар ҳам эътироф этишганини эшиздим. Адашмасам, Тилак Жўранинг шеърларини илк бора «Гулистон» журналида ўқиганман. Улар анъанавий шаклдаги шеъриятдан анча фарқланарди.

Институт таълими тугади. Шоғирконга қайтиб, ёзувчи Аҳад Ҳасан мұҳаррирликни эндиғина бошлаган туман газетасида ишга ўрнашдим. Рости гап – Абдулла Ориповнинг шеъридан бошқаси менинг кўзимга у пайтлар зўр шеърга ўхшамай қолганди. Ўхшаганида ҳам, дард ва алам даражаси пастдай туюларди. 1972 йил Тошкентга кўчиб келгунимча шу қаноатда юрдим. Номзодлик диссертациясининг мавзуси мумтоз адабиётдан бўлса ҳамки, қалдан Абдулла Орипов шеъриятидан ажраломмасди. Айнан шу шеърият тўғрисида ёзгим келгани учун етмишинчи йилларнинг ўрталарида марказий газета ва журналларда бир неча мақола эълон килдим.

Шоирнинг шоирга, шогирднинг устозга, тенгдош қалам соҳибининг тенгдошларига кўлкасиз ва тиниқ самимиятини Тилак Жўрада кўрганман. Истеъодод нафасини ҳам, адабиётга олиб кирган янгилигини ҳам у тўғри мушоҳада этарди. Рауф Парфининг шахсидан шеърини, шеъридан шахсини баланд қўйса қўярдики, паст қўймасди. Унинг нигоҳида армон эмас, Рауф aka чинакам Исён шоири бўлиб гавдаланаар, санъаткорли-

гини мустасно бир ҳодиса ўлароқ илҳом билан таърифу тавсиф қиласарди.

Тилак Жўра ҳаётдан ўзи истаган кенглик, орзу қилгани эркинликни ахтарар, аммо тополмасди.

Бир яланглик бўлса,  
Тўйиб-тўйиб бақирсанг.  
Сўниб қолган руҳингни  
Қалқиб-қалқиб чақирсанг!..

Шунда шеър унга ёрдамга келар, тутдай тўкилган юрак билан ҳақиқий шеъриятга талпиниб яшарди.

Тутдек тўқилди юрагим,  
Аламнинг ҳар қамчисидан,  
Сени согиниб кутаман,  
Қонимнинг ҳар томчисидан!

Шеърда сўз, туйғу, фикр, дард – ҳамма-ҳаммаси тутдек тўкилса – ана шу ҳақиқий шеър. Шундай «тўқилиш» Тилакнинг шеърлари учун хос хусусият эди.

Олдин Тилакнинг шоирлигини яхши кўрган бўлсам, кейин унинг дарвешлигига ҳавас қиладиган бўлдим. У билан гапимиз ўз-ўзидан уланиб, тармоқланиб кетаверарди. Руҳий бир яқинлик ҳам бунга таъсир ўтказган бўлса керак. У «Руҳият» китобига «Руҳий дунёминг сирдоши ва дардоши энг яқин дўстим Иброҳим Ҳақкулга эзгу тилаклар ила Тилак» деб ёзган дастхати мен учун энг эъзозли эътирофдир.

1984 йил ёз ойларида ўзбек шеъриятининг кейинги даврлардаги аҳволи хусусида Тилак билан бир сухбат қиладиган бўлдик. Ва қарийб бирор ҳафта бизнигiga бекиниб олиб, айтиладиган гапларимизни қофозга туширдик. Аммо сарлавҳа топиш бироз қийин кечди. Бир пайт у: – Топдим. Хуршид Даврон:

Табиатдир менинг давомим,  
Туташ эрур бағрим бағрига.  
Умрим боғлиқ ою офтоби  
Дарё, дала, дарахтларига,

деб ёзган. «Табиатдир менинг давомим...» зўр сарлавҳа бўлади, – деди. Мен атайин, «Нимаси зўр?» дедим.

– Э, қизиқ экансиз-ку! Ўзини табиатнинг бир бўллаги

ўлароқ ҳис қилгани ва шу түйғуни бизу сизга юқтиргани зўр. Ахир ваҳдати вужуд деганлари шу эмасми?..

Хуллас, «Ёшлик» журналининг 1984 йил 8-сонида сұхбат Тилак танлаган сарлавҳа билан босилиб чиқди. Шеърлари танқид қилингандардан бири менга, бирорлари Тилак Жўрага маломат тошларини отишди. Албатта, биз зиён кўрмаганимиздек, муҳолифлар ҳам ҳеч нимага эриша олишмади. Ўшанда Тилак «Танқидчилик қилиш жуда қийин иш экан-ку, жўра...», деганида мен «Борингки, ўнта шоирни танқид қилдингиз, камида учтадан оғайни ва тарафдори унга ҳамдардлик қилса, ҳисобланг нечта ғаним орттирган бўласиз...» десам у яйраб кулгани ҳамон эсимда.

Бир-бирини тан олмаслик, бирининг ёзганини ботинан ёки зоҳирда бошқаси инкор қилиш, ҳақиқий истеъдодга қарши хусумат оловини ёкиш ижод ва илм аҳли орасида азал-азалдан давом этиб келаётган, бироқ ҳеч вақт тўхтамайдиган бир ҳодисадир. Агар бу ҳодисанинг илдизи билан қизиқсангиз, икки нарсага тўла ишонч ҳосил қиласиз. Биринчиси, илм-фан ва бадиий ижод оламида табиатан майда, ҳашаки ҳамда тасодифий ким-саларнинг кўплигига. Иккинчиси, қўлига қалам олиб, қофоз қоралаган ҳар бир худпараст ва таъмагирнинг ўзини даҳо ҳисоблашига.

Адабиёт тақдиди ва тараққиётини талант ҳал қиласи. Бироқ адабиёт «бозори»ни талантсиз ва ўтрамиёначилар қизитади. Шўро даври адабиётида бу ҳолатни ҳар қадамда кўриш ва кузатиш мумкин эди. Сиёсий ялоқхўрлик ва мафкура дастёрлиги талантни камситиш ёки таҳқирлашнинг кенг жорий этиладиган «усул»и бўлганинг кўпчилик яхши англарди. Шеър ва шоирликдан ўзга имкон майдони, тўғрилик ва ҳалолликдан бошқа најот қалқони йўқ бир қанча шоирларнинг ижтимоий-иқтисодий, маънавий-руҳий аҳволи менинг хотирамда чукур ўрнашиб қолган.

Уларнинг ҳақиқатпарастлиги хаёлпарастлик билан кўшилиб-коришиб кетган, эҳтимол шу боисдан ҳам қалбларида Сўз ва Шеър наинки одамнинг, балки жамият ва дунёнинг ҳам қиёфасини ўзgartира олади, деган ишонч ҳоким эди. Тилак Жўра шундай шоирлардан биридир.

Тилак қалбидаги энг юксак ҳис-туйғу, шодлик ва қадар, ҳасрат ва армонларни шеърият билан боғлаб, шеър тилида ифодалашга интиларди. Ботиндаги ғам-гусса зоҳирда кулгига дўниши ва кўзда ҳамиша

шаффоф бир мунг аксланиб туришини мен Тилак Жўрада кўрганман. Шоирдаги қушдай енгиллик ва холислик руҳининг моддий манфаат, шахсий ғараз, нафсоний иддаолардан кирланмаганлиги билан ҳам вобастадир.


Унинг ўз ички ҳақиқатларидан илҳомланиб, завқни бодадай сипқориб, ўзича бир маст ҳолатида юриши бежиз эмасди. Табиатга муҳаббат, табиат гўзалликлари қучогида яйраб-яшнаш Тилақдаги түфма салоҳият эди, десак ҳеч муболага бўлмайди. Менимча, у шаҳарда ўрнашиб, яшай бошлаган куниданоқ қадрдан қишлоғини кўмсаб, қишлоқ кенгликларига талпиниб, кун ўтказган. Унинг хотира шеърларида сўз ва фикрнинг кутилмандага оҳангдор, рангин, сержило манзара касб этиши шундан.

Бир тўпламини Тилак «Райҳон» деб номлаган ва табиийки, ҳар бир шеър райҳонга ўхшаб одамларнинг кўнгли, руҳ ва шуурига завқ бағишилашини истаган. Дарвоҷе, шоирнинг кўп шеърлари райҳондай кўркам, хушбўй ва таровати боқийдир. Айни пайтда, райҳон, Тилак Жўра шеъриятининг ясамалик, пардозбозлик, сунъий кўтарикилик сингари қусурлардан фориғлигини акс эттирувчи тимсол ҳамдир.

Мен таниган, мен яхшироқ билган ижодкорларнинг кўпчилигига китоб чиқариб, обрў-эътибор қозониш ва мақсадни мансабу амалга қаратиб, унвону мукофотлардан бенасиб қолмай, ҳузур-ҳаловатда яшаш иштиёқи ёзилмаган «режа» бўлиб қолганди. Бунга эса сиёсатнинг талаб ва кўрсатмалари билан ҳисоблашмасдан, партияга суюнмай эришишнинг имкони йўқ эди. Қизиги, адабиёт ва ижод эркинлиги учун факат зиён етказадиган ушбу ҳаракат уят ҳам, айб ҳам саналмасди. «Режа» бўйича муваффақият қозониш удумини назар-писанд қилмайдиган Рауф Парфи бошлиқ шоиру адилар ҳам кўпайиб қолганди. Ана шулардан бири Тилак Жўра эди. Унинг камсукумлиги ва бегаразлигидан файз ёғилиб турар, синиқлигига гўё бутунлик тазаҳҳур этарди. Устомон, корчалон айрим қаламкашлар уни «бўшанг» ва «ношуд»лиқда ҳам айблашган. Тилак эса ҳеч қанақа ғиди-биди, таънаю маломатларга парво қилмас, кўнглиниг ҳоҳласа қули, истаса шоҳи бўлиб кун ўтказаверарди. Моддий муҳтоjлик, кети кўринмайдиган ночорлик таъқиб этганида ҳам Тилакнинг шеърга меҳр-муҳабати зарра қадар сусаймаган. У маънавий маънода фақирлик билан «шартнома» тузган бир шоир эди.

Тилак Жўранинг китобсеварлиги, муаллифларини саралаб-саралаб шеър таржима қилиши, таржимашунослик фаолияти алоҳида-алоҳида бир мароқбахш мавзу. Бу йил ўзбек шеъриятининг ўлмас ва унтилмас намояндадаридан бири Тилак Жўранинг таваллудига етмиш йил тўлди. Шу сана муносабати билан ҳам у ҳақда жуда кўп очиқ фикр ва хотиралар айтилади, деган умиддамиз.

**Иброҳим ҲАҚҚУЛ,  
филология фанлари доктори**





*Оркестр ижросида чалинаётган куй зал узра тараларкан, дирижёр қўлида ҳаракатланаётган таёқчага ҳамоҳанг равишда гоҳ майинлашиб, гоҳ баландлашиб, томошибинг ўзгача завқ беради. Миллий чолғулар жўрлигида янграётган бундай оҳангларнинг сеҳру жозибаси бошқача. Шунингдек, созандаларнинг бир-бирларига уйғун равишдаги ижроси кишини ўзига ром этади. Андижонда ягона бўлган «Тарона» халқ чолғулари камер оркестрининг концерт дастури ҳар гал ана шундай кўтаринки руҳда ўтади.*

## *San'atga oshushta umr*

Бу йил 60 ёшни қаршилаган сұхбатдошимиз, «Шуҳрат» медали соҳиби Хотирахон Акрамова Андижон санъат коллежи халқ чолғулари бўлими мудири сифатида неча ўн йиллардан бўён фаолият юритиб келмоқда. Андижоннинг биринчи чангчи ва дирижёр аёли бўлмиш Хотирахон Акрамова тиниб-тинчимас, изланувчан ва ижодга чанқоқ санъаткордир. Унинг ана шундай фазилатлар соҳиби бўлиб шаклланишида, аввало, оиласидаги муҳитнинг таъсири, қолаверса, устозларининг меҳнатлари бекиёс. Буни санъаткоримизнинг кўйидаги эътирофлари ҳам тасдиқлади:

– Аввало, мендаги иқтиidorни ўз вақтида англаб етган ота-онамдан ҳамиша миннатдорман. Мактабда ўқиши баробарида шаҳардаги мусиқа мактабининг чанг бўлимига қатнаганман. У ерда устозим Азаматжон Бекназаровдан миллий чолғу сир-асрорларини ўргандим, сеҳрли оҳангларига маҳлиё бўлиб, шу соҳани танладим ва мусиқа билим юртига ҳужжат топширдим. Имтиҳонлардан аъло баҳоларга ўтганимдаги қувончум ҳали-ҳануз юрагимни ҳаяжонга солади. Баҳтни қарангки, Ўзбекистон халқ ҳофизи Фаттоҳхон Мамадалиев вилюятимизда мақом ансамблини тузди. Ва мен шу ансамблга чангчи сифатида ишга қабул қилиндим. Бу чолғунинг қолган сирларини Фаттоҳхон акадан ўргандим.

Ҳа, Хотирахон опа чинакамига омадли ва баҳтили ижодкор. Чунки унга ўзбек миллий санъатининг дарғалари билан ёнма-ён туриб ижод қилиш насиб, этди. 1976 йили мусиқа билим юртини тамомлаб, давлат комиссияси тавсияси билан Ўзбекистон давлат консерваториясининг халқ чолғулари бўлимига чанг мутахассислиги бўйича ўқишга қабул қилинди. Ўзбекистонда хизмат кўрсатган санъат арбоби, профессор Аҳмад Одиловдан чанг чалиш сабогини

олган бўлса, дирижёрлик сирларини санъат арбоби Мардон Насимовдан ўрганди.

1979 йили ўқиши билан бирга Ўзбекистон Миллий телерадиокомпанияси қошидаги Ўзбекистон халқ артисти Фанижон Тошматов тузган «Дуторчилар» ансамблида чангчи-созанда бўлиб ишлади. Айтиш мумкинки, бу фаолият ҳам Хотирахон Акрамовага катта мактаб вазифасини ўтади. Чунки устоздан халқона куй, лапар ва ўланларни ўрганди.

Муҳим тажриба ва малака орттириб, қўлида диплом, қалбида қайноқ ижод ишқи билан Андижонга қайтган санъаткор вилоятда ўзбек миллий санъатини ривожлантириш, янги мутахассисларни тайёрлаш каби эзгу ишларда фидойилик кўрсатиб келмоқда.

Аввалига чанг мусиқа асбобининг бор имкониятларидан ўринли фойдаланиш орқали ўзбек миллий куйларини маҳорат билан чалишни ўргатди. Кейинроқ эса чангчилар ва дуторчилар гурухини тузиб, нафақат ўзбек, балки чет эл композиторларининг асарлари асосида янги репертуарлар яратса бошлади. Ёшлар орасидан иқтидор эгаларини кашф этиб, уларни мумтоз, эстрада қўшиқлари, халқ лапар ва ўланларини маҳорат билан куйлашга йўналтириди. Бу эса йиллар ўтиб вилоятда ягона, республикада саноқли халқ чолғуларидан ташкил топган «Тарона» камер оркестрининг шаклланишига замин бўлди. Оркестрни ўзига хос аҳил оиласига қиёслаш мумкин. Унда устоз ва шогирдлар биргаликда дастур тайёрлайдилар ҳамда вилоят, республика миқёсида ўtkaziladigان давлат тадбирлари, танловларида биргаликда қатнашадилар. Хотира опа улар учун асар ёзишдан чарчамайди, изланади, янгиликлар яратади.

– Бирор асар ёзсан, маза қиласман, чунки ижодкор учун асар худди фарзандидай гап. Унинг ижросини кўриш, муҳлислардан олқиши олишининг завқи эса таърифлаб бўлмайдиган сурур, – дейди опа.

Хотирахон Акрамованинг бу ҳаракатлари аста-се-

кин шогирдларининг муваффақиятларида намоён бўлди. Улар орасида Зулфия номидаги давлат мукофоти соҳиблари Саида Қулматова, Севара Фозилжонова, Навоий стипендияси совриндори Хуршида Абдулазизова, эл суйган хонанда Файратжон Усмонов, «Созлар навоси», «Она юрт оҳанглари» каби танловлар голиблари Маъруф Матмусаев, Дилдора Латифжонова, Дилфузә Эрматова, Сарвиноз Баҳромова, Моҳичеҳра Ашурова, Баҳодир Аҳмедовлар бор.


Хотирахон Акрамованинг ташаббуси билан 2012 йилдан бўён вилоятда ўтказиб келинаётган кўп овозли ансамбл ва оркестрлар фестивалида мурғак қалб эгалари кўнглига мусика орқали эзгулик уругини сепиш, уларнинг гўзалликни ҳис қилишлари ва кўра билишлари учун имконият яратиш мақсадида боғча тарбияланувчи-ларидан ҳам ансамбллар тузилиб, улар ҳам ўз дастурлари билан қатнашмоқдалар. 2015 йилдан халқаро танловга айланган ушбу фестивалда ҳар йили андижонлик санъат усталари фахрли ўринларни эгаллаб келмоқдалар. Бу ютуқларда, албатта, Хотирахон Акрамованинг ҳиссаси катта. Опадаги иқтидор қизлари Ҳилолаҳон ва Наргизаҳонга ҳам юқсан. Бугун улардан бири Андижон давлат университетида, яна бири онасининг ёнида, санъат коллежида ёшларга санъат сирларидан сабоқ бериб келмоқда. Хотирахон Акрамованинг фидойилиги давлатимиз томонидан муносиб баҳоланди ва Мустақиллигимизнинг 21 йиллиги арафасида у Ўзбекистон Республикасининг биринчи Президенти Ислом Каримовнинг Фармонига биноан «шухрат» медали билан тақдирланди. Бу юксак мукофот қаторида кўплаб Фахрий ёрлиқлар, ташаккурномалар, халқаро танловлардаги эътирофлар...

Хотирахон Акрамова санъат орқали кишилар қалбига эзгулик улашаётган ижодкор. «Тарона» халқ чолғулари камер оркестири ижросидаги бир-биридан завқли, ўйноқи, жўшқин куй ва қўшиқлар эса вилоятда ўтказилаётган байрам тадбирларини безайди. Улар ижросидаги чиқишлиарни мухлислар жон-дил билан тинглаб, томошадилар.

— Умрим санъатга ошуфта бўлганидан, ҳаётим оҳангларга эш бўлиб, мазмунли ўтаётганидан ва бу ўзгаларга ҳам маънавий озуқа берётганидан баҳтиёрман, — дея ўзининг узоқ йиллик фолиятидан мамнуният, қониқиш туйган Хотирахон Акрамовага барча шогирдлари ва мухлислари номидан узоқ умр, сиҳат-саломатлик тилаймиз.

**Матлуба ЮСУПОВА,  
журналист**





# *Men saodatli ayloman*

Ўн уч ёшида катта саҳналарда туриб, ўзининг «Устозлар», «Андижоним», «Қишлоқларимдан» сингари дилтортар қўшиқлари билан минглаб тингловечилар қалбига йўл топа олган андижонлик устоз санъаткор, Асака тумани маданият бўлими қошидаги ансамбл хонандаси Санобар Раҳмонова журналинизнинг наебатдаги меҳмони бўлди.

– Санобар опа, аввало, сизни Ўзбекистон Республикаси мустақиллигининг йигирма олти йиллик шодиёнаси арафасида Президентимиз фармонига бинонан «Дўстлик» орденига муносиб кўрилганингиз билан самимий муборакбод этамиз.

– Табрик учун ташаккур. Очигини айтсам, давлатимиз раҳбарининг зиёлилар билан учрашувидаги эътирофи ва ушбу юксак мукофотига сазовор бўлишини сира ҳам кутмагандим. Ҳалигача бутун вужудимни ҳаяжон тарк этгани йўқ. Президентимиз менинг камтарона ижодимни юқори баҳолаб, ўrnak ва ибрат сифатида кўрсатганидан бағоят хурсандман. Бундай юксак мукофот, ижод аҳлига кўрса-тилаётган чексиз эътибор ва ғамхўрлик миллий санъатимиз равнақи йўлида янада фидойилик билан меҳнат қилишга ундаши шубҳасиз. Келгуси ижодий фаолиятимда ўзбек миллий санъатини янада ривожлантиришга, ўлмас қўшиқлар яратиб, ҳалқимиз маънавияти ва маданиятини юксалтиришга қўлимидан келганича ҳисса қўшишга ҳарарат қиласман.

Давлатимиз раҳбари Шавкат Мирзиёевнинг мамлакатимиз ижодкор зиёлилари вакиллари билан дўстона, самимий ва очиқ мулоқот руҳида ўтган учрашуvida маданиятимиз ва санъатимизнинг ривожланиши жараёнлари, бу борадаги ижобий тенденциялар билан бирга, айrim салбий ҳолатлар, уларнинг жамият ҳаётига таъсири холисона ва танқидий баҳоланиб, ўз ечимини кутаётган долзарб муаммолар ва уларни бартараф этиш йўллари ҳақида атрофлича фикр юритилди. Президентимизнинг «кўпчилик қўшиқчилар масъулиятни унутиб, ўз устида ишламай қўйган, изланиш, маҳоратини ошириш, янги ижодий ғоялар билан яшаш, санъат дунёсига, муҳлисларга ҳурмат каби тушунчалар уларга бегона бўлиб қолган», деган фикрларни жон куйдириб таъкидлагани бежиз эмас. Бир сўз билан айтганда, мазкур учрашув адабиёт, санъат, оммавий ахборот воситалари ва маданият соҳаларини янада ривожлантириш йўлида янги босқични бошлаб берди.

– Бугунги ўзбек қўшиқчилик санъати тўғрисида кўплаб эътироzlар билдирилиб, соҳа мутахassisслири ва тингловчилар ўртасида катта баҳс-мунозаралар олиб борилаётганлигига асосий сабаб нимада деб ўйлайсиз?

– Бугун куй-қўшиқнинг мазмунини, санъатнинг асл моҳиятини тушуниб улгурмаган баъзи хонандалар сабаб соҳа кўп танқидга учрамоқда. Хорижий қўшиқлардан кўчирмачилик қилинаётгани ҳам асосий муаммолардан бири. Авваллари бадиий кенгашнинг талаби қаттиқ

бўларди. Кўрикка ўнлаб қўшиқларимизни тақдим этардик. Қайсиdir нотаси бошқа бир асарга ўхшаб қолса ҳам тасдиқланмасди. Атиги уч-тўрттаси ўтарди, холос. Назаримда, таълим муассасаларида ўқитаётган мусиқа дарслари ҳам кўнгилдагидек эмас. Ўқувчига таълим беряётган ўқитувчи нимани ўргатаётганини, аввало, ўзи ҳис қилиши лозим. Давлатимиз раҳбари зиёлилар билан учрашува бу масалага ҳам алоҳида тўхталди. Маданият ва санъат муассасалари ходимларининг 50 фоиздан ортиги олий маълумотга эга эмаслигини таъкидлади. Шу ўринда таникли санъат намояндаларини мусиқа мактабларига бадиий раҳбар ёки директор этиб тайинлаш тақлифи айни мудда бўлди. Чекка-чекка ҳудудларимизда ҳам иқтидорли ёшлар кўп. Уларни ҳар томонлама қўллаб-кувватлаш, ижодий камолоти учун ёрдам бериш доимий вазифамиз бўлиши керак. Балки уларнинг барчаси ҳам катта санъаткор бўлиб етишмас, лекин мусиқага, санъатга меҳр бериб улғаяди ва бундай йигит-қизлардан ёмонлик чиқмайди.

– Қалбингизда санъатга бўлган иштиёқ қандай ўйғонган?

– Оддий оилада туғилиб, вояга етганман. Бизнинг аждодларимиз орасидан бирорта ҳам санъаткор чиқмаган. Дадам раҳматли Раҳмонали ақа оддий чўпон, онам Хосиятхон ая эса тикувчи бўлса-да, ҳар иккиси ҳам санъатни тушунадиган ва қадрлайдиган инсон эдилар. Оилада етти қиз, бир ўғил бўлиб, жуда камтар яшаганмиз. Волидамнинг янги кийим олишим, тўй-ҳашамга боришм керак, деганларини ҳеч қачон эшитмаганман. Ҳар доим қиладиган ўй ишларини бир кун олдин режалаштириб қўярди. Отам чўпонлиги учун бир жойда муқим истиқомат қилмаганмиз. Ҳали у ёқдаги, ҳали бу ёқдаги қирадирларда узоқ-узоқ яшардик. Аниқ эслайман, дадамнинг кичкинагина радиопрёмниги бўларди. Эсон Лутфуллаев, Маъмуржон Узоқов, Коммуна Исмоилова, Жўрахон Сultonovларнинг қўшиқларини туннинг алламаҳалигача эшишиб, хиргойи қилиб юради. Иш вақтида ҳам китоблардан ўқиб, ёд олган ғазал ва шеърларни ўзича қўшиқ қилиб айтарди. Кичкина бўлишимга қарамай, дадам Ҳабиба Охунованинг «Алла айтай» қўшигини кўйлатарди ва ўзлари юм-юм йиғларди. Кўз ёшининг боиси, ўғлини беш йил деғанда ҳарбий хизматдан қайтганини кўрган бувим севинчи ичига сиғмай қазо қилган экан.

Опа-акаларимга нисбатан мен кўпроқ яйловга, отамнинг ёнига бориб ёрдам берардим. Баъзан гўзал табиатдан илҳом олиб, баралла қўшиқ айтардим. Балки мана



шундай гўзал ва болалигимнинг кенгликларда ўтган беғубор лаҳзапари туфайли санъат йўлини танлагандирман. Бизнинг болалик йилларимизда санъаткорлар, айниқса, аёл ижодкорлар жуда ҳам озчиликни ташкил этарди. Ота-онам кўшиқчи бўлишимга сира қарши бўлишмаган. Турли тантовларда қатнашиб, ғолиб бўлганимда ёхуд концертларда кўшиқ айтганимда онамдан ҳам кўпроқ дадам ёш боладек қувониб кетарди. Уларнинг дуолари сабаб мана шу даражага эришдим.

– **Мамлакатимизнинг деярли барча худудларида сизнинг ўз муҳлисларингиз ва тингловчиларингиз бор. Кўпчиликнинг кўз ўнгида Санобар Раҳмонова деса, бугунги ташки қиёфангиз эмас, аксинча, сочларини майда қилиб ўриб, ироқи дўппи кийиб олган ўн уч ёшли қизалоқ қиёфаси гавдаланади. Ўша дамларни ҳозир ҳам кўмсаб турсангиз керак-а?**

– Албатта. Қаерга ижодий учрашувга борсак, албатта, сиз айтгандек, болаликдаги Санобар ҳақида кўп гапиришади. Менимча, ҳар бир инсон болалигини энтикиб эсласа керак. Болалигимдан санъат ичида улғайганим боис кўп хотираларим шу соҳа билан боғлиқ. Илк бор 5-синфда ўқиётганимда «Марҳабо, талантлар!» телевизион фестивалида иштирок этганман. Ўшандо Ўзбекистон санъат арбоби Олимжон Холдор сўзи билан ёзилган «Андижоним» қўшигини икро этганман. Унга устозим Фуломжон Рўзибоев мусиқа басталаган. Шу тадбирда ҳакамлар ҳайъати аъзоси, шоир Туроб Тўла «Агар менга қолса, шу қизчага олий ўринни берардим», деганди. Чунки ёшим кичик бўлгани боис танловдан ташқари ҳаваскор сифатида қатнашгандим. Кейин «Кўйланг, ёш хонандалар», «Санъат фунчлари», «Светофор» каби кўрсатувларда иштирок этиб, Республикада кўзга кўрина бошладим.

1973 йилнинг сентябрь ойида Асака туман маданият ва истироҳат боғида пахтакорларга концерт намойиш этилди. Мен ҳам кўшиқ айтиб саҳнага чиқдим. Бунда давлат раҳбари Шароф Рашидов ҳам иштирок этган экан. У киши ижромни кузатиб, мени суриштирибди. Оддийгина чўпоннинг қизи эканимни билиб, «Бу истеъододли қиз ҳақида фильм қилинглар», дея топшириқ берибди. Шундан сўнг мен учун омадли кунлар бошланди. Айниқса, менга пианино совға қилишганидан бошим кўкка етган. Шароф Рашидов сабаб кашф этилиб, эл назарига тушганман, десам сира адашмайман.

– **Суҳбатларингизнинг бирида «Кўйла, Санобар» номли фильм-концерт ҳам айнан ўша тадбир сабаб дунёга келганлиги хусусида тўлқинланиб гапирган эдингиз?**

– Ҳа, пахта мавсуми арафасида ўтказилган тадбирдан кейин роппа-роса бир йил ўтгач, «Ўзбектелефильм»нинг маҳоратли режиссёри Ҳожимурод Ибрагимов бошчилигида Тошкент, Андижон ва Асаканинг гўзал масканларида мен ҳақимда кичик фильм суратга олинди. 30 дакиқалик фильм-концерт дастурига бадиий кенгаш томонидан 15 га яқин кўшиқларимдан 8 таси танланган. Фильм эфирга чиққач, мактабда роса шов-шув бўлганим. Кўплаб тенгдошларим менга ҳавас билан қарашарди. Ишонсангиз, юртимизнинг деярли барча худудларида санъат шинавандаларидан сон-саноқсиз, қоплаб хатлар олардим. Ўша мактубларни ҳозир ҳам онам сақлаб келади. Нафақат вилоятдаги, балки Республикадаги тадбирларда ҳам, албатта, қатнашардим. 1975 йили пойтахтимиздаги «Билимлар уйи»да уч кун мен ва фильм ижодкорлари

билан учрашув бўлиб ўтганди. Унда мамлакатимизнинг турли бурчакларидан келган муҳлислар билан дилдан мулоқот қилганимиз. Учрашувдан сўнг қалбимда санъатга, кўшиқ айтишга бўлган иштиёқ янада мавж ура бошлади.

– **Мактабни тамомлаб, санъат даргоҳини эмас, аксинча, қишлоқ хўжалиги соҳасини танлаганингизнинг боиси нима?**

– Мактабни тамомлаб, орзумдагидек пойтахтга ўқишига боролмаганман. Ўша вақтларда жуда кўп тўсиқларга учраганман... Тўғриси, у воқеаларни эслашни ҳам истамайман. Орзуларимни қалбим тубига кўмид, маҳалладошим Илҳомжон Жўраевнинг таклифига кўра 1977 йили ҳозирги Андижон қишлоқ хўжалик институтига ўқишига кирганман, мутахассислигим агроном эди. Ўзимнинг соҳам бўлмагани боис жуда қийналганман. Устозларим тинимсиз «Нега санъат соҳасини танламадингиз?» деяверишарди. Институтнинг «Оқ олтин» номли ансамбли бўларди, пахтакорларга концерт берардик. Яқин йилларгача санъат соҳасида ўқиганимда етук санъаткор бўлардим, деб ўйлардим. Тақдирга бир нима дейиш қийин. Лекин менинг ижодимни қадрлаб келишаётган муҳлисларимдан, она халқимдан, қолаверса, Президентимиздан миннатдорман.

– **Барчага яхши маълумки, турмуш ўртоғингиз, Ўзбекистонда хизмат кўрсатган артист Илҳом Жўраев ҳам санъаткор. Санъаткорларнинг оиласи мухити ҳақида гапириб берсангиз.**

– Биз бир маҳаллада катта бўлганимиз. Мактабда ҳам бирга ўқиганимиз. Қишлоғимизда «Машъял» номли ансамбл бўларди. Биз ҳам кўплаб танловларда ғолиб бўлган шу ансамбл аъзолари эдик. Концерт дастурларига борганимизда Илҳом ака чолғу асбобларида менинг қўшиқларимга куй чалиб берарди. Шундай қилиб дўстона ришталаримиз муҳаббатга айланган. Институтда иккичи курсда ўқиб юрганимизда, яъни 1978 йили тўйимиз бўлган. Иккимиз ҳам бир-биримизни тушуниб, масалаҳатла-римизни аямай ижод қилиб, яшаб келаяпмиз.

Баъзилар Санобарга кўшиқ айтиш учун оиласида тўқиңилек бўлган, деб ҳисоблади. Оиласиңг муқаддас даргоҳ эканлигини барчамиз яхши биламиш. Шу маънода мен ҳам, биринчи навбатда, оиласиңг азиз ва улуғ эканлигини билиб, санъатни оиласиңг алмаштиридим. Кўпроқ вақтимни фарзандлар тарбияси билан ўтказдим. Янги келинлик пайтимда ҳам ҳеч ким кўшиқ кўйлашимга қаршилик кўрсатмаган. Турмуш ўртоғим Илҳом ака оиласида саккиз фарзанднинг кенжаси бўлганилиги учун иккимиз ҳам кексайиб қолган қайнона-қайнотамнинг ёнларида бўлиб, уларнинг дуоларини олишга интилганимиз. Бекалик, оналик вазифамни адо этишни асосий мақсад қилиб олганман. Аллоҳга бедад шукрлар бўлсинки, уларнинг дуоларини олиб кам бўлмадим. Дилобархон, Исломбек, Ихлосбек, Мадинабонуларни тарбиялаб, вояга етказдик. Келин олиб, қиз чиқардик. Фарзандларим ҳам кўшиқ кўйлаб, ҳалқимизнинг яхши кунларида хизмат қилишяпти. Набираларимнинг кувончлари эса қалбларимизга шодлик улашади. Уларнинг баҳтила лаҳзаларини кўриб, ич-ичимдан севиниб кетаман. Майли, мени ёшлигимдаги Санобар деб тан олишадими, ҳозирги неваралар қуршовидаги, саҳналарда кам кўринадиган Санобар деб тан олишадими, энг муҳими мен бугунги кунда саодатли аёлман!

– **Самимий суҳбатингиз учун катта раҳмат!**

**Миролим ИСАЖОНОВ** суҳбатлаши

# Musiqa va ashula to'garaklari

Миллий мусиқамиз ҳақида гап кетганда, аввало, бу санъат тури қадим-қадимдан такомиллашиб келганини айтиб ўтиш жоиз. Ибн Сино, Форобий, Навойй, Бобур каби улуғ аждодларимиз ўз ижодида мусиқага катта эътибор берганлар. Бугунги кунда ҳам мусиқа санъатимиз ривожланиб, ижрочилик маҳорати ўсиб бормоқда. Хусусан, мамлакатимиз истиқололга эришганидан кейинги йилларда фан, таълим, маданият ва санъат борасида ҳам юксак эътиборга лойиқ ислоҳотлар амалга оширилди. Айниқса, ёшларимиз орасида мусиқа санъатига бўлган қизиқиш, улар орасидан истеъоддли ёшларни кашф қилишга бўлган саъй-ҳаракатлар ўз самарасини бермоқда. Ана шу мусиқий меросимиздан уларни боҳабар қилиш, ўргатиш тажрибали устоз мураббийларнинг фидокорона меҳнатлари билан боғлиқ. Ёшларнинг миллий чолғуларимизни ўрганиши, мусиқамизни англаши билан бирга уларда маънавий баркамоллик туйғусини ўстириш учун жойларда тўгараклар ташкил қилинди.

Мазкур тўгаракларда ашула билан бир қаторда рақс ҳам ўргатиб борилади. Ашула ўрганувчилар гуруҳига бадиий раҳбар, биринчи навбатда, жарагандор, ширави овозга эга йигит-қизларни танлаб олиши лозим. Махсус билимга, маълум тажрибага эга бўлган, ашулачиликка меҳр қўйган ҳаваскор хонандаларнинг жам бўлиши келажакда бу гуруҳдан яхши хонандалар етишиб чиқишига имкон беради. Қолаверса, уларнинг қанчалик тажрибага эга бўлиб чиқиши ашула ўргатувчи хонанданинг билими, педагогик маҳорати ва саъй-ҳаракатларига боғлиқ. Ҳаваскорлик тўгаракларида ташкил этиладиган хонандалар гуруҳи зиммасига қўйидаги талаблар қўйилади:

- малака ва кўнникмаларни ҳосил қилиш;
- ҳаваскор хонандаларнинг ашулачилик қобилиятини ўстириш;
- ашула куйлашга бўлган иштиёқни такомиллаштириш;
- унли ва ундошларни тўғри талаффуз қилишни ўргатиш;
- овоз пайларини эркин тутиб, томоқдан куйламасликни ўргатиш;
- мусиқий жумлаларни оғиз комида салмоқлаб шакллантира олишга ўргатиш;
- қўшиқ куйлашда нафасни етарлича олиш, ҳар бир қўшиқ бўлагини меъёрига етказиб охириғи қаторигача талаффуз қилиб куйлашга ўргатиш;
- қўшиқни чиройли ижровий безаклар билан куйлашга ўргатиш.

Тўгарак машгулотлари илғор тажрибалар асосида, кўргазмали қуроллардан фойдаланиб ўтказилса, янада мақсадга мувофиқ бўлади. Айниқса, хонанданинг саҳнада туриши, оғизни очиши ва турли мимикалардан фойдаланиш ҳолати тасвирланган кўргазмали қуроллар машгулотни сифатли олиб боришига имкон беради.

Мусиқа ижрочилигига машҳур устозлар ижро этган ашула йўлларидан, уларнинг ижрочилик мактаблариридан аудио ёзувлар орқали фойдаланиш хонандаларнинг ўсишида муҳим роль ўйнайди. Чунки бу ёзувларда чолғучилар ансамблининг ашулачиға моҳирона жўр бўлиши, хонандаларни илҳомлантириб юборишининг гувоҳи бўлиш мумкин.

Тўгарак раҳбарининг ҳар бир хонанда билан алоҳида олиб борадиган якка дарслари бўлажак хонанда учун ҳам, уларнинг жамоавий куйлашлари учун ҳам муҳим аҳамиятга эга. Бу биринчидан, ашулачиларнинг якка хонанда сифатида шаклланиши учун муҳим жиҳат бўлса, иккинчидан, гуруҳли ижрода ашуланинг авж пардаларини алоҳида ижро этиб, сўнгра жамоа бўлиб куйлаб боришлирага имкон беради.

Яхши овозга эга бўлган якка хонандани саҳнага алоҳида олиб чиқиши устоздан катта меҳнат талаб қиласи. Бундай хонандаларга ўзига хос дастурлар бериб саҳнага тайёрлашнинг муҳимлиги шундан иборатки, улар бутун жамоага ҳам катта обрў келтириши мумкин. Зоро, бадиий жамоани кўзга кўрсатувчи шахс ҳам шу якка хонандалар бўлади. Машҳур хонандаларнинг ҳар бири ўз жамоасига катта обрў келтиришини буюк ҳофизлар Мулла Тўйчи Тошмуҳаммедов, Жўраҳон Султонов, Маъмуржон Узоқов, Комилжон Отаниёзов, Ҳалима Носирова, Орифхон Ҳотамов, Фаттоҳон Мамадалиев, Саодат Қобулова, Коммуна Исмоилова, Назира Аҳмедова, Отажон Худойшукоров, Ортиқ Отажонов, Раҳматжон Қурбонов, Матлуба Дадабеева, Маҳбуба Ҳасанова, Муножат Йўлчиева, Насиба Сатторова, Аҳмаджон Дадаев, Бекназар Дўстмуродов, Гуломjon Ёқубов каби санъаткорларнинг ҳар бири нафақат ўзи тарбияланган жамоанинг номига, балки республикамизнинг обрўсига обрў қўшиб келганлар ва қўшиб келмоқдалар.

Халқимиз истеъоддларга бой ва ҳар бир жамоадан ҳам шундай машҳур хонандалар чиқ-



**Бахтинос  
МАҲМУДОВА**



са ажаб эмас. Жамоа бўлиб ижро қилишда қўшиқчиликнинг ҳам ўз ўрни бор. Шунинг учун ҳам жамоа ижрочилигидан мақомчилар, мумтоз қўшиқчилар чиқиши табиий. Бу устозларнинг маҳоратига, жонбозлигига кўп жиҳатдан боғлиқдир.

Тўгарак қатнашчиларининг билим ва маҳоратини оширишнинг муҳим жиҳатларидан бири хонандалар ўртасида баҳс-мунозаралар олиб бориш ҳисобланади. Мунозара ва баҳслар қўйидаги мазмунларда ўтказилса, мақсадга мувофиқ бўлади:

-ҳозирги кунда қайси мавзудаги қўшиқларни кўпроқ кўйлаш талаб этилади?

-кўшиқнинг инсонга таъсири хусусида қандай фикрдасиз?

-халқ қўшиқлари ва замонавий қўшиқчиликнинг ансамблдаги ўрни қандай?

-халқ ҳофизлари ва халқ артистлари ижодий фаолиятлари ҳақида нималарни биласиз?

Ҳаваскорларни қўшиқчиликка ўргатиш борасида илмий ёндашувнинг уч босқичи ҳақида қўйидагиларни сабаб ўтиш мумкин:

1. Ташкилий босқич. Мазкур босқичда синов-тажриба ишларининг мазмунини очиб берувчи лойиҳа ва илмий ишнинг аниқ ишчи режаси ишлаб чиқилиб, ҳар бир босқичда ҳал этиладиган вазифалар белгилаб олинади. Тажриба-синов иши олиб бориладиган обьект белгиланади. Сўнгра илмий ишнинг предмети кўрсатилади. Бунда ҳал этиладиган ишнинг аниқ мазмуни, моҳияти ва бу ишга жалб қилинадиган шахслар ҳақида маълумот берилади.

2. Асосий босқич. Бу босқичда, асосан, экспериментал гурӯҳ билан иш олиб борилади. Машғулотдан мақсад – қўзланган ишларни амалга ошириш, экспериментал гурӯҳда янги методларни кўплаб иш олиб боришdir. Турли кечалар, учрашувлар, мунозаралар, мъузора, концертлар сценарийлар асосида ташкил қилинади. Масъул раҳбар билан узлуксиз мулоқот олиб борилади.

3. Якуний босқич. Бу босқич тажриба-синов, олиб борилган ишларнинг натижасини аниқловчи босқич ҳисобланади. Натижани ва ҳар икки гурӯхнинг билим даражасини аниқлаб олиш учун уларга маҳсус тузилган саволлар билан мурожаат қилинади. Жавоблар уч тоифага бўлинади.

Олий даража – барча саволларга жавоб бера оладиган қатнашчиларни белгилаб беради.

Ўрта даража – саволларга берилган жавобларда айрим камчиликларга йўл кўйган қатнашчилар киритилади.

Паст даража – саволларга берган жавобларида жиддий камчиликлар бўлган ёки жавоб бера олмаган қатнашчилар киритилади.

Тўғри жавоблар даражаси қайси гурӯҳда кўп эканлигини аниқлаш учун уларнинг жавоблари таққослаб кўрилади. Таққослаш натижасида қайси гурӯҳ яхши даражада жавоб берган бўлса, шу гурӯҳ экспериментнинг яхши натижасини кўрсатади.

Бугунги кунда санъатга эндиғина қадам кўйиб, унинг ҳавосидан нафас оламан деган ёш хонандалар ҳам ана шундай устозлар қўлида тажриба ортириб, саҳна масъулиятию мashaққатларини англаб, кейин томошибин олдига чиқса, мақсадга мувофиқ бўларди.

**Гулшан УМАРОВА,  
Ўзбекистон давлат санъат ва  
маданият институти катта ўқитувчиси**

\*\*\*  
Омонмисан, баҳтиёрмисан?  
Парвозларинг ҳануз ўқтамдир?!  
Мудом титрар эди қарасам –  
Қанотларинг гуллаб кетгандир?!

Ҳануз озод бўлсанг бўлгани!  
Умринг олиб учавер сархуш,  
Юрагимга келиб қўнгану  
Қўзларимдан учиб кетган күш!

\*\*\*  
Шундай соғиндимки бугун барини!  
Соғиндим тош ўпган йўлларни бирам!  
Хеч кимдан бекитмай ҳайратларини  
Дарё-дарё оқсан шамолларни ҳам.

Шовуллаб борсайдим барига бардам,  
Шовуллаб чиқсайди соғинчим қирга.  
Гулдай ҳисларимдан эҳсон қилардим,  
Гул хайр этмаган гулхайриларга.

\*\*\*  
Настаринлар гулини тўкса,  
Фам чекасан: «Ҳаёт-бешафқат!»  
Дараҳтларга қарайсан ўксиб,  
Юрагимга боқмагин фақат.  
Ахир, куннинг ботиши тайин,  
Офтобида яшаб қол бир дам.  
Онам, дардинг қандай олайнин,  
Гулламасдан тўкилган бўлсам?!

\*\*\*  
Эртароқ қайт,  
Қайтаринг бўлса,  
Шамоллар ҳам топди-ку қўним.  
Сокин тортиб қолди япроқлар,  
Дараҳтларни қўрқитмас ўлим.

О, бу қушлар бунча хотиржам!  
Бунчалар тинч оқади сойлар.  
На тўлқин бор, на-да битта мавж,  
Ёйкуга кетдими улар?!

Сен қайларда юрибсан тентиб?  
Қаерларда оляйсан тин?  
Тушунсангчи, дунёга малол –  
Менинг ғамгин безовталигим!

Эртароқ қайт...

Ҳалима АҲМАД

# Сајак



Ва ниҳоят бугун қор ёғди. Негадир ёғаётган қор менга жуда хушфеъл түюлди. Гарчи қиши фаслининг ўртаси бўлса-да, ҳаво негадир илимилиқ. Бу ҳаводан қочиб яна сен яшаётган хотиралар дунёсига кетаман, болалигим.

Эслайсанми, ўшанда қиши қаҳрли, ёғаётган қорлар эса жуда ўжар эди. Онам билан тонгнинг қорини қураганинг сайин яна бостириб келаверарди улар. Ўша кунларнинг бирида дадам овдан тўлиб-тошиб қайтди. У бир талай ёввойи ўрдак отиб келган эди. Ёввойи ўрдакнинг гўштини онам паловнинг остига босар эди. Жуда хуштаъм бўларди.

Унгача ўрдакларни патларидан тозалардик. Онам билан дадамга ёрдам бериш учун сен ҳам уларнинг ёнига ўтириб ўрдак тозалай бошладинг. Сени кўпроқ ёввойи ўрдакнинг думида бўладиган пиёзга санчиб қўйсанг гажакка айланадиган пат қизиқтирап эди. Гўёки, бу пат хосиятли бўлиб одамга мол-давлат олиб келади, дейишарди. Молу дунё нималигини тушинмасанг-да ўша патни зўр бериб излардинг. Ногаҳон қўлингдаги пичоқни синглинг шаҳд билан тортиб олди. Шу лаҳзада унинг бармоқаси чукур кесилиб, тўрт томонга қон сачради. Гарчи айбинг бўлмаса-да, кўркиб кетганингдан ўрнингдан туриб қочдинг. Айб кимдалигини билмаган дадам эса сенинг орtingдан югурди. (Эсингдами, дадам қиз болани урса баҳтсиз бўлади, деган ақидага амал қилиб ҳеч қайси қизига кўл кўттармасди.)

Сен чопқиллаб бориб, ён қўшнимиз Полвон бибининг уйига кирдинг. Ниманидир сезган Полвон биби сени тахмонининг ортига беркитди. Дадам ҳаллослаб кириб келаркан, Полвон биби ундан:

– Нима бало, сени ит қувладими? – деб сўради. Дадам хижолат бўлгандай ғудранди:

– Шу катта қизимни жуда эркалатиб юбордим. Қилган ишини кўрмайсизми?!

Полвон биби эса дадамни тинчитган бўлиб:

– Сен кетавер, қизинг мен билан боради, – деди. У кетгач, сен тахмон ортидан чиқиб Полвон бибини кучоқлаб олдинг. Ва унга бўлган воқеани гапи-

риб бердинг. Полвон биби эса чукур хўрсинди-да: – Ҳали катта бўлсанг тушунасан. Ҳар қандай гажакда хосиятсиз нимадир бор, – деди.

Сен эса шоша-пиша сўрадинг:

– Биби, гажак молу дунё олиб келади, – дейишидалику, мол-дунё дегани нима ўзи?

– Бу бойлик, роса кўп пул дегани, – тушундингми энди, – таъкидлади у.

Нималарнидир тушунгандек бўлдинг. Сўнгра Полвон биби берган парварда, туршакларга чўнтақларингни тўлдириб, у билан уйга кириб бординг. Синглинг катта дока ўралган бармоғини кўксига босиб, ҳали ҳам хиқиллаб ўтирас, уйдан эса ўрдак гўштига қилинган паловнинг хушбўй ҳиди анқирди. Дадамни кўра солиб Полвон бибининг панасига ўтдинг. У ҳеч нарса бўлмагандай:

– Ҳа қизим, ўзингдан ўзинг мендан нега беркин-япсан, – деб сўради.

Сен йиғлаб юбординг. Сўнгра дадам сени куҷогига олиб, эркалатди:

– Бундан сўнг эҳтиёт бўлгингда, қизим, хўпми?

Хўп дегандай бошингни сарак-сарак қилдинг. Сўнгра йиғлоқи овозда:

– Менинг айбим йўқ, ҳамма айб гажақда, – дединг.

Онам, дадам, Полвон биби кулиб юбориши. Сен эса югуриб бориб токчадаги пиёзга санчиб қўйилган гажакларни олиб узок-узокларга улоқтириб юбординг...

Бугун ёшим бир жойга етганда ўйлаляпман: гажакда ҳақиқатдан ҳам молу дунё келтириш хислати бормиди, балки уни улоқтириб юбормаганимда бадавлат одамга айланармидим. Йўқ, дейман яна ўзимга ўзим. Уни улоқтириб ҳаётимни гажак саволлардан, гажак хаёллару гажак йўллардан бегона қилдим. Менга шуниси тузук. Дўстларимнинг нигоҳида думини гажак қилган ҳасад соясидан, ғанимларимнинг умримни тафтиш қилган гажак шубҳаларидан безиган пайтларим сенинг тоза оламингга беркинаман, болалигим. Ва эрта баҳорда шивалаган ёмғирлардай шивирлайман: сенга хиёнат қилмадим...



# Tasallı

Қатра

Якшанба тонги. Ҳорғин ўтган иш ҳафтасидан сүнг хотиржам уйғонаман. Туни билан эринмай ёқкан қор ҳали ҳам тинмаган. Вужудимни кулоқقا айлантириб тинглайман. Тақиллаган совуқдан дарак берувчи құруқ қорнинг шивирловчы товуши эшитилмайды. Ички бир түйгү билан сезаманки, куннинг авзори яхши. Күнгил таскин топади. Манзара бир оз ҳовуриңгни босади. Уйнинг томи худди иморатни босиб қоладигандек ваҳима солиб салкам бир газлик қорга мезбонлик қиласы. Шамол қорни капалақдек у ёқдан бу ёққа учирса ҳам, барибир у замин бағрида күним топаверади. Совуқнинг зуғумига қарши исёндек, тарновдан оқаётган сувнинг чакиллаши күнгилда хотиржамлик ҳиссини үйғотади. Хаёллар қалбимни болалик томонларга олиб қочади. Күзим истамаган ҳолда бир зумда юмилади. Шириң хотиралар... Олтмиш саккизинчи йилнинг серёғин совуқ қиши... Бесабаб жаҳли чиқмайдиган марҳум отамнинг бегубор табассуми... Бирга қор уйча қурғанимиз... Совуқдан портфелнинг темир түқасига ёпишиб қолган бармоқларим... Болалар билан чана, коңықи учишлар, қорбўрон, барчаси кўз қорачигимда кино тасмаси мисол жонланади. Қандай замонлар, қандай инсонлар-а! Шундай улуғлар бу ғам босган дунёнинг пешонасига сиғмади-я! Лазиз хотираларгина қолди холос. Соғинчларим қалбимда худди тушдек оғрикли армон бўлиб қолди.

Ёстиққа кўзим тушади. Унда болаликнинг ушалмаган орзулари оқартирган бир тола сочни кўраман... Ўтмишнинг ёқимли хотираларидан маст бўлган кўнглим, бу сонияларнинг узоқроқ давом этишини жуда хоҳлаб турса ҳам ногоҳ яна бугунги ташвишлар оғушига қайтади.

— Болалар ҳали ҳам туришмабди-да. Демак, ҳовли йўлакларидағи тизза бўйи қорни кураб йўл очаман. Ҳа, яна бозорга ҳам бориш керак. Бугун улфатчилик навбати меники.

Учинчи... Тўртинчи... Бешинчи... Ёниб турган ташвишли юмушлар тартиби чалкашиб кетади. Гўёки барчасига мана шу қор айбордордек. Оғир ғам юки таъсиридан ерга ёпишиб қолгандек иссиқ ўриндан

тургим ҳам келмай қолди. Эринчоқлик билан қўзгалиман. Беихтиёр «Ҳозир шу қор керакмиди? Эртага ёғса бўлмасмиди? Заминга қанча қор керак ўзи? Қанчасига тўяр экан-а? Шуниси ортиқча бўлди-да!» деган фикрлар хаёлимдан тўхтовсиз ўтаверади.

Ҳа, майли. «Яратганга шукур!» деб кунига юз марта дилимда такрорланувчи муқаддас қаломни тилга оламан ва руҳим бирдан ёришиб, ўзимни чексиз ва ниҳоятда ёруғ манзил томон кетаётгандек сезаман. Шуурим унсиз бир маконга кириб қолгандек ҳайрон, кеча у ҳақда ўйлашни журъатсизлик билан ортга сурган ва аслида эса тирикликтин турфа ҳақиқатларидан ранг олган туйғуларни қабул қилишга улгурмай қийналади. Гўёки ғойибдан қалбимга унсиз бир овоз қўйилиб келаётгандек туюлади.

Хушёрликни йўқотма, инсон, шукринг-зикринг бўлсин. Мен – Она табиат бани-башарнинг ризқиман. Сен аҳли оиланг, набираларнинг ризқида кўп ғам чекинг. Умринг мобайнида сени ташвишларга чулғаб, ризқ илинжида югуртирган ҳам менман. Кекса замин инсон зотига тўймагандек, инсон ҳам, белгиланган ризққа тўймайди. Кексайдинг, улуғлик ёшига етдинг. Жонли борлиқни тинглаш, қалбларга қулоқ солиш навбати сеники. Карвоннинг тақдири энди сенинг кўлингда... Маслаксиз ҳаёт ғамларига ботган авлодни тўғри йўлга бошла... Аждодларингдан қолган тирикли ҳикматини излаш пайти келди...

Ёстиқда беозор ястаниб ётган болалик орзулашимга тикилганча хаёлга чўмиб, узоқ ўйланиб қоламан. Ташқарида баҳор элчиси майин шабада эсади. Кўпдан бери жамолини кўрсатмай соғинтирган қуёш тафтидан илҳомланган кун, иморат томидаги арзанда қорнинг тақдирига тан бергандек, аразчан оҳангда овоз чиқариб тарновдан оқишини ўйчан кузатади.

Бўғотда ўтирган бир жуфт мусича бир-бирига таъзим бажо келтириб «ғув-ғув»лайди, тириклик, ҳалол ризқ ва мусаффо, сокин осмон учун миннатдорчилик билдираётгандек Яратганга тинимсиз саловат айтади.

Ёрқин ИНОҒОМОВ

Guliston 2017/5 35





# Устоз сан'аткор

Санъат миллатимиз маънавиятининг кўзгусидир. Унинг қай бир йўналишини олмайлик, ўзининг терандиги, жозибадорлиги, нафислиги билан алоҳида аҳамият касб этди. Инсон тафаккури ривожининг гултоҷи бўлмиш мақом халқимизнинг қалбига сингиб кетган ана шундай юксак санъат намунаси ҳисобланади. Мумтоз мусиқамизнинг йиллар оша сайқал топиб келажак авлодларга мерос қолишида Ҳожи Абдулазиз Абдурасулов, Мулла Тўйчи ҳофиз Тошмуҳаммедов, Уста Олим Комилов, Юнус Ражабий, Тўхтасин Жалилов, Фахриддин Содиков каби етук санъаткорларимиз қатори устоз санъаткор Дадаҳўжа Соттихўжаевнинг ҳам алоҳида ўрни бор.

Дадаҳўжа Соттихўжаев 1920 йилда Тошкент вилоятининг Паркент қишлоғида таваллуд топди. Не ажабки, беғубор болалик гаштини суриб вояга етган бир пайтда ота-онаси қатагон йилларининг қурбонига айланди. Ота-онадан эрта айрилган ёш Дадаҳўжа доира ижроилиги санъатига меҳр қўйди. Ўрта мактабни битириб, тақдир таққозоси билан Андикон мусиқали драма театрига ишга кирди. Бу даргоҳда у таниқли созанда, сурнайчи ва қўшнайчи устоз Аҳмаджон Умрозовдан мумтоз мусиқа сирларини ўрганди. Юсуфжон қизик, Жўраҳон Султонов каби забардаст санъаткорлар сабоғидан баҳраманд бўлди. Дадаҳўжа аканинг ниҳоятда одамоҳунлиги, ҳозиржавоблиги, зукколиги ва шинавандалигига ана шу устозларнинг таъсири катта бўлди десак хато бўлмайди.

1939 йилда ёш Дадаҳўжа Тошкент вилоятининг Янгийўл театрига ишга кирди ва бу даргоҳда узоқ йиллар Тўхтасин Жалилов, Тамарахоним, Камтар Ота боев, Лутфихоним Саримсоқова, Мамъуржон Узоқов, Саодат Қобулова каби санъатимиз даргалари билан ишлашга мусассар бўлди.

1957 йилда Юнус Ражабий Дадаҳўжа Соттихўжаевни ўзбек давлат радиоси қошида ташкил этилган оркестр жамоасига ишга таклиф этди. Орадан иккى йил ўтиб «Мақом» ансамбли ташкил этилгач, у ана шу ансамблда доирачи созанда бўлиб фаолият кўрсата бошлади. «Мақом» ансамблидаги чорак асрлик фаолияти давомида Дадаҳўжа aka етук доирачи дара жасига етишди. Қолаверса, «Шашмақом» пластинкага ёзилган айни йилларда кўпгина таниқли ҳофизларимизнинг кўй ва қўшиклари, ашулалари, чолгу ансамбли ижросида радионинг олтин фондига ёзиларкан, Дадаҳўжа Соттихўжаев доирада жўр бўлди.

Ўзбек доира ижроилиги тарихида ёрқин из қолдирган, қолаверса, доира миллий чолғумиз довругини жаҳонга танитган Дадаҳўжа Соттихўжаев ҳақида гап кетганда, унинг ижроилик услубларида рақс ва мақом

усуллари талқинини алоҳида қайд этиш лозим. Устози Аҳмаджон Умрозовдан ўрганганд мазкур мумтоз усуллар силсиласи бугунги ёш санъаткорлар учун ҳам сабоқ саналади. Шуни қайд этиш лозимки, ҳалқ чақириқ усуллари моҳир ижроилиги Дадаҳўжа aka ижодида якка ва жўрнавозлик ижро ўзига хослиги билан ажралиб турди. Бироқ Дадаҳўжа aka фаолиятида мақом ижроилиги алоҳида ўрин тутади. Дадаҳўжа aka олдида бирор – бир қочирим сайқал топмай ижро этилса, «Олдин бу усулни яхшилаб ўзлаштириш, ўрни келганда, қочирим қилиш лозим», дерди.

Мумтоз ижро ҳақида «Мақом ижроилигида бирор – бир ортиқча ёки кам нота йўқ. Барчаси меъёрида. Шу боис мақом усулларининг қочирими, зеру забари, гиряси ҳам ўзи билан. Унга ортиқча безак бериб бўлмайди», деган фикрлари ҳам бугунги ёш санъаткорлар учун муҳим сабоқ бўлса ажаб эмас.

Устоз Дадаҳўжа aka ансамблъ доирачилигига жуда катта эътибор билан қаради. Шу сабабли бўлса керак, бу усулнинг мураккаблигини эътироф этиб, «Доирачилар кўп, улар орасида усталари ҳам мўл. Лекин ансамблда доира чала оладиган созандалар кам. Бу ишни уддалай олиш учун маълум даражада билим, сабоқдан ташқари ўзида кунт ва истеъодод бўлиши лозим», деб биларди.

Дарҳақиқат, ҳар бир мусиқа чолғусининг миллий мусиқа санъатида ўз ўрни бор. Доира ўзбек мусиқа санъатининг ана шундай муҳим чолғу намуналари сирасига киради. Бошқача айтганда, доира ҳар қандай қалбни ларзага келтиришга қодир сирли кучдир. Бу кучдан илҳом олиб миллий мусиқа санъатимиз ривожига улкан ҳисса қўшган устоз санъаткор Дадаҳўжа Соттихўжаевнинг номи ҳали узоқ йиллар мусиқа шинавандалари, қолаверса, санъатсевар халқимиз қалбida яшайди.

**Дилмурод ИСЛОМОВ,  
Тошкент давлат санъат ва маданият институти  
катта ўқитувчиси**



Муҳаммад ИСМОИЛ

# Chiroylisan tengi ўғ'



\*\*\*

Биздан бўлак ҳеч ким йўқ,  
Бўлса шундай сайёра.  
Сенга севгим айтардим  
Ҳар лаҳзада минг бора.

Муаттар чаманзорда  
Сен осмон, мен ер бўлиб,  
Юз йилларки ўтирасам  
Кўзларингга термулиб.

Соғинчларим билмай дош,  
Ёнгинга айланса гар.  
Ундан миллионта қуёш  
Исинарди муқаррар.

Сен-ла ёлғиз қолсайдик,  
Биздай куйган қайда бор.  
Яна минг ийил яшардик,  
Яна минг бор баҳтиёр.

\*\*\*

Бу нозми ва ёки араз, билмадим.  
Нима гуноҳим бор, гаплашингиз йўқ.  
Сизни севмоқни ҳеч орзу қилмадим.  
Фақат юрагимда ловуллаган чўғ.  
Майли масхаралаб кулинг устимдан  
Бир ҳақиқат менга аён ҳарқалай.  
Барча гўзалларнинг одати зимдан  
Севдириб қўймоқ сўнг, кетмоқ қарамай!

## ГОҲ ШОДМАН, ГОҲИДА...

Гоҳ шодман, гоҳида кўзга келар ёш,  
Гоҳ ойда бўлсан ҳам Сизни кўрарман.  
Келсан, васлингизга беролмайман дош,  
Кетсан ҳажрингизда ўтман, ўртнган.  
Гоҳо бир ҳис дилда инграйди нолон,  
Мен хорни баҳтиёр этди мұхаббат.  
Сиздай нурга лойик бўламан қачон,  
Ожизлигим ошкор этди мұхаббат.  
Гоҳида иқрорман, гоҳо бекарор,  
Гоҳида чукурда чинқирган ғамман.  
Нега Аршингизда айланар ағёр,  
Нега бошим чиқмас арздан, аламдан?!  
Севгилим, севсангиз шу менга ҳаёт,  
Шудир топганим баҳт маржонларини.


Севгилим, кетсангиз йўқ менга нажот,  
Адоғи бўлмайди армонларимнинг.  
Севсангиз бўлгайман ҳар жангга тайёр,  
Ҳар жадалда ғолиб, ҳар он, ҳар қачон,  
Қудратли, енгилмас, мингта жони бор  
Сиз кутган, сиз орзу қилган қаҳрамон.  
Гоҳ шодман, гоҳида кўзга келар ёш.

\*\*\*

Тунлар осмонга боқиб  
Ойни тополмас бўлдим.  
Дилни оловга ёқиб  
Кўзни ёполмас бўлдим.  
Билмадим бу не савдо  
Бўғзимда титрайди чўғ.  
Сенга шайдоман шайдо  
Чиройлисан тенги йўқ.  
Кўзларингнинг сеҳридан  
Гоҳ сархушман, гоҳ нолон  
Сўзларингнинг меҳридан  
Гоҳо хонман, гоҳ бежон.  
Мўъжиза ардогида  
Тақдир кулиб боқсайди.  
Мұҳаббатнинг боғида  
Бир жон бўлиб қолсайдик.

\*\*\*

Мени кучлироқ сев, кечагидан ҳам.  
Керагидан ортиқ, кечагидан кўп.  
Кеча қолмас эди, юрагимда ғам.  
Кеча севар эдинг, керагидан кўп.  
Ҳар лаҳза юз бора мени сўзлардинг,  
Ларзага тушардинг ҳар лаҳза юз бор.  
Юзларинг кўкариб, юз бор бўзлардинг,  
Юз бор улуғлардим, юз бор бўлсанг хор.  
Бугун ҳам сен мени кечагидай сев,  
Кече уни сендан сўрамагандим.  
Эртага емасин юрагимни дев –  
Кечани кўмсаган азиатларим.  
Кеча сен мен билан эдинг хонзода  
Мен ҳамон мұхаббат элтган ойдаман.  
Мен билан бирга бўл сархуш фазода,  
Кечагидай сев ва кетма самодан.  
Қоқ икки бўлинниб кетмасин фалак  
Қоқ икки бўлинниб, бўзламасин ой.  
Фақат сени дея уради юрак  
Фақат сени учундир кўксимдаги жой.



# Ig'vogar zag'iżg'on

Чабуа АМИРЭДЖИБИ  
Грузия адиби

Кўркам ўрмон тўрида адолат столи зеб бериб турибди. Барча жониворлар томонидан унинг курсисига шер ҳакам этиб тайинланди. Кунларнинг бирида тулки, эшак ва какку зағизонни суд қилиш учун шер ҳузурига олиб келдилар. У кўзойнагини тақиб, наъра тортганча деди:

– Хўш, қани айтинг, бу зағизон нима айб иш қилди?

Тулки тавозе билан гап бошлади:

– Зағизон мени думсиз дея миш-меш тарқатди. Унинг айтишича менинг думим йўқ эмиш. Ҳолбуки, думимни қўришмасин, деб яшириб юрар эдим. Хуллас, мен ҳақимда бошқа гийбат қилишмасин деб бугун думимни ҳўрпайтирган ҳолда кўз-кўз қилиб юраман. Буни қаранг-ки, овчилар кўзига ҳам жуда тез ташланадиган бўлиб қолдим. Энди ўйлаб қўринг, ҳурматли судья, думсиз яшаш, ахир бу қандай ақлга сифади?.. Ўзингиз одил қарор чиқаринг! – деб тулки шернинг олдидаги стол устига думини кўяди. Унинг думи ўқлар ялаб ўтавериб, куя егандек илвираб қолганди. Шер кўзойнагини қулайроқ қўндириб, диққат билан тикиларкан, чуқур ҳўрсиниб кўйди ва:

– Қандай гўзал, ажойиб дум! Бу каби дум ўрмондаги ҳеч бир ҳайвонда бўлмаган! – дея, у зағизонга юзланиб – Сен не сабабдан ифво тарқатдинг? – деди.

– Мен унинг бунаقا ажойиб думи борлигини билмаган эканман. Хато қилибман, кечиринг! – жавоб қилди зағизон.

– Ўзинг билмаган нарса ҳақида гапирган экансан, демак, сен – ғийбатчисан! – деди шер.

Сабрсизликдан тоқати тоқ бўлган эшак шерга қараб:

– Зағизон мен ҳақимда ҳам ифво тарқатди. Унинг айтишича, мен овозсиз эканман. Ҳолбуки, менинг нақадар ёқимли ва хушовоз эканлигимни барча билади-ку. Мен ҳаммага эшитилсин деб, баланд овозда ҳанграшимга қарамай, ҳўжайним мени асо билан савалайверади. Ҳурматли судья, ахир бу мен учун ноҳақлик эмасми?!

Шер кўзойнагини тўғирлаб, ён томонга, эшакка кўз югуртириди ва зағизонга қаратса:

– Эшак қишлоғидан туриб қачон ҳанграса, бу ўрмонда мени титроқ босади. Сен нимага ёлғон гапирасан? – деди.

– Менга эшакни овозсиз деб таърифлашганди. Мен янгилишибман, кечиринглар мени! – жавоб қилди зағизон.

– Кўп гапирма, – ўқирди шер, – ортиқ сени ҳеч ким эшитмайди, етар, бас! Ғийбатчи!

Шер каккуга қараб:

– Хўш, сенга қандай тухмат қилди зағизон? – деб сўради.

Какку йиғлаганча гап бошлади:

– Унинг айтишича, менинг ўз иним йўқ эмиш ва мен бир дона ҳам тухум қўёлмас эмишман. Барча қушлар зағизоннинг айтганлари ёлғон эканини билишсин, деб ҳар баҳорда бегона қушларнинг инига тухум кўяман. Бирор, не афсуски, ҳаётим ўзимга баҳтсиз бўлиб туюлади!.. Болаларим бегона инларда ўсиб вояга етади, мен эса бу қайғу туфайли куйламай қўйдим. Фақат, йиғлаганим-йиғлаган: «Ку-ку! Ку-ку! Ку-ку!»

Шер ғазабдан зағизонга ўқирди:

– Эй, ғийбатчи! Сен тарқатган фисқу-фасод туфайли тинчлик йўқ! Унинг калта думини чўзинглар! Ҳа, узунроқ қилиб чўзинглар! Унинг қандайлигини бутун қушлару ҳайвонлар яхши билиб қўйишсин!

Рус тилидан Бекмурод БАРДОШ таржимаси

# RIZG'ANCHIQ



Xudoyberdi TO'XTABOYEV,  
O'zbekiston xalq yozuvchisi

Shirin-shakar mevalarga boy Katta Tagob qishlog'ida Shavkatjon degan bir bola yashardi. U o'zi esli-hushli, tirishqoqqina edi-yu ammo qizg'anchiq edi. O'qishlari ham chakki emas, hatto ikki marta «5» baho ham oldi. Xullas, hammasi joyida edi-yu, lekin qizg'anchiq edi-da!

O'rtoqlaridan birontasi:

- Shavkatjon, daftaringdan bitta berib tur, – deb qolsa, Shavkatjon darrov qovog'ini soladi-da:
- Bor-yo'g'i 20 ta daftaram qoldi, senga bersam, o'zim nima qilaman! – deb darrov teskari o'girilib oladi. Ertasiga orqa partada o'tirgan do'sti:
- Shavkat, bitta narsa so'rasam maylimi? – deb qoladi.
- Nima ekan, avval ayt-chi... – deydi Shavkatjon qo'rqib ketib.
- Ruchkam sinib qoldi, – deydi haligi do'sti.
- Yo'q-yo'q! – deb do'stining gapini bo'ladi Shavkatjon, – o'zi beshtagina ruchkam bor. Senga bersam, ado bo'lib qoladi.

Zarur bo'lгanda undan hech narsa olib bo'lmaydi. Hatto uyidan olib kelgan nonu mevalarni ham yashirib eydi. Bir kuni bitta tuxum olib kelgan ekan, birovga ko'rsatmasdan yeb ola qolay deb, butunicha yutib yuborgan shekilli, tigilib ko'zlar olayib ketgan.

Shavkatjonning katta qora papkasi bor. Qo'liga nima tushsa, papkasiga joylab oladiyu qaytib birovga ko'rsatmaydi. Sheriklari papkasini ochib, ichini bir ko'rsak bo'lardi, deb ko'p urinishgan. Biroq uddasidan chiqa olishmagan. Bir kuni papkasi qo'lidan tushib ketib, sharaqlab ochilib ketgan. Bolalar atrofga sochilgan eski ruchkalar, uchlari singan qalamlar, cho'tka, yedirilib ketgan o'chirg'ich, xullas, tasmaning taqasi, choynakning qopqog'ini terib bergunicha uning esxonasi chiqib ketgan.

Shavkatjonning mahallasi maktabdan ancha olis, soyning narigi tomonida. Soy ustiga o'rnatilgan katta ko'priordan o'tib bolalar maktabga qatnashadi. Bir kuni Shavkatjon ko'priq chetiga o'rnatilgan temir to'sinning ustidan dorbozlarga o'xshab yurib ko'rmoqchi bo'ldi. Bolalar qiziqib, chuvlashib uni tomosha qilishardi. Nimadir bo'ldiyu muvozanatini yo'qotib, bir tomonga og'ib ketay dedi. Shunda o'zini eplab olguncha papkasi qo'lidan tushib soyga oqib ketdi. Bolalar soy bo'ylab

ancha joygacha yugurib borishdi. Baribir papkani tutib olisholmadni. Shavkatjon yig'lab sinfga kirib bordi.

- Nega yig'laysan? – so'radi muallim.
- Papkam oqib ketdi, – deb battarraq yig'lay boshladni u.
- Ehtiyyot bo'lish kerak. Mayli, papkating yangisidan olib berishadi. Buguncha joyingga o'tir.
- Axir, daftar-qalamim yo'q...
- Muallim Shavkatjonni joyiga o'tqazdi va sinfga murojaat qildi:
  - Qani, bolalar, kimda ortiqcha daftар bor?
  - Ko'pchilik bolalar darhol qo'l ko'tarishdi. Shavkatjon baribir ho'ngrab yig'layverdi.
  - Endi nega yig'laysan? – so'radi muallim.
  - Axir... ruchkalarim ham oqib ketdi-da!
  - Bolalar, kimda ortiqcha ruchka bor?
  - Hamma bolalar baravar qo'l ko'tarishdi. Darrov Shavkatjonning partasiga daftar, ruchka, qalam, chizg'ich, hatto, rasm qalamlar ham kelib tushdi.
  - Shavkatjon yig'idan to'xtab, kafti bilan ko'zyoshlarini artib, parta ustidagi narsalarga tikilib qoldi. Bir nafas jum qoldi-da yana ho'ngrab yubordi.
  - Iye, tag'in nimaga yig'layapsan? – deya hayron bo'ldi o'qituvchi.
  - Endi, endi uyalanimdan yig'layapman, – deb qo'llari bilan yuzini berkitib oldi Shavkatjon, – uyalib ketyapman...





Гулчехра ҚҰЛДОШЕВА

# Sahna ortidagi hangomalar

## УНДА РОЗИМАН

Бухоро театри Тошкенттеги келганини эшитган Баҳтиёр Ихтиёров устозлари – Ҳаёт Наимов, Аҳмаджон Файзиев, Жаъфар Үзумов, Соли Қодировларни уйига таклиф қилибди.

– Шошганимиздан Бухородан у-бу нарса олиб чиқмабмиз. Қуруқ қўл билан Баҳтиёржонниги қандоқ кириб борамиз? – дебди Аҳмаджон ака.

– Эй, шўрданак олиб келиш ҳам эсга келмабди. Баҳтиёржон бир хурсанд бўларди, – дебди Жаъфар ака.

– Менда икки килоча шўрданак бор, бироқ... – дудуқланибди Ҳаёт ака.

Ҳаёт аканинг қитмирлик қиласётганини сезган Жаъфар ака:

– Бўлмаса бундоқ қиласмиз, – дебди. – Сиз меҳмонхона ёнида ўтириб, шўрданагингизни сотасиз. Биз савдолашиб сотиб оламиз.

– Ҳа, унда розиман, – дебди Ҳаёт ака шошиб.

## ЧОЙ ДАМЛАШГА ҲАҚЛИСИЗ

Ўзбекистон халқ артистлари Ҳаёт Наимов ва Аҳмаджон Файзиев бирорнинг кўнглини оғритмаган инсонлар эди.

Бирорга иш буюрмоқчи бўлса-да, ўзига хос йўл тутишарди. Ёшларга «паспортларингиз борми?» дейишлари билан даврадаги энг ёш актёр ўзи билиб чой дамлаб келарди.

Бир куни давраларида эндиғи-

на ишга келган Шамсиддин Йўллиев ўтирган эди.

– Паспортиңиз борми? – деб қолди Ҳаёт ака унга қараб.

– Ҳа, – деди шошиб Шамсиддин ака ва чўнтағидан паспортини чиқариб беради. Ҳаёт ака паспортни олиб у ёқ-бу ёғини кўрган бўлиб, сўнг мулойимлик билан унга паспортини ва бўш чойнакни тутқазиб:

– Жуда яхши. Чой дамлашга ҳақли экансиз, – дейди.

## ҲУШТАГИНГИЗНИ ЧАЛАВЕРИНГ

1975 йил. Театр жамоаси Хоразм сафарида бўлганларида «Филлар менинг дўстларим» кинносини кўришиди.

Сафардан қайтаётганларида Аҳмад ака фильмдаги қўшиқларни хуштакда чала бошлади. Аҳмаджон Файзиев эса унга мулойимлик билан «мумкин бўлса, хуштагингизни бас қилсангиз» деди. Аҳмад ака устозига «хўп» деди-ю, шумлиги тутди.

– Ая, Зухрани ўйнаганингизда неча ўшда эдингиз? – деб сўради у Хосият Қобулжоновдан.

Саҳна қироличаси бўлган актриса бир сўзга тушса, тўхтатиш қийин эди. Ая йўл бўйи таржимаи ҳолини сўзлаб кетди. Автобусдан тушар эканлар, ранглари оқариб кетган Файзиев:

– Аҳмаджон, мабодо яна автобусга ўтирасак, истаганингизча хуштагингизни чалаверинг, мен рухсат бердим, — дермиш.

## ҚАНДАЙ БАЖАРАЙ?

Театр ярим йиллик режани бајармаганингами, директор тажанг бўлиб ўтирганда хонага бош дирижёр Учқун Наимов кириб, соғлиғидан шикоят қилиби.

— Билмадим, қанақа касалга чалиндим? Бирданига ўз-ўзимдан орқага йиқилиб кетаман. Докторларга учрайми?

Акобиров ҳали жавоб беришга улгурмасидан, бош режиссёр кириб келиби.

— Билмадим, қанақа касалга чалиндим? Бошимнинг teng яримдан товонимгача терлайман, сувга ботаман. Докторларга учрайми?

Шу пайт жиринглаган телефон гўшагини кўтарган директор:

— Билмадим, режани қандай бажараман, ҳамма ғалати касал бўлса? — дебди.

## ОТНИНГ ҚАДРИ

Театр жамоаси «Равшан ва Зулхумор» спектакли билан Хоразм вилоятига сафарга боришди. Спектакл қанчалик яхши ўйналмасин, томошабин олқиши унчалик сезилмабди. Бундан норози бўлган Аминжон Акобиров «Эртага саҳнага тирик отни етаклаб чиқамиз» деб таклиф киритиби. Дарҳақиқат, иккинчи кун саҳнага актёр от етаклаб чиқди. Шунда қийқириқ, олқишлиар янграли.

— Эҳ, отнинг қадри бизнидан шунчалик улуғ экан, билмай юрган эканмиз, — дермиш бош чайқаб Жаъфар Үзумов.

# Elning baxshisi – уаҳешши

Халқимиз орасида шундай бахшилар, оқинлар, гўянда ва жировлар бўлганки, ҳар бир ҳудуд уларнинг номларини эъзоз билан тилга олган. Самарқанд вилояти Каттақўғон туманида яшаб ижод қўлган Нормуҳаммад Абдибой ўғлиниң номи ҳам достончилик анъаналарини давом эттирган, бойитган бахши-шоирлар қаторида тилга олинади. Халқ орасида Нурмон шоир тахаллуси билан донг таратган бу инсон 1862 йилда Каттақўғон туманига қарашли Энамяхши қишлоғининг Ачамайли элида туғилган. Маърифатли, оқсоқол бобоси Аҳмад Охун тарбиясини олган. У кишининг эл ичидаги, халқ сайлларида, тўй ва маъракаларда сухбатларини тинглаб катта бўлган. Ёш Нормуҳаммад қалбида ўз элига, юртига муҳаббат, ота-онасига ҳурмат ва эҳтиром туйғулари Аҳмад оқсоқолнинг ўғитлари боис бўй кўрсатган бўлса ажаб эмас.

Балоғат ёшидаги Нормуҳаммад чорвага ҳашак йиғиши мавсумида янтоқ чопишга чиқар, нонуштани ҳам янтоқ ғарами соясида қилар экан. Ўримга чиқсан ёш-ялангларни йиғиб, кетмоннинг дастасини чертиб, термалар айтиб берар экан. Бир термасида ўзи ҳақида куйлаб, янтоқ ғарами соясида ухлаб қолгани, тушида бир нуроний чолни кўргани, чол ундан «Кўтонингга берайми, томогингами?» деб сўраса, шоша-пиша томогимга деб жавоб бергани, ана шундан сўнг достонлар, термалар куйлаётганини қўшиқ қилиб айтиди. Бунга бирор ишонади, бирор ишонмайди. Бироқ ўткир зеҳни билан халқ оғзаки намуналарини хиргойи қилиб айтиши кўпчиликнинг эътиборини тортади. Аҳмад Охун достон тўқиб, уни ижро этишига қизиқиши кучли бўлган неварасини Сарой-кўғон қишлоғилик Абдулғолиб бахшига шогирдликка беради. Саводи йўқлигидан Нормуҳаммад ёзишни, ўқишини билмасди. Энг катта қуроли кучли хотираси ва ўткир зеҳни эди. Тўй ва гаштакларда устози ижро этган барча достонларни ёдлаб олишга ҳаракат қилган.

Ўзбек фольклори жонкуяри бўлмиш академик Ҳоди Зарипов маълумотича, Нурмон бахши ўн бешдан ортиқ достонларни ёддан билган ва ижро этган экан. Достонни ижро этиш учун кучли хотирасидан ташқари, ўткир овози билан ҳам ажралиб турган. Тўйлар, сайлларда достонни тўлиқ томошибинга етказиш учун энг юқори октава товуш соҳиби бўлиш талаб этилган. Бу имконият

Нурмон шоирда етарли бўлиб, устозидан ўрганган достонлардан ташқари, ўзи тўқиган термаларни ҳам кўшиб айтган.

Шоир ўзининг тўқиган термаларида гоҳ замона воқеаларидан куйлаган бўлса, гоҳида давр илгорлари – тенгдошларининг файратидан кувониб қўшиқлар айтган. У ўз даврининг фидойиси, юрт учун, Ватан бахти, саодати, мустақиллиги учун жонини берган миллат фарзанди Номоз Пиримкул ўғли ҳақида жўшиб куйлади. Термаларида уни фаҳр билан қайта-қайта тилга олади. Жиззах давлат педагогика институти профессори У.Жуманазаров шоир ижод йўлини ўрганиб: «Каттақўғонлик Нурмон шоир ўз қўшиқларида Номоз ва унинг йигитлари томонидан олиб борилган шиддатли курашлар Николай пошшони ҳам, Бухоро амирини ҳам жиддий ташвишга солиб кўйганлигини куйлади», деб ёзади. Чунки Нурмон бахши халқ озодлиги курашчиси Номоз ботирга атаб достон яратди:


**Умрим бўйи ҳазар қилдим номардларнинг  
пулидан,  
Дардларимни баён этдим Номоз полвон  
тилидан,  
Мендан олдин чиқсан эмас шоир найман  
элидан,  
Нетай қадр тополмадим ўз тугилган  
элимда.**

Буларнинг натижасида генерал-губернаторнинг фармонига асосан Нурмон шоир ҳам 1919 йили қамоққа олинниб, савол-сўроқсиз Каттақўғон турмасига ташланди

З.Қодиров Нурмон бахшига котиб бўлиб юрган чоғларида шоирнинг олтида достонини кўчириб олган, 1928 йилда кўчирилган «Алномиши», «Гўрўғли», «Аваҳон», «Қаландаршоҳ» каби достонлар шунингдек, «Кунтуғмиш», «Номоз» достонлари, бунга мисол бўлади. Бахши яна ўнлаб термалар яратган: «Саркамни бер, Бойқаро», «Темир йўл», «Деҳқони бор ўзбекнинг», «Чигиртка», «Очил дав», «Дўмбирам» кабилар шулар жумласидан.

Нурмон шоир ижоди ҳақида академик Ҳоди Зарипов, профессорлар Тўра Мирзаев, Умрзоқ Жуманазаров, Бозорбой Ўринбоев, адабиётшunos олимлар С.Сироҷиддинов, С.Умиров тарихчилар Н.Норқулов, Ю.Александров, А.Пяковский ва бошқалар илмий мақолалар ва китоблар, дарсликлар ёзганлар, «Ўзбек фольклори» хрестоматиясига киритилган «Номоз полвон» достони кўп тадқиқотларга асос бўлиб келмоқда. Нурмон шоир Абдибой ўғли 1939 йили 77 ёшида оламдан ўтди.

Дилдора АННАҚУЛОВА



**P**еспубликамизнинг ҳар бир ҳудуди ўзига хос анъаналари ва урф-одатларига эга. Шундан келиб чиқиб, лиbosларда ҳам умумийликни, ҳам алоҳида жиҳатларни ўқиши мумкин. Юртимизнинг сўлим, хушманзара гўшаларидан бўлмиш Қорақалпоғистон ҳудудининг ҳам ўзига хос лиbosлари ва безаклари мавжуд. Мустақиллигимизнинг 26 йиллигига бағишлаб, Ўзбекистон Бадиий академияси Қорақалпоғистон Республикаси бўлими кўргазмалар саройида «Қорақалпоқ миллий лиbosлари» кўргазмаси ташкил этилди. Кўргазмага қўйилган ҳар бир лиbos ёки буюм томошибинларни завқлантириб, ўзига маҳлиё этди. Ушбу саҳифада И.В.Саевицкий номидаги қорақалпоқ давлат санъат музеиу этнография бўлими бошлиғи Айгул Пирназарова билан қорақалпоқ лиbosлари оламига саёҳат қиласиз.

– Айгул опа, бизга қорақалпоқларнинг ўзига хос лиbosлари хусусида сўзлаб берсангиз.

– Қорақалпоқларнинг ҳам бошқа ҳудудларга ўхшаб қадимдан тўй ва байрамларда киядиган лиbosлари, кундалик кийимлари, қиладиган ишларига қараб киядиган жомалари бўлган. Бу анъана ҳозирги пайтгача сақланиб қолган. Ҳайит ва тўйларга алоҳида бе-закли, кундалик турмушга қулай, фаслларга қараб қалин, астарли, енгил кийимлар кийилади. Яъни тўй-маросимларда кўпроқ миллий лиbosлар кийилса, бошқа вақтларда аёлларимиз замонавий ҳамда мавсумий кийинадилар. Қолаверса, замонавий ёхуд мавсумий кийимларга ҳам қизларимиз бирор нақш туширишни,

тақинchoқлар билан безаб уйғуллаштиришни хуш кўришади.

– Қорақалпоқ лиbosларининг тарихи ҳақида нима дея оласиз?

– Қорақалпоқларнинг энг қадим лиbosлари – эркакларнинг морили чопонлари, чакмони, сувсар пўстини, чўгirma, телпак, қалпоқ, тақия, бўрк, бейкама этик, булғори этик, маҳси-ковуш, шунингдек, хотин-қизларнинг лиbosларидан кобинча, кистали каби кийимларни санаб ўтиш мумкин.

– Эътибор берсак, ҳар бир кийимда каштацилик намуналири яққол кўзга ташланади...

– Қорақалпоқ қизларининг чеварлигини кўрсатадиган энг машақатли ҳунар каштацилик тикишга ўз ҳиссаларини қўшиш-

хисобланади. Бунинг мисоли сифатида келинларнинг тўйга, яъни турмушга чиқаётган пайтида киядиган кўк кўйлагини айтсак бўлади. Кўк кўйлак бор бўйича қўлда ишланади, пахта чархда йигирилиб, дастгоҳда тўкилади ва кўк рангга бўялади. Бўялиш жараёни ҳам бир неча босқичлардан иборат. Сўнг турфа рангли иплар билан дарахт, совут ва сирға акс эттирилган нақшларда кашта тикилади. Кўйлакнинг олд қисми матонинг асоси кўринмайдиган ҳолда тўлиқ нақшланади. Бу ёш келинчакнинг латофатига, чиройига қиёсланади. Битта кўк кўйлакни қизлар 6-8 йил давомида тикишган. Яъни қизалоқлар улғайгач, вояга етгунича кўйлакни тикишга ўз ҳиссаларини қўшиш-

ган. Хуллас, кўйлакнинг айнан кўк рангда бўлиши сабабига келсак, ҳалқ орасида эскидан дарё ва денгиз бўйларида яшаган аҳоли ундан илҳом олиб тиккан, деган нақл бор.

– Шу ўринда келинлар лиbosларига алоҳида тўхталиб ўтсангиз.

– Қорақалпоқ келинларининг миллий тўй лиbosлари беш кийимдан иборат: кўк кўйлак, қизил кийимшек, ипак жегда, турме, зар ковуш. Қизил кийимшекка узатиладиган қизлар олти ёшидан бошлаб кашта тикиши шарт ҳисобланади. Эътибор қилинса, унинг нақшлари пастдан юқорига қараб мукаммаллашиб боради. Яъни қиз тобора чевар бўлгани сари тикиши ҳам гўзаллашиб, якуни жуда чиройли тугайди. Қорақалпоқларда «Олти ёшда бошласанг, оширасан, етти ёшда бошласанг, етказасан», деган нақл шундан қолган. Момоларимизнинг қизларни ҳунарга солишдаги доноликлари уларга сабрни, бўш вақтдан унумли фойдаланишни, дидини шакллантиришни, гўзалликка интилишин ўргатища кўринади.

Ипак жегда бошга ёпилади. Унинг ҳам тик ёқасига нақш ти-

килади. Зарли ковуш теридан ошлаб, ийланиб таёланади ҳамда юза қисмида кумуш ипакда кашта тикилади. Айрим овулларда қизларга пошшой ёки шатраш кўйлак кийидириб узатилади.

– Бош кийимлардаги алоҳида жиҳатлар хусусида ҳам гапириб берсангиз.

– Қорақалпоқларнинг бош кийимларидан энг сараси келинларнинг саукелеси бўлиб, унинг ҳам ўз тарихи мавжуд. Жуда қадимги даврларда урушларда иштирок этган момоларимизнинг совутсимон бош кийимлари даврлар оша жилоланиб, нозиклашиб, нақши нигорлар билан безатилган. Бугунги кунда мазкур кўринишдаги бош кийимлар келинларнинг сарполаридан жой олган. Уларнинг бўйинга осилиб турадиган қисмига мунҷоқлар ҳамда ораларига ёғочдан қилинган безаклар тизилган. Бу ҳол келинчак серфарзанд, сердавлат бўлсин деган маънони англатади. Соchlарининг учига тақиладиган жамалак (шашба)лар ҳам қизалоқлар, келинчаклар, ёш оналар, қолаверса, катта ёшли аёллар учун алоҳида тайёрланган.

– Нафақат жамалаклар, бошқа лиbos ва тақинchoқлар ҳам ёшга қараб тикилгани сезилади.

– Ёш қиз-келинчаклар кийимлари, одатда, қизил рангли бўлиб, уларнинг нақшлари измаиз усолда тикилади. Қизил кийимшек, ипак жегда, женуш,


кўлга кийиладиган енг (женгсе) каби лиbosларга гуллар, дарахтлар, айримларида қушлар, баъзан геометрик нақшлар кўзга ташланади. Бунда ўсимлик нақшлари овулдагиларнинг хўжалик ишлари билан, жоноворларнинг акси эса чорвадорчилик ишлари билан шуғулланганликларини билдиради, яъни ҳар бир нақш ўз ўрни ва маъносига эга. Катта ёшли онахонлар, момолар оқ рангли лиbosлар кийишган. Бунинг маъноси уларнинг ҳаётда тажрибали ҳамда пок ниятили та-барруқ зотлар эканидан далолат беради. Мазкур лиbosларнинг тикилиш усули ҳам бошқа аёллар лиbosларидан фарқ қиласиз.

– Шу ўринда заргарлик хусусида ҳам тўхталиб ўтсангиз.

– Бизда заргарлик ҳунари жуда қадимдан ривожланган. Ҳар бир овулнинг ўз заргарлари бўлиб, улар ўз ҳунарларини авлоддан авлодга мерос қолдирган. Улар бош безаклар, бўйин тақинchoқлари ва кўлга тақиладиган буюмлар тайёрлашган. Бош безакларига зирак, арабек, мунҷоқлар киради. Бўйин тақинchoқларига эса айшик, ҳайkel, тумалар, онирмунҷоқлар киради. Қўл безаклари ҳам ўзига хос бўлиб, турли кўринишдаги билакузук ва узуклар шулар жумла-сидандир.

– Мазмунли сухбатингиз учун ташаккур!

Нигина ИСМОИЛОВА  
сухбатлаши



## Liboslar qatimidagi sirli jilolar

(Давоми. Боши 18-19-бетларда)

Бизда улуғ меҳмонга түн кийдириш ёки яхши кунларини нишоналаётган одамнинг елкасига түн ташлаш одати бор. Шу урфдан келиб чиқиб, бу одат ҳам каттариб (балки майдалашиб) кетган. Энди куда қолиб унинг барча яқин қариндошларига навбатчи түн улашилади. Баъзи хонадонлар борки, навбатчи тўнлар сандиқ-сандиқ бўлиб кетган. Тўй қайси тўйхонада, қачон бўлишини келишиб оладиган пайтда шунаقا ортиқча матоҳларни эркак бўлиб кўтариб юрмайлик, деб келишиб оладиган қудалар ҳам борми? Куни кеча қиз узатмоқчи бўлиб юрган қўшним арзи ҳол қилиб қолди: «Мен келин салом учун қуда томоннинг ёшу қарисига, бўлажак кўёвнинг икки акаси, икки янгаси, уларнинг фарзандларига ҳамма нарсани тайёрлаб қўйганман. Энди ош берган кунимиз ҳам эркак қудамга пальто, катта ўғилларига куртка олишим керак экан. Ҳам саломда, ҳам ошда сарпо берадиган бўлсам, бошқа нарсаларга қандай пул етказаман», дейди у қақшаб. Яхшида, замонавий эркаклар қуданикidan келган кийимлар билан қишини чиқаришади. Кейинги қишигача бешик тўйи бўлиб қолса, яна сарпollar тайёр! Аслида бу ишларга бош қўшмайдиганлар ҳам топилади. Лекин тўйдан кейинги гап-сўзлардан қочиб «эл қатори» тўй қилишга муккасидан кетганлар ҳам бор. Яқинда иккала қуда келишиб, майда-чўйда сарф-харажатлардан холи тўй қилишди. Қиз тараф келинга сарпо қилди, куёв томони куёвга. Бироқ асосий гап тўйдан кейин келиб чиқди. Куёв ўртоқлари билан дам олишга чиқмоқчи бўлган. Эски спорт кийимида чиқиб кетаётса, онаси «Ўртоқларинг олдида уят бўлди, янги уйланган йигит янги кийимда кўчага чиқиши керак. Қайнонанг ҳам номига бўлсада, бирорта сарпо қилмади», деб келинни «чақиб» олган. Яна кўйди-чиқди. Яна борди-келди.

Энди тўйдан кейинги тўйчиқларнинг ҳам майда гапларию катта харажатлари ҳақида. Бизда тўйгача «оқ ўрар», «куда таниш», «мол ёяр», агар туғилган кун, байрамлар чиқиб қолса, яна йўқловлар расамади билан бажарилади. Тўйдан кейин эса, «келинсалом», «қовурдок», «чаллар»... Хуллас, бу ёғи олинг қуда, беринг қуда. Бу йигинлар учун яна битта тўйнинг харажати сарфланади, ахир.

Катта акам уйланганида мен иккинчи синфда ўқирдим. Тўйдан кейинги кунлар эди. Бир куни эрталаб икки хотин тугун кўтариб уйга келишди. Улар олиб келган тугунчада бир коса қовурилган гўшт бор экан. Уни келинчакка киргазиб беришли. Бу удумнинг маъносини кейинчалик тушунганман. Келин янги уйга мослашгунча, хонадон соҳибларидан тортиниб кам овқат тановул қилади. Шунинг учун унга яқинлари шунаقا йўқлов олиб келишса керак... Энди бу удум ҳам каттариб, битта косача бир нечта тоғрага айланиб келиннинг ҳақини егани қўни-қўшни, қариндош-уруғлар чиқиб оладиган бўлишган. Тўғри, республиканинг ҳар бир ҳудудининг ўз урф-расмлари бор. Бироқ ҳамма жойда ҳам ортиқча чиқимлар, катта-катта харажатлар ортида майда гаплар ва яна

улкан муаммолар пайдо бўлмоқда. Бу хусусда кўп ва хўп ёзилди, гапирилди. Айниқса, Президентимиз шу мавзуни алоҳида кўтариб чиқиб, тўйларнинг энг серҳаражати ҳам Тошкент шаҳрига, ажримларнинг кўпи ҳам пойтахтга тўғри келаётгани ҳақида куйиниб гапириди. Тўйлар бироз тартибга келиб қолар, бироқ тўй олди ва кейинги маросимларни ҳам қисқартириш вақти келмадимикан?

Яқинда қариндримизницида бешик тўйи бўлди. Қандай яхши, бир инсон дунёга келди! Бу хурсандчикликини баҳам кўриш учун қариндошимиз бизни чақириди. Хизмат қилиб юриб, шу маросим ҳам катталашиб кетганига куйиндим. Бир йил олдин қудаларнинг уйини тўлдириб берган бечора келиннинг ота-онаси энди чақалоққа керак бўладиган барча ашёларни юқ машинасида карнай-сурнай билан олиб келишиди. Шовқин-сурон ичидаги қулоғимга чалинган бир гап мени карахт қилиб қўйди. Юқ машинасидан буюмларни тушираётган ёш-яланглар орасида чақалоқнинг отаси кўринмади. Қудалар бешикни фақат куёв уйга олиб киради, ирими шунаقا дейишди. Бирор харажат билан дўконга чиқсан куёв топиб келинди, бешик уйга олиб кирилди, кейин каравот, коляска, аравача, боланинг гигиеник асбоблари, аптечка, сўрғич ва ўн-ўн бешта тоғора... Ҳаммаси суратларга туширилиб, тарихга муҳрланди. Қайнонаси безатиб олиб келган бешикни куёв уйга олиб киради, деган ирим қулоғимда қолиб кетди. Агар шундай бўлса, болани дунёга келтирган ота уни таъминламайдими?! Хуллас, ўзимиз ўйлаб чиқсан удумлару иримлар билан ҳаётимизни ўзимиз қийинлаштириб ташлаганмиз.

Мамлакатимизда олиб борилаётган кенг кўламили ислоҳотлар туфайли одамларнинг яшаш тарзида, онгу руҳиятида яхши янгиликлар рўй бермоқда. Ташаббус ҳалқдан ҳам чиқиши керак. Чиройли ва чиқимсиз тўй ўтказиб, ўрнак бўлиб, намуна бўлиб чиқадиганлар кўплайсин. Нафақат пойтахтимиз, вилоятлар, чекка қишлоқларда ҳам тўй қиламан деб бели оғриётганлар камайисин. Нима учун хомушсиз, деса, эээ, тўй қилишим керак, деб эмас, тўй қилмоқчиман, деган одамларнинг юзидағи табассумга шериллик.

Халқимизда топганимиз тўйга буюрсин, деган чиройли истак бор. Бу бир қарашда яхши. Бир томондан тўй учун топаман деб чет элларда иш излаб юриш дегани эмас, қиз узатаман деб қарзга ботиш дегани эмас, ўғил уйлантираман деб фонограммачи яллачиларни фалоон пулга олиб келиб, боласининг ўқиши учун китобга пул топа олмай қолиш дегани эмас. Қизларимизнинг сепига бир сандиқ китоб олиб берайллик. Сеп кўргани келганлар пардасига, мебелига ёки идишларига эмас, маънавиятига тасанно дейишсин. Топганларимиз нафақат тўйларга, фарзандларимизнинг ўқишига, бошқаларга кўмак беришга, невараларимизга кутубхоналар ташкил қилиб беришга ҳам буюрсин. Сиз нима дейсиз, азиз журналхон?

**Манзура ШАМС**

# «Gashtak» muhimmi, yoki tarbiya?

«Оммавий маданият» деган оғат сарҳад билмай, ими-жимида ҳаракатланаяпти. Келинг, унинг таъсирида ёпирилиб келаётган иллатлар хусусида тўхталайлик.

Мана, бир тоифа оналар ресторонга келиб ўтиради. Бўйниларида ялтираган, бармоқларида милдиран зеб-зийнатдан атроф ёришиб кетди. Дастурхондаги таомларни санаб ўтирмаймиз. Ҳатто спиртли ичимликлар ҳам бўй чўзиб турибди. Уларнинг овози баландлашмоқда. Энди ким гапиряпти, ким тинглаяпти, деманг. Тингловчи йўқ. Ҳамма гапиряпти.

Мусиқа вадаванг бўлганда, ўйинга тушиб, пасайганда гийбатлашиб, кийган либосларини, тақсан тақинчоқларини кўз-кўз қилиб ўтиришади. «Бир ойда тўртта гаштагимиз бор, – дейди бир аёл. – Ҳали бу ўғлим, ҳали униси пул жўнатиб турмаса, ойига фалон сўм кетади. Гаштак навбати тегиб қолса, дастурхон учун бир дунё харажат. Келинимнинг ҳам учта гаштаги бор. Иккаламизники бир кунга тўғри келиб қолмасин, невараларга ким қарайди, деб ташвишланаман доим».

Ташвишини қаранг онанинг. Оиладаги аёлларнинг гап-гаштаги учун ҳам камида бир ярим миллион сўм керак экан. Аёлларнинг ҳар сафар гаштакка бир хил кийинаманми, деган иddaоларини ҳам қўшсак, қор қалин ёғадиган томонларга чиқиб кетган йигитларни тушуниш мумкин.

## ОНАЛАР ҲАММА ДАВРДА БИР ХИЛМИ?

Бир зум кўз юмид кечаги оналарни эслайлик.

Фарзандлари таомланиб кетгандан сўнг дастурхондаги ушоқларни еб қаноат қилган, қашшоқлик, йўқчиликни бошидан ўтказган, уруш кўрган момоларимиз. Сандал атрофида болаларини тўплаб, эртак, достон ўқиб берган улар. Ҳозир ҳам орамизда бор. Шундайларнинг умрлари узоқ бўлсин. Тилларидан шукrona тушмайди. Невара-эвараларини дуо қилиб чарчашмайди. Ҳар гапида ҳикмат бор. Ҳеч бўлмаса, битта мақол ишлатиб сўзлайди. Олисдаги ўғлидан хат келса йиғлаб ўтирадиган, борлигини фарзандига бағишилаган, ўзини унугтан жонфидо оналар.

Яқин йиллар ичida замон шиддат билан ўзгарди. Истиқололга эришганимиздан сўнг, ўтиш давридан эсон-омон ўтиб олганимиздан сўнг кун сайн турмушимиз фаровонлашиб борди. Кўз тегмасин. Илгари бир аёлнинг кўчалик кийими икки-учтагина бўлса, ҳозир жавонларга сигмайди. Илгари йиртиқ кийимга ямоқ солиб кийилган ва юланиш учун ямоқ кийган савоб бўлади, дейилган бўлса, бугун ямоқ кийган инсонни кўрмаймиз. Йигит-қизларги-

на эмас, катта ёшлилар ҳам замонавий, урфга қараб, рангини рантига мослаб кийина бошлиши. Бу оналарга ҳам кескин

таъсир қилди.

Шукурки, аёлларимиз энди ўттиз ёшида ўтин бўлмаяпти. Улар ҳам ўзгарди. Энди ўзини ҳам ўйлаяпти. Ямоқ тушган кўйлакларни энди эгниларига илишмайди. Ҳатто бир марта кўпчиликнинг орасида кийган либосини қайта киймайдиган аёллар бор.

## КЎЗ ЁШ ТЎҚАЁТГАН ОНАЛАР

Үй бекалари орасида бир тоифа оналар борки, улар телевизор қаршисида михланган.

Қайсиdir мамлакатдаги муҳаббат можароларини кўриб, қаҳрамонлар учун кўз ёш тўкиб ўтиради. Ёнига эмаклаб келган боласини ҳам силтаб, ғамга ботади. Ҳаётининг мазмуни шу. «Шу ҳафта зўр сериал бошланди. Узоқроқ вақт талаб қиласидиган таомларни қилмай қўйдим. Ё куйиб кетади ёки сериалимни кўролмай қоламан. Айни сериал бошланганда дадаси ишдан келади. Қовоғидан қор ёкиб қолмасин, деб тухум пишириб келаман. Кечга йигитни қамаб қўйганда қон босимим қўтарилиб кетибди. Ҳалигача дори ичиб ётибман. Туҳматга қолди, шўрлик. Кундузи тақрор кўраман. Болалар роса ҳалақит беришади-да». Қўшилар субатидан бу гаплар. Энди бу она фарзанди учун нима қила олаяпти? Оиласидагилар ярим тайёр овқатларни еявериб, саломатлигидан ажралмайдими? Маънавият-чи?

## КОЛЛЕЖДА ЎҚИБ, ИШЛАШ МУМКИНМИ?

«Фарзандларимдан бирор нарсани сўраб ўтираман. Кимга бераман, кимга уйлантираман, қаерда ўқииди, ўзим ҳал қиласман», деди бир опахонимиз.

Бу ҳолатда саломга яраша алиқ олинса, қандай бўлади? Улар билан ҳам ҳисоблашиш, маслаҳатлашиш ўринли эмасмикан? Фарзандининг юрагида нима борлигини билмаган она унинг қаёққа кетаётганини, кимлар билан учрашаётганини биладими? Фарзанди ҳам ўзича қарор чиқариб қўйса, ким куяди? Биз оталар ҳақида кам гапиряпмиз. Чунки бола кун бўйи она билан қолади. Она унинг руҳиятидаги, саломатлигидаги ҳолатларни кўздан қочирмаслиги керак.

Коллежда ўқиётган фарзандини ишлатиш учун ўқищдан олиб қоладиганлар ҳам бор орамизда. Қиши ойларида бир-икки коллежда кўриниб қўйса бўлди, бошқа пайт ишлаб пул топади, деб ўйлайдиганлар ҳам бор орамизда. Қонунчилигимизда ота-оналарнинг масъулияти кучайтирилмоқда. Бироқ оиласа путур етган бўлса, уни йўлга солиш қийин кечади. Касб-хунар коллежлари тўғрисида давлатимиз қайгураёттан бир пайтда ота-оналар фарзандининг фаровон келажаги ни эмас, бугунги кунини ўйлаб турса...

**Ҳафиза ЭГАМБЕРДИЕВА,  
журналист**

Адҗамбек АЛИМБЕКОВ



# Ҳартоқ hikouyalar

*Буғунги тезкор замонда одамлар қисқа фурсатда күп ишларни қилишга уринадилар. Замондан орқада қолиб бўлмайди. Шу маънода қисқа ҳикоялар ёзишга уриндик. Қолаверса, жаҳон адабиётида қисқа ҳикоялар ёзиш тажрибаси бор. Тўғри-да, бир қаторли шеърлар бўлгач, нега бир-икки гапдан иборат ҳикоялар бўлмаслиги керак? Асли ҳикоянинг моҳияти бир жумлада зуҳур этилади-ку. «Ҳар қандай асар, одатда, бир сўз учун ёки бир сатр, бир фикр учун ёзилади» – деганди устоз Талъат Солиҳов. Бизнинг япроқ ҳикояларимиз ҳам шу йўлдаги изланишлардандир.*

## Донишлик

Қулоги борларнинг бари гап уқсайди, қирқ қулокли қозон энг донишманд бўларди.

## Фикр

Томчи тошни тешиши мумкин. Ўткир фикр бутуни синдиради, синиқни ямайди. Танлашда адашма.

## Муносиби

Қанот бўлса, уча оладиган бўлса. Товуқникидек эмас.

Оёқ бўлса, чопа оладиган бўлса. Тошбақанидек эмас.

Неки бўлса, муносиб бўлсин экан, бўлмаса...

## Хамиртуриш

Хамиртуруш қўшилмаса, хамир кўпчимайди. Демак, нон ёпилмайди. Момолар кейинги хамирга муштдеккинасини олиб қўядилар. Муштдеккина хамиртурушуда етилтириш, биридан иккинчисига ўтказиш, занжирдек улаш ҳикмати бор. Хамиртурушдан ҳам ўрганса бўларкан, фақат...

## Чираниш

Ўзингдан қочар манзил тополмайсан. Нафснинг чегарасин тийиб туролмайсан. Нимангта чиранасан, одамзот?

## Овоз

Қўнғироқ қилсан бандлик саси. Наҳот, бу сенинг овозинг?!

## Ҳеч қаерда

Илон, ари, чаён захридан табобатда шифо учун фойдаланилади. Ари захричалик нафи бўлмаган захринг ичингга ют. Ўлмайсан ҳам, ўлдирмайсан ҳам...


## Табассум

Қуёш кулиб боқса, тошларнинг юзидағи қорлар эрийди, олам равшанлашади.

Қўнгилларни бир жилмайиш билан чароғон қилиш мумкин. Табассум қилишни унутма.

## Ажин

Китоб туманидан келаётганда, Тахтақорача доvonидан ўтаётиб тоғларга разм солсангиз, бирорта текис, бутун тош йўқ. Қоятошлардаги ёриқлар боболар юзидағи ажинларни эслатади. О, умр, тошларга ҳам ажин соласан.





### «МУАЛЛИФЛАР» АЙЛАНМА КРОССВОРДИ

Күйида келтирилган бадий асарлар муаллифларини топиб, шаклда белгиланган хонадан соат мили йўналишида рақам атрофига ёзиш билан топқирилгингизни сиаб кўринг. 1. «Илиада», «Одиссея» эпоси. 2. «Оқ кема», «Сарвиқомат дилбарим» қиссалари, «Асрға татигулик кун», «Кассандра тамғаси» романлари. 3. «Узверли», «Айвенго» романлари. 4. «Тақдир ўйинлари», «Оилавий давра», «Она замин» романлари. 5. «Дор остидаги сўз» қиссаси, «Тожиҳон Шодиева тарихи», «Розияхон Мирсоатова» очерклари. 6. «Шовқин ва ғазаб», «Ўлим тушагида», «Авессалом, авессалом» романлари. 7. «Испания қалбимда» тўплами, «Башарият кўшиғи» эпопеяси, «Тан оламан: мен яшадим» хотира асари. 8. «Қиёсий ҳангомалар» умумий ном билан атапувчи тарихий биографик асарлар. 9. «Ганс Ланге» пъесаси, «Мария Магдолина» трагедияси, «Аср фарзандлари», «Мерлин» романлари. 10. «Болалик», «Бола Алишер» қиссалари, «Навоий», «Қўёш кораймас» романлари. 11. «Фарсалдаги жанг», «Муқаддас баҳор» романлари. 12. «Граждания», «Дзядлар» поэмалари. 13. «Анна Снегина» достони, «Замин дарфаси» тўплами. 14. «Чолиқуши», «Яшил кун» романлари. 15. «Булбулнома», «Мантиқ ут-тайр», «Хусравнома» «Панднома» достонлари. 16. «Карнавал мамлакати», «Какао», «Тер», «Олтин мевалар даласи», «Чексиз далалар» романлари. 17. «Рамазон оқшомлари» ҳикоялар тўплами, «Ташула» қиссаси, «Мистер доллар», «Изтироҷ чеккан оила», «Доктор» комедиялари. 18. «Хожи Қора» ко-

медијаси, «Алданмиш кавоқиб» қиссаси. 19. «Сўна», «Жек Реймонд», «Узилган дўстлик» романлари. 20. «Жунгли китоби», «Рикки-Тики-Тави», «Маугли» саргузашт асарлари. 21. «Болалар ва оила эртаклари», «Немис ривоятлари» асарларини ёзган ака-укалар. 22. «Ичиндаги ичиндадир» насрый асари, «Маснавий маънавий» ҳикоялар, панду хикматлар асари. «Макотиб» замондош ва устозлари билан бўлган ёзишмалари. 23. «Юсуф ва Зулайҳо», «Лайли ва Мажнун», «Саломон ва Абсол» достонлари. 24. «Обломов», «Замон зайли», «Оддий воқеа» романлари.

**МУАММОНОМА** Калит сўзлар: 1. Алишер Навоийнинг «Фарҳод ва Ширин» достонидаги маккора аёл образи - 19, 10, 13, 9, 1, 6.

2. Атоқли ўзбек маърифатпарвари, шоир ва муаллим - 1, 11, 7, 8, 6, 2, 15.

3. Сайд Аҳмаднинг «Уфқ» трилогияси қаҳрамони - 5, 2, 7, 5, 8, 4.

4. Вильям Шекспирнинг «Отелло» трагедиясидаги образ - 17, 18, 8.

5. Шеърият анжумани - 9, 13, 14, 8, 2, 4, 1.

6. Ёзувчи асарига ўхшатма тарзида ёзилган янги асар - 6, 1, 3, 2, 4, 1.

7. Мирмуҳсин қаламига мансуб қиссалардан бири - 16, 12, 4, 2.

Энди калит сўзларининг жавоблари орқали шаклнинг атрофи ва ўрта қисмидаги рақамлarda яширган муаммонами ҳал этиш билан икки ҳикматли сўзни билиб олинг.

Тузувчи: Фозилжон ОРИПОВ

1. «Муножот», 2. «Топилмас», 3. «Санамо», 4. «Оқибат», 5. «Талкин», 6. «Нигорим», 7. «Мактуб», 8. «Билмадим», 9. «Мухаммас», 10. «Согуниб», 11. «Бозургоний», 12. «Йитт», 13. «Тўхтамас», 14. «Сувора», 15. «Азизим», 16. «Муҳаммад», 17. «Дилбарим», 18. «Мушкулду», 19. «Рок», 20. «Кепинчак», 21. «Керак», 22. «Көлдим», 23. «Мунчаким», 24. «Мустаҳзод», 25. «Дилбаринг», 26. «Гулузорим».
- МУАММОНОМА** Калит сўзлар: 1. «Шашмаком», 2. Харак. 3. Танбур. 4. Чант. 5. Медиатор. 6. Анъана. 7. Кулок.
- Кўшиқлар: «Курбониман». (Вокиф). «Равноанамасун». (Увайсий). 3. «Хушкелдинг». (Амирий).
4. «Тонг отунача». (Дипафкор).




Түш



Тун шуъласи




Кутыш



Севги куйи



Мұхаббат



Түй тарааддууди



Rassom

Shixnazar Jumaniyozov

İjodidan namunalar



1987 йили Хоразм вилоятида туғилған. 2003-2010 йиллар давомида Камолиддин Бекзод номидаги Миллий рассомлик ва дизайн институти тасвирий санъат факультетининг маҳобатли рангтасвир бўлимида таҳсил олган ҳамда дастгоҳли рангтасвир мутахассислиги бўйича магистратура босқичини тамомлаган.

2011 йилдан Камолиддин Бекзод номидаги Миллий рассомлик ва дизайн институти тасвирий санъат факультети маҳобатли рангтасвир кафедраси мудири, Бугунги кунда у кафедрани бошқариш билан бир қаторда талабаларга рассомлик санъатидаги ўз билимларини, ижод сирларини ўргатиб келмоқда. Ўзбекистон Бадиий Академияси қошидаги Бадиий Ёш ижодкорлар уюшмаси аъзоси. Кўплаб ҳалқаро ва республика кўргазмалар иштирокчиси.



Шарқона ибо



Хаёт жилоси



Ўзбекистон миллий  
симфоник,  
камер ва халқ چолғулари  
оркестрлари жамоалари  
бирлашмаси  
юртимиздаги  
барча устозларни  
**1 октябрь – Ўқитувчи ва  
мураббийлар куни билан  
муборакбод этади!**



ISSN 2091-5330

indeks: yakka obunachilar uchun – 820,  
tashkilotlar uchun – 806.

OBUNA DAVOM ETMOQDA

